



Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով
ձևափոխել կամ օգտագործել առկա նյութը ստեղծելու համար նորը

You are free to:

Share — copy and redistribute the material in any medium or format

Adapt — remix, transform, and build upon the material

5875

Wenon, N.J.

1892

891.99

U-55

2011

2003

КОДА КНИГА ВЗЯТА

552 $\frac{1}{4}$	15 $\frac{1}{4}$
698 $\frac{21}{11}$	292
	23 $\frac{1}{15}$
	88
6118	
383	

331.00
Ա-55

ԲԵՂԲԵՏ ԱՅՎԱԶԵԱՆՆՅ

Հայաստանի Խորհրդային Սոցիալիստական Հանրապետության
ԿՅԿՅ
92

Այ.

12

ԱՂՈՏ ԵՐԿԱԹ

ՊԱՏՄԱԿԱՆ ՎԷՊ

(913 — 928 թ. Գ.)

Արտատպուած «Արձագանք» լրագրից:

Центральный СЭС им. Ленина

ИНВЕНТАРИЗОВАНО 1930 г.

№ _____

Թ Ի Ֆ Լ Ի Ս

Տպարան Մ. Շարաձէ, Նիկի փ. տ. 21
Типогр. М. Шарадзе, Никол. 21
1893

1723

Дозволено цензурою. Тифлисъ, 12-го Мая 1893 г.



1513
41

9

Ա.
Մանուկ

Վապոյտ*) բերդը պաշարուած էր...
Դեռ նոր բացուել էր գարունը, նոր հա-
լուել ձիւնն ու սառույցը և թաւշեայ կանա-
չով պատել բերդի շրջակայքը, երբ Իւսուֆ
սպարապետը իւր հրոսակներով կանգ առաւ

*) Սոյն Վապոյտ բերդը գտնվում էր Արա-
րատեան երկրում և կառուցուած էր Վապոյտ կո-
չուած քարանձաւի վրայ, որ գտնվում էր Երասխ
գետի ձորում: Այս գաւառը Երասխի ձորի ա-
նունով էլ կոչվում էր Երասխաձոր. Ստեփաննոս
Օրբէլեանը այս ձորը կոչում է նաև Աշորնեաց
(կամ Արշարունեաց): Այս բերդը չպէտք է խառ-
նել Սիւնեաց երկրում գտնուած Հրաշկարերդի
հետ, որ այլպէս կոչվում էր նաև Վապոյտ բերդ
Վայոց ձորի:

Ինճիճեան. Ստոր. հին Հայաստ. 398.
Մեզ աւելի հաւանական է կարծել, որ ա-

կապոյտ բերդի պատերի առաջ և բազմաթիւ սպիտակ վրաններով շրջապատեց բերդը, ուր ամրացած էր հայոց թագաւոր Սմբատը իւր հաւատարիմ խմբով:

Արեգակը նոր թագնուել էր լեռների քամակին իւր ետեւից թողնելով ծիրանագոյն շերտերը, որոնք հետզհետէ անհետանում էին, մէկ գոյնը միւսի հետ խառնվում, ոչնչանում և ապա թողնում իրանց ետեւից ամպերի գորշ կոյտեր. կամաց կամաց հեռաւոր լեռներն ընկղմվում էին խաւարի մէջ և անհետանում, այն ինչ Կապոյտ բերդի շրջակայ բլուրները

մուրք Կապոյտ լերին ասածը—կամ Պարեսար լեռների մէջ գտնուող Գեօք-դաղն (Կապոյտ սարն) է և կամ նոյն իսկ Կապոյտ բերդն էր, որ իբրև անառիկ տեղ յայտնի է մեր պատմութեան մէջ և գտնվում էր Արշարունիքում ոչ հեռու այն տեղերից, ուր խառնվում է Ախուրեանը Երասխի հետ Բարդոզի հիւսիսային թևերում:

Ոմանք Արտագերսն ու Կապոյտ բերդը միևնոյն են համարում, բայց Եղիշէն Արտագերսի և Կապոյտի անուններն առանձին-առանձին է յիշում:

Հիսուսածք գիրք երրորդ. Կ. Կոստանտնուսի 125. 4. Ծ. 4.

և դաշտերը ծածկվում խարոյկներով:

Մէկը միւսի ետեւից աճում էին խարոյկները և գիշերային խաւարի մէջ տարածում իրանց կարմրածիրանագոյն ցլմուռնքները, որոնց թույլ փայլի տակ ինչպէս մի վիթխարի մէջտեղը կանգ էր առել Կապոյտ բերդը և դառն արհամարանքով նայում էր խարոյկներին...

Բայց խարոյկների առաջ վխտում էին Եւսուճի զինուորները դաժան և ահարկու տեսքով սոցանից մի քանիսը թեք էին ընկած կրակի շուրջը և պատմում էին իրար իրանց սխրագործութիւնները. նրանք ծիծաղում էին, հռահռում: Միւս խարոյկի վրայ ընդհակառակն զինուորները խմբուել էին մի կրակի շուրջը, ուր փայտեայ պտուտակի (շամփրի) վրայ խորովում էր մի ամբողջ ոչխար: Հայաստանի օդն ու ջուրը նրանց ախորժակը բաց էր արել. իսկ կերակուր ամեն կողմը կար, հարկաւոր էր մի փոքրիկ արշաւանք գործել մօտակայ գիւղերը և ահա ոչխարների հօտերը պարստ էին նրանց անկուշտ որովայնը յագեցնելու:

Արաբական վրանից մի փոքր ցած, բաց երկնքի տակ, կանաչ խոտի վրայ համարեա իրար վրայ թափուած էին խառնիճաղանճ մի

բազմութիւն՝ բաղկացած կանանցից և երիտասարդներից, որոնց վզերից, իրարից շատ մօտիկ, անցկացրած էին շղթաներ: Նրանք ծանր կերպով հեծեծուժ են, շղթաների ամուր կապերը ուռցրել են նրանց վզերը, իսկ պատառոտուն հանդերձների տակից մերկ մարմիններից հոսում է արիւնը, որով ողողվում են դաշտի ծաղիկները: Սարսափելի աղիողորմ տեսարան է ներկայացնում այդ վայրը, ուր խրմբուած են հայ գերիները և որոնց շուրջը պարտովում են զինուորներն իրանց արիւնաթաթախ նիզակներով:

Դեռ անցեալ օրը նրանք ազատ, իրանց յարկի տակ իրանց սիրելիների գրկումն էին, երբ վրայ հասան անգութ Իւսուֆի հրոսակները և ծերերին ու անկարներին սպանելով, իրանց աչքի առաջ մորթոտելով իրանց փայփայած գաւալներին, ծանր շղթաներով շղթայեցին իրանց և քարերի ու մացառների միջով, նիզակներով և սրերով քշելով, յոգնած, քաղցած ու ծարաւի քշեցին մինչև Կապույտ բերդի պարիսպները. ուր պիտի տանեն նրանց, ինչ պէտք է անեն նրանց:

— Ո՛հ, պապակեցայ, մի կաթիլ ջուր, շըշընջում էր մի նորատի գեղեցիկ աղջիկ և վայրենի հայեացքը դարձնում շուրջը:

— Մեռայ, շղթան մի՛ ձգիր, մօտեցիր ինձ, կրկնում էր մի ուրիշը, որ սարսափից ապշութեան մէջ ընկած ուժով ձգում էր իւր ընկերոջ շղթան:

Բայց ողորմելիների հեծկտանքի պատասխանը լինում էր պահպանների մտրակների և նիզակների հարուածները, որոնք մինը միւսի ետևից անխնայ իջնում էին սրա ու նրա գլխին:

Ցաւից նրանք մի փոքր լուռւմ էին և ապա միաձայն իբրև մի մարմին սարսափելի կերպով հառաչում...

Թող հառաչեն, թող հեծկտան, որքան որ կուզեն, ո՛ւմ ինչ փոյթ, դրանք ընտրուած գեղեցիկ կանայք ու պատանիներն էին, որոնք վաղ թէ ուշ պիտի վաճառուէին և կամ զինուորների կրքերին զոհ գնային:

Բայց թողնենք այդ գերիներին և անցնենք մի ուրիշ բանակի, որ բռնում է Կապույտ բերդի աջակողմը:

Սյրտեղ էլ շարուած են վրաններ, այդտեղ էլ վառվում են խարոյկներ, բայց այդտեղի զինուորները բոլորովին այլ տպաւորութիւն են թողնում: Սրանց դէմքն այնքան ահարկու և վայրենի չէ, ինչպէս առաջիններինը և այնքան խիստ և ահարկու տպաւորու-

Թիւն չէ գործում: Թուխ դէմքերով էին, ուրոնց կորովի, քաջ և հայկական արիւնը հոսում էր նրանց երակների մէջ: Այդ գունդը հայկական գունդն էր, որ բռնում էր Իւսուֆ ոստիկանի աջ կողմը և արաբական հրոսակների հետ միասին եկել էր Կապոյտ բերդը պաշարել: Նա հայոց թագաւորին բռնել էր ուզում. նա ծարաւի էր նրա արեանը... Ինչո՞ւ, թէն էր պատահել և ինչո՞ւ հայը հայի դէմ էր զինուել... Բայց այդ ինչ զինուորների գիտնալու բանն էր. նրանց հրամայուած էր կռուել հայոց թագաւորի դէմ և նրանք պիտի կռուէին: Նրանցից շատերը թէև զգում էին իրանց արարքի վատութիւնը, բայց լըռում էին. նրանք վախենում էին իրանց իշխան Քազիկից, որի հրամանատարութեան տակ գտնվում էին իրանք: Եւ Արծրունեաց իշխան Քազիկի գունդը վաղը առաւօտ պիտի կռուէր ու գերէր հայոց թագաւորին և ո՞ւմ համար, ի հարկէ արաբական Իւսուֆ սպարապետի, իսկ թէ ինչո՞վ կը վարձատրէր ամիրան հայի այդ դաւաճանութիւնը Սմբատի քեռուրդի Քազիկին, այդ կախուած էր ամիրայի վեհանձնութիւնից:

Լուռ ընթրիք էին անում հայ զինուորները սպասելով վաղուան ճակատամարտին:

Այդ միջոցին հեռու, լեռների քամակին մի լոյս երևեցաւ, այդ լոյսը հետզհետէ աճում էր և գիշերային խաւարի մէջ կազմում մի բոցավառ փունջ. թնչ է դա... հրդեհ թէ խարոյկ և ինչո՞ւ մէջ գիշերին հեռու լեռների մէջ վառել են այդ խարոյկը և թնչքան նա մեծ է ու ահաւոր և ըսպէ առ ըսպէ աճում և ծաւալ է ընդունում, նրա բոցերը մինչև երկինք են հասնում:

Նայում են հայկական գնդի զինուորները դէպի այդ բոցը և նրանց երեսները կընձռոտվում է:

— Տեսնո՞ւմ ես այն բոցը, հարցնում է մի յաղթանդամ գեղեցկատեսիլ զինուոր իւր երիտասարդ ընկերակցին, որ խորին մտածմանց մէջ ընկղմուած թիկն է տուել կրակի մօտ և լուռ նայում է հեռու երևացող բոցին:

— Հա տեսնում եմ, թնչ բան է:

— Մի՞թէ չգիտես, որ այնտեղ գիւղ է այլովում:

— Ի՞նչ գիւղ:

— Հայոց գիւղ:

— Եւ ո՞վ է այրել:

— Ի հարկէ Իւսուֆի հրոսակները, այնտեղ հիմա մորթում են, կողոպտում են, ոտնատակ են տալիս ամեն սրբութիւն, իսկ նո-

րատի կոյսերին և հարսներին որին սպանում,
որին առւանգում, իսկ ոմանց շղթայում և
գերութեան վարում: Վաղը եթէ, Տէր մի
արասցէ, առնուի բերգը, սա էլ նոյն օրին կը
հասնի:

— Իսկ հայոց թագաւորը... ..

— Հայոց թագաւորը... հըմ... նրա ա-
րեանը վաղուց է կարօտ Իւսուֆը:

— Իսկ մենք միթէ պէտք է կռուենք
Սմբատի դէմ:

— Այո՛. բա ինչո՞ւ համար ենք եկել: Մենք
եկել ենք որ մեր արիւնը թափենք և բռնե-
լով Սմբատին լանձնենք Իւսուֆին:

— Դաւիթ, ի սէր Աստուծոյ, ասա՛, ինչո՞ւ
մենք պէտք է պատերազմենք հայոց թագա-
ւորի դէմ, միթէ...

— Մաս... այդ քո գիտնալու բանը չէ,
դու պարտաւոր ես հնազանդել մեծիդ. ինչ
որ հրամայում են, առանց բացատրութիւն
տալու պիտի կատարես:

— Բայց միթէ դու պիտի վաղը կռուես...

— Ե՛ս, ի հարկէ, իսկ թէ ո՞ւմ դէմ և
ինչո՞ւ համար, այդ էլ իմ գիտնալու բան է:

— Այդ միջոցին թմբուկները խփեցին,
ընթրիքը վերջացաւ և բանակը խոր քուն
մտաւ: Պահապանները միայն արթուն հըս-

կում էին ամեն կողմը, իսկ հեռուում դեռ
ծխում էր հայոց գիւղը և աւելի բոցավառ-
վում, այն ինչ բանակի խարոյկները հետզ-
հետէ հանգչում:

Բ.

Խոր գիշեր էր...

Անամպ երկնակամարի վրայ փայլուն աստ-
ղերը լուռ կատարում էին իրանց գիշերային
ճանապարհորդութիւնը. փչում էր գարնանա-
յին ցուրտ զեփիււը, որ շոյելով Կապոյտ բեր-
դի պարիսպներին կամացուկ համբուրում էր
նրան, իւր կարօտն առնում և գնում կոր-
չում հեռու և հեռու... Հայրենի քամին կար-
ծես կարօտել էր հայրենի բերդի պարիսպնե-
րին, որ այսօր շրջապատուած էր թշնամի-
ներով:

Այդ միջոցին, երբ հայկական դաւաճան
գունդն էլ խոր քուն էր մտած, զինուորական
մէկ վրանից զգուշութեամբ մի գլուխ երևե-
ցաւ, որ աջ ու ձախ նայելով, նա համարեա
դուրս սողաց վրանի տակից, կանգնեց տեղը,
աչքերն ուղղեց դէպի Կապոյտ բերդը և զգոյշ
քայլերով բլրից իջաւ ցած: Յաղթանդամ, բայց

գեղեցկատեսիլ զինուոր էր դա, նոր էր ծածկուել նրա երեսը աղուամագով և երկու փայլուն աչքերը վառվում էին գիշերային խաւարի մէջ, այն ինչ նրա սիրտը արագ տրոփտրոփում էր: Վախ չունէր նա մահից, բայց նրա մտքի մէջ պտրտվում էր մի բան, որ նա աշխատում էր շտապ ի կատար ածել: Զգուշութեամբ նա անցաւ մի փոքր տարածութիւն և ապա յանկարծ կանգ առաւ, թաքնուելով մի թփի տակ: Իրանից մի փոքր հեռու նա մի շշուռջ լսեց, որ սառեցրեց նրա արիւնը երակների մէջ: Ի՞նչ էր այդ խօսակցութիւն թէ՞ հառաչանք. նա պարզ չկարողացաւ լսել, հակառակ քամին թող չտուեց նրան իմանալու և նա մի քանի վայրկեան պահուելով թփի տակ, հէնց ուզում էր վեր կենալ և շարունակել ճանապարհը, երբ ձայները նորից կրկնուեցան: Այժմ նա պարզ լսեց հառաչանքի և խօսակցութեան ձայներ: Ապա նայեց այն կողմը և տեսաւ երկու ստուեր, որոնք զգուշութեամբ առաջ էին գնում:

— Ո՛հ, կամաց գնա, ես չեմ կարող քայլել: Ոտքերս ուռած և արիւնը լուայ են, ասում էր մէկը միւսին:

— Կամաց գնալով բան չի լինի, Աւօ, արշալոյսը կը բացուի և մենք կրկին կը բըռ-

նուենք, հարկաւոր է շտապել, փախչել դէպի լեռները, դէպի մեր գիւղը, պատասխանեց միւսը:

— Ա՛խ, եղբայր, ես այս բոյէիս վայր կ'ընկնեմ, աչքերս մթնում են, գլուխս պտրտվում է, բաւական չէ շղթաներից յառաջացած վերքերս, քաղցն էլ մի կողմից է նեղացնում ինձ, մի ամբողջ օր է ոչինչ չեմ կերել, ես տանջվում եմ:

— Լռիր, էլ ինչո՞ւ փախար, երբ չէիր կարող հետևել ինձ...

Երկու ստուերներն անցան թփի տակ պահուած զինուորի մօտից և նա լաւ նայելով նրանց, տեսաւ որ երկու փախստական հայ տղաներ էին, որոնք խուսափում էին բանակից:

Զինուորը մի խորին անխաբաշեց, մի փոքր կանգ առաւ, մի միտք անցաւ նրա գլխում և նա սկսեց կամաց հետևել փախստականներին, որոնք հետզհետէ շտապեցնում էին իրանց քայլերը, թէև փշերն ու քարերը արիւնլուայ էին անում նրանց բոբիկ ոտքերը:

Լուռ հետևում էր զինուորը, որի մէջքից միայն մի սուր էր կախուած: Երբ անըզգուշաբար ոտքը քարին կպաւ և այդ քարը գլորուելով ցած աղմուկ հանեց, փախստական-

ները սրտատրոփ կանգ առան և ետ նայեցին: Նրանք տեսան իրանց ետևը մի մարդ, որ լուռ իրանց էր նայում: Սարսափը պատեց նրանց, սառը մահուան դողը անցաւ նրանց մարմնով: Այդ ժամանակ զինուորը մօտեցաւ նրանց:

— Ի սէր Աստուծոյ, մեզ մի սպանի, ասացին նրանք միասին:

— Լ՛ուռ, ձայն մի՞ք հանի, թշուառականներ, թէ չէ կորած ենք:

Փախստականները լռեցին և ուրախացան լսելով հայ լեզուն:

— Ո՞վ էք և ո՞ւր էք գնում, հարցրեց նրանց զինուորը:

— Մենք գարիշատցի ենք և գերի էինք Իւսուֆի բանակում և յաջող ժամանակ գրտնելով փախչում ենք, ի սէր Աստուծոյ, մի խանգարիր մեզ:

— Լաւ, ես ինքս էլ փախուստ եմ տալիս այդ զգուելի բանակից, ուր հայը հայի դէմ պիտի կռուի. քայլեցէք գնանք, քանի ժամանակ կայ, լոյսը բացուելուն պէս շատ ուշ կը լինի, մեզ մաս-մաս կը կտրատեն արաբ զինուորները:

Ապա երեքն էլ լուռ սկսան առաջ քայլել: Զինուորն առաջ ընթացաւ, իսկ երկու տղաները նրա ետևից: Զգոյշ, անխօս անցան

նրանք բաւականին տարածութիւն և մտան մի փոքրիկ ձոր, ուր խստոջում էր լեռնական պարզ և վճիտ աղբիւրը: Այդ ձորից այն կողմը, բարձրութեան վրայ արդէն գտնվում էր Կապոյտ բերդը: Յանկարծ զինուորը կանգ առաւ և նշան արաւ տղաներին, որ թաքնուեն: Զորի միւս կողմից զինուորը մի ինչ որ ձայն լսեց: Մի փոքր ժամանակ անցաւ և պարզ նրկատեց մի խումբ զինուորներ՝ թուով հինգ հոգի, որոնք դէպի իրանց կողմն էին գալիս: Զգուշութեամբ տղաներին ծածկեց մացառի տակ և ինքն էր կուչ գալով մերկացրեց սուրը սպասելով նրանց: Նա զգաց, որ թէ ինքը և թէ տղաները կորած էին, գոնէ կեանքը աժան չծախէր: Խումբը խօսակցելով հետզհետէ մօտենում էր: Խօսակցութիւնից հայ զինուորը ոչինչ չհասկացաւ, այսքանն իմացաւ միայն որ դրանք Իւսուֆի գիշերապահ զինուորներն էին, որոնք գնացել էին Կապոյտ բերդի շրջակայքը լրտեսելու:

— Եհ, հոգ չէ, որ հինգ հոգի են, դրանցից հեշտ է ազատուելը, բայց վախենում եմ՝ որ այդ անպիտանները աղմուկ բարձրացնեն և բոլոր բանը փչացնեն, թէ չէ դրանց սատակացները ամենահեշտ բանն է, մտածում էր զինուորը աչքը չհեռացնելով նրանցից:

Նրանք աւելի մօտեցան, մի քանի քայլ էլ և
ահա նրանք ոտքի տակ կը տային թաքկացած
տղաներին, որոնք դողում էին յոյսները՝ Աս-
տուծոյ վրայ դնելով: Զինուորը լսում էր թը-
շուառ տղայոց սրտի բաբախիւնը և այդ ա-
ւելի սիրտ էր տալիս նրան:

Յանկարծ խումբը կանգ առաւ: Հայ զի-
նուորը մտածում էր անակնկալ կերպով յար-
ձակուել նրանց վրայ, և նա արդէն բարձրաց-
րեց սուրը, երբ խումբը ծռուելով մի կողմը,
անցաւ առաջ: Փախստականները ազատ շունչ
բաշեցին:

— Ի՞նչ եղաւ Ահմադը, ասում էր Իւսու-
ֆի զինուորներից մէկը:

— Զգիտեմ, նա կարելի է առաջ լինի գնա-
ցած, պատասխանեց միւսը և նրանք աւելի
առաջ անցան թողնելով մեր փախստականնե-
րին իրանց ետևը:

— Կորան, անպիտանները, կամաց ասաց
զինուորը տղերանց և նրանք մի փոքր ժա-
մանակ կրկին անշարժ մնալուց լետոյ առուա-
կի ուղղութեամբ առաջ անցան:

— Մեր ազատիչն ես, ի՞նչ է քո անունը,
հարցրեց Աւօն, որ մեծն էր միւսից:

— Իմ անունը Դաւիթ է Գնունեանց ազ-
գից, ասաց փախստական զինուորը և այնու-


հետև առաջ անցան լուռ: Ոչ մէկը ոչինչ
չէր խօսում:

Բաւական ժամանակ լուռ առաջ էին գը-
նում առուակի հակառակ կողմով, երբ կրկին
կանգ առան մի սև առարկայ իրանց առաջը
տեսնելով: Նրանցից մի քայլ առաջ նստած էր
մի տեսակ սև մարմին, որի երկու աչքերը
երկու ճրագների նման փայլում էին գիշերա-
լին խաւարի մէջ: Ապուշ կրթած, լայն բա-
ցած աչքերով դիտում էր դա մեր փախստա-
կաններին, իսկ փախստականները դրան:

Այս գիշեր, ինչպէս երևում էր, շատ
փորձանքների պիտի հանդիպէին մեր փախ-
տականները: Մի վայրկեան Դաւիթը նայեց
այդ սև հրէշին, որ վիթխարի հասակ ունէր
և նստած ջրի ափին լուռ նայում էր իրան:
Երկայն նիզակը դրուած էր այդ արաբ զի-
նուորի կողքին, իսկ կեռ սուռը մէջքից կա-
խած, բայց արաբ զինուորը ըստ երևոյթին ոչ
մի տրամապրութիւն չուներ զէնքին դիմելու
և ապուշի նման նայում էր իրան:

Դաւիթի և արաբ զինուորի հայեացքնե-
րը մթուփեան մէջ պատահեցան իրար և
Դաւիթի մարմնով մի սուռը դող անցաւ: Նա
մտածեց. «Եթէ ես սրան չսպանեմ, սա ինձ
կսպանի, յարմար վայրկենից պէտք է օգտուել»

15/3
MI



քանի որ յետ մնացած արաբ զինուորը, որ ջրի ափին նստած ոտքերն էր լուանում, դրանց գիշերային վհուկներ կարծելով երկիւղից սառել կարկամել էր»։ Նա յանկարծ վրայ ընկնելով, մի վայրկենում իւր սուրը մխեց արաբ զինուորի կուրծքը։ Մի վայրկեան և ամեն ինչ վերջացած էր։

Դաւիթը Հանեց նրա կեռ սուրը և վերցրեց մօտը գրուած նիգակը և տալով տղերանց, որոնք 18 — 19 տարեկան կը լինէին, ստաց.

— Առէք, դուք անդէն էիք, այս գէնքով դիւանք շատ Հայի արիւն են թափել, այժմս իրանց գէնքով իրանց արիւնը պէտք է թափենք։ Պէտք չէ մեր ժամանակում առանց գէնքի շրջել, անիծուածները Հայի արիւնը քամեցին։

Տղաները իրանց ցաւը մոռացան և առնելով գէնքերը առաջ անցան կրկին վեր։

— Բայց ո՞ւր ես տանում մեզ, մենք մօտենում ենք արդէն բերդի պարիսպներին, ասաց Աւօն։

— Ո՞ւր եմ տանում, մի՞թէ կարծում էք Իւսուֆի բանակը։

— Ո՛չ, Տէրը մի արասցէ, բայց մենք մօտենալով պարսպին, մեզ թշնամու տեղ դնելով կարող են կոտորել։

— Միք վախիլ, դրա ճարն էլ գիտեմ, վաղ առաւօտը մենք Կապոյտ բերդում կը լինինք և այնտեղից կը կռուենք Իւսուֆի դէմ։ Գագիկ իշխանը մտածում էր, որ ես Հայոց թագաւորի դէմ կը կռուեմ, բայց շատ սխալուեցաւ։ Դաւիթի երակներին մէջ չի հոսում դաւաճանութեան կեղտոտ արիւնը. նա իւր արիւնը կը դնի օրինական թագաւորի համար։ Մի այնպիսի ոգևորութեամբ կեցցէ աղաղակեց, որ երկու տղաների սիրտը տրոփաց, երկիւղ կրելով որ մօտիկ ոքմին կը լինի և իրանց վրայ յարձակում կը գործի։

Դաւիթն արքայորդու՝ Աշոտ երկաթի ծառաներիցն էր, որին գերի տանելով Իւսուֆը և նրա Հասակն ու լայնապինդ թիկունքը տեսնելով յանձնել էր Գագիկ իշխանին, որ իւր զինուորներին շարքն էր անցկացրել խոստանալով շատ բարեքներ տալ նրան, եթէ կը մոռանայ Սմբատ թագաւորին և իրան Հաւատարմութեամբ կը ծառայի։ Կապոյտ բերդը պաշարելով Դաւիթին իւր տիրոջ դէմ էր զինել, իւր օրինական թագաւորի դէմ յարուցել։ Դաւիթը ամեն կերպ աշխատում էր փախուստ տալ Գագիկ իշխանից, բայց յարմար ժամանակ չէր գտնում. իսկ այժմս, երբ կանգնած էին Կապոյտ բերդի պարիսպների

տակ, այդ հեշտ էր Գաւթի համար: Նա ծանօթ էր Կապոյտ բերդի ծակուծուկերին և նրա համար բերդը մտնելն ամենահեշտ բանն էր:

Նւ երեք փախստականներն առաջ էին անցնում բարձրանալով վեր, միշտ վեր, ուր ցցուած էր անյաղթելի Կապոյտ բերդը, ուր նստած էր իւր նախկին տէրը, այն տէրը, որին կարօտել էր:

Անցնում էին նրանք առաջ քարերի վերայ մագլցելով, թփերի ու մացառների միջից ճղելով, որոնք պատառոտում էին նրանց հանդերձները և արիւնոտում երեսները, բայց նրանց ամենևին հոգսը չէր. քանի մօտենում էին պարիսպներին, այնքան Գաւթի սիրտը աւելի արագ էր տրոփում, այնքան աւելի սկսում էր նա յուզուել և շփոթուել: Ի՞նչ էր մտածում նա, որ Գագիկ իշխանի խոստումները թողած, ազատ կեանքը մի կողմը ձգած, գալիս էր պաշարուելու և իւր կեանքը զոհելու իւր տիրոջ համար: Չէ որ նա կարող էր կռուել Գագիկի զօրքի հետ միասին, քաջութիւններ անել, բարիքներ վայելել և ապաջութիւններ անել, բարիքներ վայելել և ապա հանգիստ, Գագիկից և Իւսուֆից բարիքներ ստանալով, պատերազմի դաշտից մի կողմը քաշուել և ապրել հանգիստ ու խաղաղ . . .

Բայց արդարութեան և ազնուութեան դրօշակը աւելի վառ կերպով, ինչպէս արևի պայծառ ճառագայթ, փայլում էր նրա մտքի մէջ, քան թէ այն հանգիստ կեանքը, որ պիտի դաւաճանութեամբ ձեռք բերէր . . . :

Յոգնածութիւնից կանգ առաւ Գաւթը մի սեպացած ժայռի տակ և նայեց ցած, ուր տարածվում էր Իւսուֆի բանակը և մի դառըն ժպիտ արձակեց, ապա իւր ուշադրութիւնը դարձրեց հեռուն, այնտեղ, ուր կորչում են լեռները իրար քամակին և նրա սիրտը տրոփաց: Հեռու, արևելեան հորիզոնի վերայ երևում էր մի տեսակ աղօտ լուստուրութիւն, այնտեղից կամաց-կամաց բացվում էր արշալոյսը, Կապոյտ բերդի արշալոյսը . . . Ի՞նչ հրաշալի էր դա, խաւարը նահանջում էր յետ, լեռների գագաթները հետզհետէ բացվում էին, կարճ ժամանակից յետոյ պիտի դուրս գար հրաշալի արևը և ոսկեգօծէր լեռներս գար հրաշալի արևը և ոսկեգօծէր լեռների կատարները և Կապոյտ բերդի անյաղթելի պարիսպների ժանիքները: Նա փեշով սրբեց իւր ճակատի քրտինքը և նրանք ժայռից ժայռ մագլցելով մտան խիտ մացառների մէջ: Ժամանակը կարճ էր, հարկաւոր էր ընտապել, վաղ առաւօտուանից Իւսուֆի հրո-

սակները վայրենիների նման կը թափուէին արդէն պարիսպների տակ:

Զգուշութեամբ անցնում էին մացառների միջով և իրանց ետևից ամեն հետք ծածկում, ոչնչացնում: Ապա կանգ առան հէնց պարսպի տակ, ուր մի ժայռի կտոր դուրս էր ցցել իւր ահարկու ժանիքը: Մի վայրկեանում Գաւիթը վեր մագլցեց ժայռի գլխին և տղերանց էլ օգնելով, այդ ժայռի վրայ սկսեցին առաջ գնալ, մինչև որ կրկին մտան մացառների մէջ: Նրանց ոտքերի տակ արդէն ասարածվում էր ահռելի անդունդը, մի փոքրիկ անդգուշութիւն և նրանք կը գըլորուէին անդունդ, որից կենդանի դուրս գալ անկարելի էր:

— Վերջապէս, սասց Գաւիթը և փորսող տալով մտաւ մի անցքի մէջ, որին հետևեցին և տղաները:

Քառորդ ժամ մութ անցքի մէջ փորսող տալուց լետոյ, նրանք կանգ առան և չորս կողմը նայելով տեսան հայկական զօրքերին կազմ և պատրաստ թշնամուն դիմադրելու:

— Կեցցէ հայոց բանակը, կանչեց նա և սուրը հանելով պատեանից ճօճեց օդի մէջ: Նրանք արդէն Կասոյտ բերդումն էին: Այդ միջոցին բարձր լեռների կատարնե-

րըն արդէն ոսկեզօծուել էին արևի անդրանիկ ճառագայթներով... Իսկ հեռոււմ արդէն լավում էին թմբուկների ձայները: Իսուսֆի զօրքերը կամաց-կամաց մօտենում էին...

Գ.

Ինչպէս մի սարսափելի փոթորիկ, որի առաջ ամեն ինչ դողում և տապալվում է, այնպէս վրայ վազեցին Իսուսֆի գինուորները Կասոյտ բերդի պարիսպներին, կարծես նրան միանգամից կուլ տալու, ոչնչացնելու և ջընջելու երկրի երեսից... Սարսափելի գոռիւն գոչիւնով, անթիւ նետեր ձգելով ղէպի պարիսպները, որոնք ճանճերի բազմութեան նըման ուզում էին վեր մագլցել պարիսպների վրայ և հիմնայատակ տալ ամեն ինչ, կոտորել բոլորին ով համարձակում էր իրանց դէմ կանգնել և այդպիսով յագուրդ տալ իրանց արիւնածարաւ սրտերին, երբ մինը միւսի ետևից, բերդականների նետերից վիրաւորուած, ընկնում էին գետին և մահուան տագնապի մէջ տոչորվում:

Արհամարհանքով նայում էին Սմբատ արքայի մի բուռն քաջերը ղէպի այդ բազմու-

Թիւնը և սառնասրտութեամբ թշնամեաց
գնդերից դիակները մէկը միւսի վրայ կիտում:

Գոռում էր կատաղած Իւսուֆը, իւր
զօրքերին խրախուսում և նրա վայրենի աչ-
քերից կատաղութեան կայծեր էին թափվում,
երբ տեսնում էր իւր գնդի նուազիլը և դի-
ակներից բլուրներ կիտուելը, որ մինչև սա-
րիսպներն էին հասնում: Նա ուզում էր ա-
րիւնչուկայ դիակները կոխկոռտելով բերդը մըտ-
նել և բոլորին մասմաս կտրատել, բայց իւր
կեանքը թանգ էր ծախում: Այնտեղից սլա-
նում էին հայկական գնդի մահաբեր նետե-
րը և իրանց հունձն անում:

Կատաղութեան փրփուրը բերանին, գո-
ռում էր իւր զինուորներին, խրախուսում նը-
րանց, առաջ մղում, բայց ոչ մի բան չէր
օգնում, նրանց դիմացը անվեհեր կանգնած
էր Կապոյտ բերդը իւր ընտիր քաջերով, նը-
րանց ոգևորում էր Սմբատ հայոց օրինական
թագաւորը:

Երբ որ տեսաւ Իւսուֆը իւր զօրքերի
կոտորածը, երբ նկատեց բերդականների քա-
ջութիւնը, հրաման տուեց իւր զօրքին յետս
նահանջելու և ապա առաջ կոչելով Գագիկի
հայկական գունդը սկսեց խրախուսել նրանց.

— Տեսնում էք ինչպէս քաջ են հայերը,
դուք էլ ցոյց տուէք ձեր քաջութիւնը:

Ու հայկական գունդը նետաձգութեամբ
յառաջ սլացաւ դէպի բերդը, բայց բերդից
արձակուող նետերը չխնայեցին և դրանց,
որոնց շատերն ընկան դաշտում առանց բեր-
դին մի փոքր անգամ վնաս տալու:

Երեկոյացաւ: Արևը արդէն իւր վերջին
հանգիստն էր առնում երբ փողը հնչեցին և
զինուորները յետ դարձան իրանց բանակները:

Բայց Իւսուֆը կատաղած էր: Իւր զօրքի
կոտորուելը նրան յուսահատութեան մէջ էր
ձգել, այն ինչ իւր նպատակը չէր աջողում
Սմբատին բռնելու: Թանկագին օթոցի վրայ
նստած մի թիկունքը տուած բարձին, նա
ձեռքի համրիչը ձգելով, երբեմն իւր նօսր
մօրուսը շփելով մտածում էր: Կատաղութեան
և վրէժխնդրութեան ալիքները երբեմն եր-
բեմն անցնում էին նրա դէմքի վրայ: Սոսկա-
լի էր նա այդ ժամանակ. փոքրիկ բայց կա-
տաղութեամբ լցուած աչքերը կարծես ուզում
էին դուրս ժայթքել ականակապիճներից:

Այդ միջոցին ներս մտաւ վրանը իւր
ծառաներից մէկը և խոնարհ գլուխ տալով
նրան կանգնեց վրանի դռների մօտ:

Իւսուֆը գլուխը բարձրացրեց և նայեց

նրան: Ծառան առանց համարձակուելու Ի-
սուֆին նայելու յայտնեց, որ Գազիկ Արծրու-
նին ցանկանում է արժանանալ իւր տեսու-
թեան:

— Թող գայ այդ շունը, հրամայեց Իւսու-
ֆը և կրկին իւր համրիչը սկսեց պտըտցնել:
Այդ միջոցին ներս եկաւ Գազիկ հայոց
իշխանը, խոր գլուխ տուեց Իւսուֆին և
ծունկ չոքելով նրա առաջ, համբուրեց նրա
փեշի ծայրը, ապա յետ գնալով ձեռները կրթ-
քին դարսեց և կանգնեց վրանի դռների մօտ:

— Այս ինչ է, Գազիկ իշխան, քո գուն-
դը ամենեւին քաջութիւն ցոյց չըտուեց և
մեր առաջին արշաւանքը անյաջող անցաւ
Կապոյտ բերդը գրաւելու: Ի՞նչ խաղ է ու-
գում խաղալ Սմբատ թագաւորը. մի՞թէ նա
կարծում է, որ ողջ ու առողջ կը պրծնի իմ
ձեռքից:

— Թող չվշտացնէ քո սիրտը այս օրուայ
անյաջողութիւնը, մեծ է Ալլահի զօրութիւնը
և Սմբատը վաղ թէ ուշ քո ձեռքը կը յանձ-
նուի: Այսօր նրա քաջերը չէին պատերազ-
մում, այլ Կապոյտ բերդի պարիսպները, որոնք
փլատակ կը դառնան միմիայն քո ամենազօր
զօրութեան առաջ:

— Այո՛, ես կը կործանեմ այդ պարիսպ-

ները, որ միւս անգամ պատասպարան չլինին
վախկոտ և թույլ հայերին: Ի՞նչ է կարծում
Սմբատը. ես երկաթի օղերով կ'շղթայեմ բեր-
դը և նա սովից անձնատուր կըլինի ինձ և իմ
զթութիւնը կը հայցի, այն ժամանակ վաչ
նրան, վայ հայոց թագաւորին, որ համար-
ձակվում է իմ դէմ ապստամբել: Քաջդ իշ-
խան, դու կարգադրիր զօրքերդ, կազմ և
պատրաստ ունեցիր միշտ յարձակումներով
նեղելու Սմբատին, իսկ երբ նա կ'ընկնի ձեռ-
քըս, այն ժամանակ մեծամեծ պարգևներ
կ'ընդունես ինձանից և ես քեզ Հայաստանի
տէր կըդարձնեմ:

Գազիկը խորին գլուխ տուաւ, նորից
ծունկ չոքեց համբուրեց նրա փեշի ծայրը և
դուրս եկաւ նրա վրանից:

Տխուր և տրտում հեռանում էր նա Իւ-
սուֆի վրանից և նրա միտքը ալեկոծվում: Նա
մտածում էր իւր զրութեան մասին, թէ ինչ
պիտի լինի ինքը և թէ ինչով պիտի վարձա-
տրի իրան Իւսուֆը իւր դաւաճանութեան
համար:

— Չէ, Սմբատին վերջ չկայ, հասաւ նը-
րա վախճանը: Ի՞նչ պիտի անէ նա միայնակ,
առանց օգնականի, առանց զօրքի և մինչև
էրբ պիտի փակուած մնայ Կապոյտ բերդում:

Ո՞վ կօգնէ նրան, երբ նա սովից ստիպուած յուսահատութեամբ կ'որոշի անձնատուր լինել բռնաւոր Իւսուֆին: Նախարարները Հեռացած են նրանից, ամբողջ Արարատը սնտէր անտիրական ընկած, Իւսուֆի հրոսակները կրակ և մոխիր են դարձնում ամեն ինչ, իսկ ես՝ ստոր դաւաճանս, փոխանակ օրինական թագաւորին պաշտպանելու՝ ինքս նրա գէմ եմ զինուել: Ի՞նչ պիտի տայ փոխարէնը Իւսուֆը — ոչինչ: Ես համոզուած եմ, որ նա վաղ թէ ուշ ինձ էլ կը շղթայի ամուր շղթաներով և ամենասոսկալի տանջանքներ տալով կը սպանի ինձ: Ձէ, պէտք է շուտով ազատուել նրանից և դառնալ իմ աշխարհը, այդ է պահանջում իմ ապահովութիւնը...

Եւ նա աննկատելի կերպով մտաւ իւր բանակը, ուր մի վրանի առաջ նստած էին զինուորները և կամացուկ խօսում էին:

— Ո՞ւր է Գաւիթը, մէթէ նա սպանուած է. հարցնում էր մէկը:

— Ձէ, նա առաւօտից չկար, ինչպէս երևում է նա փախել է բանակից:

— Շատ լաւ էլ արել է, թէնչ կը վայելի մեզ հայոց թագաւորի գէմ կռուել, տեսար, թէ որպիսի քաջութեամբ էին կռվում նրանք և ինչպէս կոտորեցին Իւսուֆի զինուորներին:

— Արդարադատ Աստուած միշտ ճշմարտի կողմը կը լինի. բայց տեսար, Թէոս. երբ մեր գունդը առաջ գնաց, նրանք պակասեցրին իրանց նետերի արձակելը, կարծես մեզ խնայում էին:

— Հա՛, ես լսեցի ինչպէս մէկը գոռում էր պարսպից՝ փախէք, փախէք, թէ չէ ձեզ էլ կը կոտորենք, և նա ահագին պարսաքարը ձեռքին կարծես խնայում էր ձգելու: Ես նայեցի նրան, Հեռուից այդ զինուորը շատ նման էր մեր զինակից Գաւթին, կարծես իսկը նա լինէր...

Այդ միջոցին նկատեցին զինուորները Գագիկին և լռելով իսկոյն ոտքի կանգնեցան: Գագիկը, որ մինչև այդ ժամանակ լուռ լսում էր նրանց, շարժուեցաւ տեղից և աւելի յուսահատ գէպի իւր վրանը գնաց:

Պ.

Բոլորեց ամառն ու աշունը և եկաւ ցուրտ ձմեռը, այն ինչ դեռ պաշարուած էր Կապոյտ բերդը Իւսուֆի հրոսակներից: Ամեն անգամ քանի յարձակում էին գործում նրանք,

մեծ կորուստով էին դառնում ու Իւսուֆը յուսահատուած այնպիսի պինդ օղակով շղթայեց Կապոյտ բերդը, որ ոչ մի մարդ չէր կարող անցնել այդ շղթայից: Նա ուզեցաւ սովով նեղել Սմբատին: Եւ յիբաւի Սմբատի պաշարը հատել էր: Յուսահատուած մտածում էր Սմբատը իւր դրուժեանն, իւր աշխարհի վրայ և դառն կերպով հառաչում: Նա տեսնում էր քրիստոնէից կոտորածը, նա տեսնում էր իւր քաջերի արիութիւնը և վեհանձնութիւնը, որոնք սովից հալածած դեռ առիւծների քաջութիւն էին ցոյց տալիս և նրա սիրտը կսկծում էր: Խորին վիշտը կեղեքում էր բարեպաշտ թագաւորի սիրտը և դառն մտատանջութիւնները մաշում նրան: Նա զգում էր, որ Իւսուֆը միայն իւր արեանն էր կարօտ, այն ինչ այստեղ զուր թափվում էր հայոց արիւնը և զուր, բոլորովին զուր հալումաշ էին լինում իւր քաջերը, որոնք մինչև իրանց վերջին կաթիլը կը դնէին իրանց թագաւորի համար:

Սմբատն արդէն վճռել էր անձնատուր լինել Իւսուֆին խնայելով իւր քաջերի և քրիստոնէից արիւնը, երբ նրան ներկայացաւ Դաւիթ զինուորը:

— Ես պատրաստ եմ, տէր արքայ, ճշել

թշնամեաց բանակը և ուտեստ հասցնել բերդին:

Սմբատը վեր բարձրացրեց իւր յուսահատութեամբ լի աչքերը և նայեց Դաւթին, մի տեսակ ժպիտ անցաւ նրա թալկացած դէմքի վրայ, որ և ուրախութիւն էր նշանակում և տխրութիւն:

— Գնա՛, որդիս, դու մխիթարեցիք ինձ:

Եւ Դաւիթը խոր գլուխ տալով հեռացաւ արքայից, որի աչքերի մէջ այժմ փայլատակում էին ուրախութեան արցունքներ:

Ձմեռային մի մուժ գիշեր էր: Գորշ ամպերը ծածկել էին երկինքը և խորին խաւարը տիրում էր ամեն տեղ: Կապոյտ բերդի շրջակայքը ծածկուած էր թանձր ձիւնով, ուր ամեն ինչ մեռած էր և ոչ մի կենդանութեան նշոյլ չէր երևում: Երբեմն երբեմն միայն պարսպի շուրջը փչում էր ցուրտ քամին և սուլելով անցնում հեռու և հեռու: Այդ միջոցին մօտ տասն և հինգ մարդ դուրս գալով բերդի դռներից զգուշութեամբ սկսեցին առաջ անցնել: Նրանք ամենքն էլ զինուորուած էին նիզակներով, վահաններով և սրերով:

Յուրտ քամին սուլելով շուրջ և իւր գաթան ցրտութեամբ համբուրեց նրանց, բայց նրանք բանի տեղ չդնելով դրան լուռ առաջ

էին անցնում: Խմբի առաջ գնում էր մի մարդ բարձրահասակ և վիթխարի տեսքով, որ ամենայն զգուշութեամբ աջ ու ձախ էր նայում: Յանկարծ հեռուից ճրագների նման փայլուն կէտեր երևացին, որոնք հետզհետէ մօտենում էին իրանց: Ս. աջնորդը վաղուց նկատել էր այդ, բայց լուռ էր, այն ինչ այդ ժամանակ ընկերներից մէկը նկատելով այդ սասաց.

— Դաւիթ, տեսնո՞ւմ ես հեռուում ճրագների փայլիմունքը, գրանք մեզ վրայ են գալիս:

— Հա, գիտեմ, վաղուց եմ նկատել, բայց ցաւում եմ, որ մեր առաջին արշաւանքը փոխանակ Իւսուֆի զինուորների վրայ լինելու, ստիպուած ենք գալլերի հետ կռիւ տալ:

Ս. յդ միջոցին զայլերի խումբը թուով տասը-տասներկու հատ իրանց ունոցով շրջապատեցին մեր խմբին, որ քառանկիւնի կանգնելով, սկսեց լետ մղել նոցա:

— Տղերք, այսպէս բան չի լինի, հանաք անելու ժամանակ չէ, սրանց պէտք է վերջ տալ, սասց Դաւիթը և հրամայեց յարձակուել գալլերի վրայ: Մի վայրկենում գալլերի հետքն էլ չմնաց...

Սպա անցաւ առաջ և հեռուում երևաց

Կապույտ բերդի մօտակայ գիւղերից մէկը: Ս. յ բերդի մերձաւոր բլուր գիւղերում գտնուում էր Իւսուֆի զօրքը, ուր տեղափոխուել էր ձմեռը:

Երբ մօտեցան գիւղին, Դաւիթը հրամայեց իւր ընկերներին թաքնուել թմբի տակ, իսկ ինքը միայնակ մտաւ գիւղը լրտեսելու:

Զգուշութեամբ նա առաջ անցաւ և ապա կանգ առաւ մի դռան առաջ, որտեղից լսվում էին երգի և ուրախութեան ձայներ: Կատուի դիւրաշարժութեամբ նա մագլցեց ցանկապտտը և մտաւ բակը և ապա նայելով դռան ճեղքից տեսաւ զինուորներ, որոնցից մի քանիսը կրակի շուրջը նստած խորովում էին մի ոչխար, իսկ միւսները կրակից հեռու փափուկ բարձերի վրայ նստած ծափ էին տալիս և խաղացնում մի քանի մերկ կանանց: Վայրենի կիրքը փայլում էր նրանց դէմքերի վրայ, այն ինչ խեղճ կամայք յոգնածութիւնից հագիւ շարժում էին իրանց ոտքերը:

Դաւիթը սոսկաց, նրա մագերը փշաքաղուեցան և նա ձեռքը տանելով դէպի սուրը ուզեցաւ աքացի տալ դռանը և ներս մտնել, բայց խոհեմութեամբ զսպեց իրան: Նա համարեց զինուորներին, որոնց թիւը քսան և հինգ երևաց իրան, իսկ կանայք և հարսները

վեց հոգի: Հայ հարսներ էին դրանք...

Զգուշութեամբ յետ քաշուեց Դաւիթը և հասնելով իւր ընկերներին պատմեց տեսարանը ու նրանք երկուսի բաժանուելով մի խումբը կանգ առաւ դռների մօտ, իսկ միւս խումբը ուժգին աքացի տուեց սենեակի դռանը և ահագին աղմուկ հանելով յանկարծակի վրայ ընկան արաբ զինուորների վրայ և սկսան իրանց սրերով նրանց մէկը միւսի ետևից կոտորել ու երբ վերջացրին կոտորածը, Դաւիթը կանչեց.

— Փառք Աստուծոյ, հետքն էլ չմնաց. այստեղ բաւականին պաշար կայ, որ շտապով բերդը պէտք է տեղափոխել. ասաց նա և որքան հնարաւոր էր վերցնելով պաշարը քաշուեցան բերդը:

Փոքրիկ արշաւանքներն էլ ոչինչ օգնութիւն չէին տալիս բերդականներին և Սմբատը յուսահատուած անձնատուր եղաւ Իւսուֆին, խօսք առնելով Իւսուֆից, որ իւր և բերդականների կեանքը խնայէ:

Իւսուֆը խոստացաւ և Կապոյտ բերդը մի տարի պաշարում կրելուց յետոյ յանձնուեցաւ Իւսուֆին: Իւսուֆը դրժեց իւր խօսքը և կարճ ժամանակից յետոյ Սմբատին շղթայեց, իսկ բերդականներից շատերին գերի տարաւ:

Գերի չմնաց միմիայն Դաւիթը իւր մի քանի ընկերներով, որ հայոց թագաւորին կորցնելուց յետոյ քաշուեց լեռները և օր աւուր սպասում էր արաբաց ժանտախտին՝ քաջ Աշոտ երկաթին...

Ե.

Հինգ ձիաւոր իրանց երեսները դէպի Վասպուրական դարձրած սրարշաւ առաջ էին գնում: Քափ ու քրտնքի մէջ կորած էին նրանց ձիերը, երևում էր, որ նրանք հեռու տեղից էին գալիս և ոչ մի տեղ դադար չէին տուել ձիերին, որոնք մտրակների հարուածներից ստիպուած հագիւ հազ փոխում էին իրանց ոտքերը: Զիաւորները նկատում էին այդ, բայց կրկին անհամբերութեամբ քշում էին ձիերին: Զիաւորներից երկուսը գնում էին կողք կողքի, իսկ երեքը մի փոքր տարածութեամբ հեռու հետևում էին նրանց թթուած և տխուր դէմքով. գրանք առաջ գնացող երկու հայ նախարարների ծառաներն էին, որոնք երկար ճանապարհորդութիւնից յոգնած ոչ մի խօսք չէին արտասանում: Լուռ էին նոյնպէս իշխանները, երկու եղբարք Գագիկ և Գուրգէն

Արծրունիք, որոնք Իւսուֆից խոստովելով փախչում էին իրանց աշխարհը՝ Վասպուրահան:

Ել չկարողացաւ դաւաճանութեան ամօթը տանել, այլ ևս կտրեց Գագիկը Իւսուֆից օգնութիւն և բարիքներ ստանալու յոյսը և իւր անձը շտապով ուղեցաւ ազատել այն բռնակորից, որի ձեռքով վաղ թէ ուշ ինքն էլ պիտի մահանար հայոց միւս իշխանների նման: Նրանք գոնէ պատուով էին մեռնում, սուրը ձեռքին նահատակվում, առանց իրանց տոհմին ու անուանն արատ դնելու, իսկ ինքը թնչ էր անում... դաւաճանութեան և ստոր մատնութեան կնիքը դնում էր իւր վրայ: Հարկաւոր էր ուրիշ միջոցների ձեռնարկել, ուրիշ ճանապարհ ընտրել իւր նպատակին հասնելու համար, և նա Իւսուֆից յոյսը կրտրած, նրանից իւր կեանքի դէմ որոգայթներից վախեցած, իւր եղբայր Գուրգէնի հետ միասին արագութեամբ փախուստ էր տալիս դէպի Վասպուրական... Այնտեղ պէտք է բոյն դնել, կենդրոնանալ և այնտեղից դաւադրութիւններ լարել հայ իշխանների դէմ, հայոց թագաւորի դէմ և իւր սեպհական ոյժով հարթել ճանապարհը...

Բայց քանի որ չէր մտել իւր երկրի սահ-

մանները, նա երկիւղ էր կրում Իւսուֆից...

Գագիկի գլխում այդ միջոցին սարսափելի փոթորիկ կար, որ տակն ու վրայ էր անում նրա մտածութիւնները: Յանկարծ նրա մտքի մէջ վիթխարի լեռան նման կանգ էր առնում մի միտք, որ սարսուեցնում էր նրա մարմինը և փշաքաղում մազերը, նրա աչքերը դուրս էին թափվում, երեսը կարմրատակում էր, ատամները կրճտացնում և նրա մարմնով անցնում էր սառը դողը. իսկ երբ կորչում էր այդ միտքը, այն ժամանակ նրա գանգի ամբողջ ծաւալը բռնում էր մի ուրիշ միտք, որ այնպէս քաղցր, այնպէս դուրալի ազդեցութիւն էր գործում նրա վրայ, որ նրա ջղերը հանդարտվում էին, մահուան դողն անցնում էր, բարկութեան և սարսափի ներկը անյայտանում նրա երեսից և նրա դէմքի վրայ երևում էր մի տեսակ դառն, հեգնական ժպիտ... Ո՛ւմ էր հեգնում, ո՛ւմ դէմ էր այդ դառն ժպիտը արձակում այդ յայտնի չէր, միայն թէ այդ մտածելիս նրա հոգին ցնծում էր և նա աւելի շտապում էր շուտ հասնել Վասպուրական:

Ոչինչ նրա միտքը չէր գալիս, ոչ քաղցը և ոչ յոգնածութիւնը, նա ամենևին չէր էլ մտածում իւր եղբօր և ձիաւորների վրայ, ո-

րոնք բաւական տարածութեամբ յետ էին մընացել, իսկ ինքը միայնակ առաջ է անցել... Երեկոյացել էր արդէն. մութը հետզհետէ սկսում էր պատել ամեն տեղ, երբ Գազիկը մտաւ մի նեղ ձոր, ուր քարերի վրայ թռչկոտալով վազում էր լեռնային վճիտ առուակը: Գազիկի ձին տեսնելով ջուրը կանգ առաւ, խեղճ նժոյգը ծարաւ էր և սոված, նա ուզեց գոնէ իւր ծարաւը յագեցնել և ինչքան էլ որ Գազիկը քաշեց ձիու սանձը, որքան էլ մըտրակեց նրան, նա տեղից չշարժուեց: Այդ ժամանակ Գազիկը յետ նայեց և իւր ձիաւորներին պտրեց, բայց նրանցից ոչ մէկը չկար: Նա ինչ որ մըթմըթաց քթի տակ և իջաւ ձիուց: Նա քարշեց ձիուն մի կողմը և սկսեց շոյել նրա ճակատը, բայց յոգնած երիվարը ուշք չէր դարձնում նրա շոյմունքին և ագահութեամբ պրճոկում էր թարմ խոտը:

— Խեղճ ձիս, դու սովել ես, իրաւունք ունիս այս թարմ խոտը վայելելու, մինչև որ մօտակայ գիւղից քեզ համար գարի կըբերեն, ես էլ եմ սոված, վնաս չկայ, պէտք է համբերել, ամեն նեղութիւն տանել, ասում էր Գազիկը իւր ձիու հետ խօսելով և սպասելով իւր եղբօրը և ծառաներին, բայց որոնք դեռ

չկային. ինչպէս երևում է շատ յետ էին մնացել:

— Ե՛... թնչ եղան անպիտանները և թնչու նրանք այսչափ յետ մնացին, թնչ պատահեց նրանց հետ: Գուրգէնն էլ չկայ այն ինչ հետզհետէ մութը պատում է և հարկաւոր է վաղօրօք գիւղ հասնել, հանգստանալ և հանգստացնել մեր ձիերին: Փոքր ժամանակից յետոյ հասան նրան և մնացած ձիաւորները:

— Մենք մեռանք, իշխան, ասաց Գուրգէնը, մեր ձիերի մէջ էլ ոյժ չի մնացել, մի քանի քայլ անելուց յետոյ նրանք կ'ընկնեն և էլ չեն վերկենայ:

— Հա՛, բաւական տարածութիւն անցանք, մենք արդէն մօտենում ենք մեր երկրի սահմաններին, մի քանի քայլ էլ և ահա առաջներիս թմբի տակ հայոց գիւղ կայ, այդտեղ գիշերս կըմնանք, լաւ ընթրիք կ'անենք և վաղ առաւօտ կրկին ճանապարհ կ'ընկնենք:

— Սովը սպանում է ինձ, ամբողջ օր է նշխարհք չենք դրել բերաններս:

— Իէ՛հ, քայլեցէք գնանք, ժամանակ մի կորցնէք, ասաց Գազիկը և ամեն մարդ իջնելով ձիուց, սանձերը ձեռքերն առան և սկսեցին ոտքով քայլել և երբ բարձրացան ձորից, նրանց երևեցաւ մի գիւղ, որ աւելի աւերակի էր նմանում քան բնակութեան տեղի:

Երբոր մտան գիւղը, այն ժամանակ մու-
թը արգէն խտացած էր և գիշերը իւր սևա-
թոյր թւերը տարածել էր ամեն տեղ:

Ամայութիւնը և մեռելութիւնը տիրում
էր ամբողջ գիւղին, կարծես ոչ մի կենդանի
արարած չկար այդտեղ և կարծես հէնց նոր
մահաբեր փոթորիկը անցել էր այդ գիւղի վը-
րայով և ամեն ինչ խորտակելով, ոչնչացնելով
մահացրել էր նրա բնակիչներին... Երբ մեր
ձիաւորները ներս մտան գիւղը, սառը ամա-
յութեան դող պատեց նրանց մարմիններին և
նրանք չիմացան թէ ինչ անեն և որ աւե-
րակ դւանը իջնեն. ոչ մի կենդանի շունչ չգի-
մաւորեց դրանց:

Անցան աւերակ և ամայի մի քանի տնե-
րի մօտով և հեռուում նրանց երևեցաւ ճրա-
գի աղօտ լուսաւորութիւն, որը նրանց հոգի
տուեց: Նրանք անմիջապէս գէպի լոյսը գե-
մեցին և Գագիկը առաջինը մտաւ ներս, ուր
կանթեղի աղօտ լուսաւորութեան տակ, հին
չուլի վրայ նստած էր մի ծերունի: Նա այն-
քան խորասուզուած էր իւր մտքի մէջ, որ
չնկատեց անգամ Գագիկի ներս մտնելը, որ
հետաքրքրութեամբ դիտում էր նրան:

— Բարի երեկոյ, հայրիկ, ասաց Գագիկը
խրոխտ ձայնով:

Ծերունին սթափուեցաւ և իւր մեռե-
լային անշարժ աչքերը դարձնելով գէպի Գա-
գիկը, տեսաւ իւր առաջ զինուորուած մի մարդ
կանգնած, որ ըստ երևոյթին վատ տպաւո-
րութիւն թողեց նրա վրայ: Նա բարձրացրեց
իւր ձեռնափայտը, որի վրայ յենուած էր և
կարծես թէ ուզում էր խփել Գագիկին, բայց
դողդոջիւն ու թուլացած ձեռքերը չպահե-
ցին փայտը և նա ընկաւ գետին, իսկ ծերու-
կը անշարժ և սարսփահար աչքերով նայում
էր Գագիկին և երկիւղից դողում: Խեղճ ծե-
րուկ, նա դողում էր իւր կեանքի համար, այն
թշուառ կեանքի, որի ոգորմելի մնացորդները
մնացել էին նրա մաշուած ու թալկացած մարմ-
նի մէջ...

Գագիկը հասկացաւ նրան:

— Մի վախի՛ր, ծերուկ, մենք թշնամիներ
չենք:

Ծերուկը թշնամի բառը լսելով աւելի
կուչ եկաւ և յետ ու յետ գնալով կանգ առաւ
անկիւնում որտեղից իւր անշարժ հայեացքով
կրկին նայում էր Գագիկին և իւր ուղեկից-
ներին, որոնք նոր էին ներս եկել:

— Մի վախի՛ր, ծերուկ, մենք քեզ վնաս
չենք տալ, մենք միայն օթեւան ենք ուզում,
կրկնեց Գագիկը մօտենալով ծերուկին:

Բայց ծերուկը ըստ երևոյթին ոչինչ չէր
հասկանում և լուռ մնաց:

Երբոր Գագիկը տեսաւ թէ նրա բերա-
նից ոչ մի բառ չի դուրս գալիս, նա դարձաւ
գէտի իւր ձիաւորները:

— Զիերը մի տեղ տեղաւորեցէք և աշ-
խատեցէք նրանց համար խոտ գտնել, իսկ
մենք կը մնանք այս գիշեր այստեղ: Ինչպէս
երևում է ծերուկը երկիւղից սարսափահար
է եղել և մեզ էլ թշնամիների տեղ է դնում,
բայց մենք շուտով սրա լեզուն կը բանանք:

Ծառաները ձիերը կապեցին, իսկ երկուսն
սկսան գիւղի մէջ պտըտել ձիաների համար
գարի կամ դարման գտնելու. երկար որոնե-
լուց յետոյ փլատակ ախոռի տակից հանեցին
մի փոքր գարի և դարման, և ապա վերա-
դառնալով բաց արին իրանց խուրջիները,
ուր ամեն տեսակ պաշարեղէն և գինի կար:

Գագիկն ու Գուրգէնը ագահաբար վրայ
ընկան պաշարին ու գինուն, իսկ ծերուկը ա-
պուշի նման դեռ նայում էր նրանց, չհա-
մարձակուելով տեղից շարժուելու:

— Հարկաւոր է գրաւել ծերուկին և հարց-
ուփորձ անել, ասաց Գուրգէնը:

— Անպատճառ պէտք է իմանալ թէ ինչ
է պատահել այս գիւղի հետ, որ մի քանի ա-

միս առաջ այնպէս շէն վիճակի մէջ էր, պա-
տասխանեց Գագիկը և գաւաթի մէջ գինի
լցնելով դիմեց ծերուկին:

— Ծերուկ, առ մի բաժակ գինի խմի՛ր
սա քեզ կը զօրացնէ և քո փակ լեզուն կը
բանայ:

Ծերուկի աչքերի մէջ մի փայլ երևեցաւ
գինին տեսնելով, որ շատ շուտով հանգաւ,
ըստ երևոյթին նա կասկածում էր մեր հիւր-
ընկալների վրայ, բայց երբ Գագիկը զօրով
նրան բերեց իրանց մօտ նստացրեց, նա խմեց
գինին, որ ցնցեց նրա ջղերը:

— Հ՛ր, ի՛նչ է, դ՞ուր եկաւ, լա՛ն էր. առ
դարձեալ խմիր, ասաց Գագիկը դարձեալ գի-
նու գաւաթը մեկնելով նրան: Ծերուկին նո-
րից դատարկեց և հետզհետէ նրա լեզուն բա-
ցուեցաւ, որից Գագիկն իմացաւ, որ մի շա-
բաթ առաջ Իւսուֆի հրոսակները ներս խու-
ժելով գիւղը աւերակ էին դարձրել նրան,
իսկ բնակիչներից շատերին գերի էին տարել,
շատերին կոտորել: Մնացել էր ամբողջ գիւ-
ղում ինքը, այդ ծերուկը, ինչպէս գիւղի միակ
կենդանի վկան...

Ծերուկին սկսեց մանրամասնութիւնները
պատմել, այն ինչ Գագիկն ու Գուրգէնը յոգ-
նածուլթեանը չտանելով, տեղն ու տեղը մեկ-

• նուեւ էին և թուեց խրմփացնում էին:

Ծեգը բացուելուն պէս Հինգ ձիաւորները կրկին ճանապարհները շարունակեցին թողնելով ծերունուն նոյն անշարժ և պաղ դրութեան մէջ, ինչպէս պատահել էին իրանք...

2.

Կապոյտ բերդի յանձնուելուց յետոյ մի տարի էլ անցաւ: Կրկին կանաչեցան դաշտերն ու ձորերը, կրկին կենդանութիւն ստացաւ բնութիւնը, լսուեցաւ թռչունների անուշ ճուղղունը, մեղմացաւ օդը, հալուեց ձիւնն ու սառույցը և առուակներն ուրախ կրկնօցով վազեցին առաջ. բայց թնչ վիճակի մէջ էր Հայաստանը: Իւսուժը Սմբատին մի տարի Գուինի մութ ու խոնաւ բանտումը բանտարկելուց յետոյ, նորից դուրս եկաւ Գուինից իւր հրոսակներով և այժմ կանգնած էր Երընջակի*) բերդի պարիսպների տակ, չորս կողմը սփռելով ամայութիւն և կոտորած:

*) Երնջակի բերդը գտնվում է Սիւնիքում, որ շինել է Երնջիկ անունով մի կին և այնու-

Գարնանային արևը ժպտում էր ուրախ, այն ինչ Իւսուժի վրանի առաջ, ճիշտ Երնջակի մէջ պաշարուած կտրիճ հայերի հետևեալ տեսարանն էր կատարվում:

Մի խումբ զինուորների, դահիճների և Իւսուժի իշխանների առաջ կանգնած է մի մարդ զժգոյն և մեռելային դէմքով: Գլխաբաց և ոտաբոբիկ, պատառոտուն, Հին, մաշուած շորերը հազիւ ծածկում են նրա մերկ մարմինը, իսկ տեղ-տեղ երևացող մարմինը կապտացած և ուռուցորուած է: Գլխի երկար մազերը ոլորուած էին ալիքներով, իսկ թաւ մօրուսը անկարգ ծածկում էր նրա երեսը: Հասակը բարձր էր և վիթխարի, այն ինչ նիհարութիւնն այն աստիճանի էր հասած, որ կարելի էր նրան կմախքի տեղ դնել, եթէ չը լինէին երկու փայլուն աչքերը, որոնք անհուն երանութեամբ էին լցուած: Ո՞վ էր դա, որ տաժանելի վիշտը, անտանելի հոգսերը աւերել էին նրա յաղթանդամ մարմինը և միմիայն անփոփոխ թողել աչքերը, որոնք մինչև օրս փայլում էին այնպէս սիրուն, այնպէս անվր-

հետև իւր անունով կոչել թէ գաւառը և թէ բերդը: Այժմ այս բերդը կոչվում է Ալինճագալէսի, որ սահմանակից է Գողթն գաւառին:

Ինձիճեան 253.

դով, որ կարծես մարմնական բոլոր վշտերն ու հոգսերը, դառն կսկիծը և թշնամեաց արհամարանքը կապ չունենային նրա հետ...

Ի՞նչ աչքեր էին դրանք, որոնք տեսնում էին թշնամեաց արհամարհանքը, նրանց ծաղրն ու ծանակը և այնպէս անվրդով, այնպէս անխռով ու հանգիստ տանում էին արհամարելով այն, ինչ որ աշխարհային էր և անցաւոր:

Իւսուֆի կալանաւորներից էր այդ մարդը, որի դէմ վառուել էր նրա ատելութիւնը, որին ուզում էր չարաչար տանջանքներով սպանել ՚ի տես այն յամառ հայ պաշարուածների, որոնցից չկարողանալով վրէժ առնել իւր բարկութիւնը մի մարդուց էր ուզում առնել, որ անգէն և անմոռնչ կանգնած էր իւր առաջ և իւր բոլոր տանջանքները տանում էր գերմարդկային դիմացկուծեամբ:

Հայոց թագաւոր Սմբատն էր այդ նահատակը... Իահիճները մէկ մէկ յօտենում էին նրան, ծածկում նրա գլխին մի հին կոտորատուած և անպէտք կասկարանք, թքում էին երեսին և ծաղրելով ծունկ չոքելով նրա առաջ կանչում.

— Ողջո՛յն քեզ, հայոց թագաւոր:

Սպա երկաթէ գաւազաններով և խարազաններով խփում էին նրան, որից յետոյ կապ-

տացած մարմնից ծոր-ծոր գուրս էր բղխում արիւնը և կաթիլ-կաթիլ ընկնում հողի վրայ: Հողը կուլ էր տալիս արեան կաթիլները իբրև սուրբ աւանդ Սմբատ արքայից: Նահատակուողը լուռ էր և անմոռնչ. հառաչանքի և ոչ մի ձայն չէր լսվում նրա կրծքից և սոսկալի հարուածներից յառաջացած ցաւից չէր ցնցվում նրա դէմքի և ոչ մի մկանունքը:

Տեսնում էին անհաւատներն այդ անվրդովութիւնը և տանջանք տանջանքի վրայ աւելացնում, որպէս զի ուրանայ Լուսաւորչայ հաւատը և ընդունի իսլամի կրօնը: Բայց անհուն տոկունութեամբ նա տանում էր ամեն տանջանք:

Նրանցից մէկը առնելով թագաւորի թաշկինակը կոխեց նրա բերանը և ապա առնելով ճիպոտներից մէկը սկսեց այդ ճիպոտով ներս կոխել թաշկինակը դէպի երանելու որկորը, որպէս զի կտրուի նրա շունչը. բայց Սմբատ թագաւորը դեռ շնչում էր ծանր և մահաբեր շնչով և իւր մտքում աղօթք մրմնջում. այդպիսով էլ չբաւականանալով նրա վրով անցկացրին գելարանը*), ծանր բեռը դրին նրա գլխի վրայ և տասը դահիճներ սկսեցին նրան

*) Գելարանը տանջանաց գործիք է: Ծ. 4.

ինչպէս մի քար շարժել աջ ու ձախ: Այդ էլ արին, բայց նա դեռ շնչում էր, դեռ ապրում էր, կեանքի թելը դեռ չէր կտրուել և տանջանքների ընդմէջ դեռ չէր անցել:

Տեսան անհաւատները, որ դեռ կենդանութեան նշոյլ կայ նրա մէջ և գազանական վրէժխնդրութեամբ լի ջեռացրին երկաթը կըրակի վրայ, մինչև որ նա ստացաւ սպիտակ արծաթի գոյն և այն ժամանակ մօտեցնելով նրա մարմնի զանազան տեղերին սկսեցին աւելացնել նրա տանջանքները... *):

Խեղտող ճենճերային հոտը տարածուեցաւ ամեն կողմը, թանձր ծխի գոլորշիները դուրս էին ժայթքում Սմբատ թագաւորի մարմնի այն տեղերից, ուր կալչում էր տաքացրած սոսկալի ունելիքը:

Սոսկումը և զարհուրանքը պատում էր նայողին, բայց դահիճներն աւելի և աւելի խորը, մտի մէջ էին ընկղմում շիկացած երկաթը...

Վերջին անգամ բացեց Սմբատ թագաւորը իւր Աստուածային լոյսով լցուած աչքերը, վերջին մնաս բարևն ասաց հայրենիքին և

*) 2ամէտան, երես 757.

վերջին շունչը պիտի փչեր, երբ դահիճը կտրեց նրա գլուխը...

Բարկուժեան փրփուրը բերանին Իւսու-Փը Հրամայեց նրա դիակը Դուին տանել և ՚ի նախատինք քրիստոնեաների խաչել Քրիստոսի նման... Անկուշտ գազանը նրա արիւնից չէր կշտացել, նրա դիակն էլ էր ուղում անպատուել:

Է.

Կէս գիշեր էր...

Երկրիս վրայ տիրում էր խորին խաւարը: Ոչ մի շշուկ, ոչ մի ձայն չէր խանդարում մեռելային լուսթիւնը, երբ հեռուից Դուին *) քաղաքը տանող ճանապարհի վրայ երևեցան երկու ձիաւոր:

*) Ըստ Խորենացու Դուին քաղաքի Ազատ գետի վրայ հիմնարկողը եղել է Խոսրով Բ. 350 թ. Բ. յետ, որից յետոյ մայրաքաղաք դարձաւ թէ թագաւորների և թէ ոստիկանների: Մինչև 924 թիւը այդտեղ էր և հայոց կաթող. աթոռը: Դուին խօսքը պարսկերէն է և նշանակում է թլուր: Դուինի իսկական տեղը գետ յայտնի չէ

Նետի արագութեամբ դրանք առաջ էին սլանում գէպի Դուին, ուր նստած էր Իւսուֆ, առը գիշերային քամին փրփռացնում էր նրանց փեշերը և ձիաների ոտքերի տակից բարձրանում էր թանձր փոշի: Գիշերային խաւարի մէջ երկու վիթխարի հսկաների էին նմանում դրանք, որոնք արշաւելով Դուինի վրայ, կարծես ուզում էին մի ակնթարթում ոչնչացնել, լափել և հիմնալատակ անել Դուինը:

Վիթխարի հասակ ունէր ձիաւորներից մէկը, որ միւսից մի քանի քայլ առաջ էր սլանում. լայն թիկունքը, հաստ և հուժկու բազուկները մի ամբողջ բանակ կարող էին

և վեճելի է: Պէտք է ենթադրել, որ դա այժմս մի շնչին գիւղ է, որ գտնվում է Երևան բաղա-
քից գէպի հարաւ արևելք:

Հիւս. Գ. գիրք Կ. Կոստանեանցի
146—148

Դուինը միշտ ենթակայ է եղել երկրաշարժ-
ների, որից և հ. Ինճիճեանը ենթադրում է, որ կործանուած լինի բոլորովին: Դուինի տեղը այժմս որոշում է մի ձորի մէջ, որ լի է աւերակներով, ուստի սա չէ ընդունում թէ դրա տեղը այժմ գիւղ լինի:

Ինճիճեան 469:

ոչնչացնել: Թաւ սև մօրուսը պատել էր նրա գէմքը, իսկ երկու հրացայտ աչքերը փայլում էին գիշերային խաւարի մէջ ինչպէս երկու հրաբուխներ: Բարկութեան և վրէժխնդու-
թեան կատաղի կրակով լցուած էին այդ աչ-
քերը, որոնք նայողին ինչպէս մոմ էին հա-
լեցնում:

Ահագին ծանրութեամբ սուրը կախուած էր նրա մէջքին, իսկ ծանր սաղաւարտը փայ-
լում էր նրա գլխին գիշերային խաւարի մէջ: Պակաս չէր մարմնի կազմուածքով և միւս ձիաւորը, բայց նա չէր կարող համեմատուել իւր ուժով առաջնի հետ: Նա էլ սուր ունէր մէջքին և երկայն նիզակը ձեռքին անդադար խփում էր իւր ձիուն, որ ետ չմնայ առաջին ձիաւորից, որ իւր տէրն էր:

Կարճ ժամանակ անցաւ և նրանք մօտե-
ցան Դուին քաղաքին, ուր տիրում էր նոյն-
պէս մեռելային անշարժութիւնը, հեռուում միայն երևում էր Իւսուֆի պալատը և հայոց կաթողիկոսարանը: Նրանք մօտեցան Դուինին. այդ ժամանակ մի քանի շուն սկսան հաջել ձիաւորների վրայ, որոնք մի փոքր էլ առաջ գնալով իջան ձիերից և նրանց գէպի ձորը տանելով կապեցին այնտեղ, իսկ իրանք սկսան ոտքով քաղաք մտնել:

— Գու լաւ ես յիշում տեղը, հարցրեց առաջին ձիաւորը մեզ ծանօթ Գաւթին, երբ նրանք մտան լուռ փողոցները:

— Ինչպէս ցերեկուայ լոյսը, պատասխանեց Գաւթիթը:

— Իսկ համոզուած ես, որ լոյսը ամեն գիշեր իջնում էր նրա խաչուած տեղը:

— Տէր, ես ինքս աչքովս եմ տեսել, ինչպէս կարելի է չհաւատալ:

— Գէհ, ուրեմն առաջ քայլիր և ցոյց տուր տեղը:

Գաւթիթը առաջ անցաւ և մի քանի լուռ փողոցներ անցնելուց յետոյ կանգ առաւ հայոց կաթողիկոսարանի առաջ մի հրապարակի վրայ:

— Սհա այստեղ էր խաչուած հայոց թագաւոր Սմբատը, այստեղ ահա անարգում էին նրա գիակը այդ անօրէնները:

— Լաւ ընտրութիւն է. ճիշդ հայոց կաթողիկոսարանի գիմաց, ասաց Գաւթի տէրը և խոր, շատ խոր յոգոց հանեց:

— Իսկ ո՞ւր է լոյսը *), ինչո՞ւ նա չկայ:

*) Աւանդութիւն կայ որ Սմբատ արքայի խաչուած տեղը գիշերները լոյս է իջնելիս եղել, որ

— Կը լինի, գուցէ դեռ վաղ է, երկնքից լոյսն իջնում էր առ հասարակ կէս գիշերից անց:

— Լաւ ուրեմն, սպասենք:

— Բայց տես, տէր իմ, ահա լոյսն իջնում է երկնքից. տեսնո՞ւմ ես ճիշդ մեր գլխին մի տեսակ աղօտ լուսաւորութիւն է երևում, չի անցնի կարճ ժամանակ և դու կը տեսնես հրաշքը, ասաց Գաւթիթը և նայեց վեր, դէպի աստեղազարդ երկինքը, ուր յիշաւ իրանց գլխի վրայ, այնտեղ, ուր բեւեռել էր Իւսուֆը Սմբատին, երևում էր մի աղօտ լոյս, որ հետըզհետէ ընդարձակվում և պսակի կերպարանք էր ստանում:

Գաւթի տէրը ծունկ չոքեց և ձեռքերը կրծքին դրեց. նա անթարթ աչքերով սկսեց նայել լոյսին և նրա սիրտը սկսեց դողալ, այն սիրտը, որ չէր դողալ, եթէ Իւսուֆի ամբողջ բանկը իւր վրայ գար:

Պսակը հետզհետէ իջնում էր ցած, գալարվում, թռիչքներ անում վերև ու ներքև և կրկին կանգ առնում:

շատ շատերը տեսել են թէ քրիստոնեաներից և թէ անհաւատներից:

Յովհ. կաթ. Դրասխանակերտցի, ևրես

Յանկարծ Դաւթի տէրը, այն յաղթանդամ
հսկան սառուեցաւ, նրա մարմնով անցաւ մի
այնպիսի դող, որ քիչ մնաց նրա արիւնը սա-
ռեցնէր երակների մէջ և ցնդէր ուղեղը:

Նա տեսաւ իւր առաջ Սմբատ հայոց թա-
գաւորին, որ իւր գունատ և թալկացած աչ-
քերով նայում էր նրան:

Աղաչանքի և աղերսանքի հայեացք էր
այդ հայեացքը, որ ուղղած էր դէպի իշխանը,
որ ապուշ կրթած նայում էր նրան:

Այդ թալկացած և աղերսող աչքերի ետև
կարծես թագնուած լինէր վրէժխնդրութեան
և ատելութեան սարսափելի բոցը, որ դէպի
հօւր ու մօխիր էր քաջալերում:

Այդ բոցը հալում էր իշխանին, նրա դէմ-
քի մկանունքները ցնցւում էին, երեսին պա-
տում էր մեռելային գունատութիւնը, այն
ինչ նա իւր աչքերով կլանում էր Սմբատ ար-
քայի ստուերի իւրաքանչիւր շարժողութիւնը,
նրա դէմքի ամեն մի գիծը, աչքերի թափան-
ձող հայեացքը, որ վիշտ և զարհուրանք էր
պարունակում իւր մէջ...

Ստուերի հոգեկան այդ բուռն զգացմուն-
քը շատ խոր թափանձում էր իշխանի սրտում
և այնտեղ իւր աւերմունքն անում, իւր խոր
անջնջելի հետքերը թողնում: Սոսկալի էին

այդ հետքերը, զարհուրելի նրա աւերմունքը:
Նոռն կեանքով լի, անյաղթելի ուժի
տէր մարդու մարմնով կարծես բիւրաւոր մըր-
ջիւններ էին վազում, որոնք փշաքազում էին
նրա մարմինը. նա հետզհետէ կարծես սառ-
չում էր, դադարում էր կենդանական շարժու-
ղութիւնը, գիտակցութիւնը լուռւմ էր և դառ-
նում որպէս կենդանի արձան: Ի՞նչ գրութեան
մէջ էր նրա հոգին, ո՞ւր և ո՞րտեղ էր սաւառ-
նում—յայտնի չէր, միայն թէ նա տանջվում
էր, այդ երևում էր նրա դժգոյն մեռելային
դէմքից, ուր շարուել էին արտասուաց խոշոր
բայց սառն կաթիլներ... Աշխարհս գոյութիւն
չունէր նրա համար և ինքը իւր ամբողջ էու-
թեամբ ամփոփուած էր ստուերի աչքերի մէջ,
այդ էր այդ բոցէին նրա աշխարհը, որ մեծ
էր քան տիեզերքը, ահարկու և սոսկալի քան
գժոխքը: Նա հասկանում էր այդ աշխարհքը,
նա ճանաչում էր այդ աշխարհի հոգեկան վիշ-
տը—և սառսուում... Նայեց նա ստուերին,
նայեց և յանկարծ խուլ գերեզմանական ձայ-
նով ասաց.

—Երգվում եմ, հայր, որ ոչ մի բարբա-
րոս չթողնեմ Հայաստանում և քո վրէժը
տասնապատիկ առնեմ Իւսուֆի հրոսակներից:
Այդ միջոցին ստուերը ժպտաց, ուրախա-

ցաւ, մի տեսակ անհուն երանութիւն անցաւ նրա գունատ դէմքի վրայ. ապա երեքաց, ցընցուեց, հետզհետէ նօսրացաւ. լուծուեց օդի հետ և պսակի հետ միասին չքացաւ...

Տիրեց կրկին խորին խաւարը:

Վեր կացաւ իշխանը և վրէժխնդրութեամբ լի աչքերը չորս կողմը շրջեցնելով մի այնպիսի մռնչիւն արձակեց, որ կարծես սար ու ձոր դողացին:

Այդ միջոցին շտապով մօտեցաւ իշխանին Գաւթիթը և ասաց նրան.

Տէր, հինգ թէ վեց հոգի Իւսուֆի զինուորներից դէպի մեզ են գալիս, եթէ մեզ ճանաչեն, կռիւն անխուսափելի է:

— Թող գան, այդ շներին բոլորին էլ պէտք է կոտորած:

— Բայց, տէր իմ, նրանք կարող են աղմուկ հանել...

Վեց հոգուց բաղկացած խումբը սօսուցաւ նրանց և Գաւթիտէրը լանկարծակի մէկին այնպիսի աքացի տուեց, որ դիպչելով միւսին, երկուսն էլ վայր գլորուեցան: Միւսները նկատելով այդ սրերը մերկացրին:

Հսկան ժպտաց և աներկիւղ մօտենալով նրանց, նրանցից երկուսին բռունցքով այնպիսի հարուած տուեց, որ սրերը երեք գազ

ու կէս այն կողմը շարտուելով իրանք անշունչ վայր ընկան իրանց ընկերների մօտ:

Խմբից մի հոգու գլուխը Գաւթիթն էր կտրոււմ, իսկ մէկը սարսափից փախուստ էր ուզում տալ, երբ հօկան բռնելով նրան տապալեց գետին և ապա հուպ տալով որկորին գողաց խրոխտաձայն.

— Անհաւատ շուն, քեզ կենդանի եմ թողնում, որ համբաւ տանես Իւսուֆին, թէ Սշոտ Երկաթ Նահնշահ՝ Սմբատի անդրանիկը, սուրբ վրէժխնդրութեան հոգով զինուած, պիտի հալածէ Իւսուֆին և նրա հրոսակներին: Կարճ ժամանակ չի անցնի և դրանց հետքը չը պիտի գտնուի Հայաստանի մէջ:

Այդ ժամանակ զինուորը Սշոտի մատներին ճնշումից խրխուացնում էր և մօտ էր խեղդուելու:

— Հը՛, սատակո՞ւմ ես, թնչ է, ուր գնաց ձեր քաջութիւնը, որ մի մատի ոյժին էլ չէք դիմանում, ասաց Սշոտը, Սմբատ նահատակի որդին, և մի աքացի տալով նրան, դիմեց Գաւթիթին:

— Իէհ, ժամանակ է գնալու, շուտով արշալույսը կը բացուի, հասաւ ժամանակը վրէժխնդրութեան, անօրէնների հետքն անգամ չպէտք է թողնել, ասաց նա և ապա հեծնե-

լով իրանց ձիանները վրայ, երեսները շուռ
տուռն զէպի Բագրևանդ և գիշերային մթու-
թեան մէջ սլացան առաջ...

Ը.

Այժմ մի փոքր կանգ առնենք և տես-
նենք թէ ինչ դրութեան մէջ էր Հայաստա-
նը Սմբատ արքայի նահատակուելուց յետոյ և
սր էր Աշոտ Երկաթ:

Արաբաց տիրապետութեան ժամանակ
Հայաստանի մէջ գտնվում էին բազմաթիւ
մեծ և փոքր իշխանական ցեղեր, որոնցից չոր-
սը ձգտում էին առաջնակարգ դեր խաղալ
Հայաստանի մէջ: Այդ մեծ իշխանական ցեղե-
րըն էին՝ Արծրունիք, Սիւնիք, Մամիկոնեանք
և Բագրատունիք: Սրանցից երկու առաջին-
ները արդէն վաղուց ձգտում էին Հայոց թա-
գաւորութեան հասնելու, բայց իրանց ներելի
և աններելի դիմած միջոցներով աւելի գործը
փչացրին և իրանց ցանկացած նպատակին չը
հասան: Մամիկոնեանք թէև նորագոյն եկա-
մուտ նախարարութիւն էին կազմում, բայց
նրանց նպատակն էր լոկ ազգին՝ ծառայելը, ա-
մենից վեր դասելով ազգութեան շահերը քան

թէ ձգտումը դէպի թագաւորութիւն և այդ
է պատճառը որ սրանք թէ և ընդհանուր
սպարապետի պաշտօններ էին կատարում և
ոյժը իրանց ձեռքին էր, բայց չօգտուեցան
այդ ոյժից և հետզհետէ, իններորդ դարի կէ-
սին, կտրուեց նրանց շառաւիղը Գրիգոր Մա-
միկոնեանի մահուամբ:

Բագրատունեաց տոհմը, որ հանդէս եկան
Պարթևաց օրով և թագադիր ասպետութեան
պաշտօնն ունէին, հետզհետէ առաջնակարգ
դեր էին կատարում Հայոց մէջ: Սրանց միջից
դուրս եկան քաջ և իմաստուն զօրավարներ,
որոնք Բագրատունեաց անունը փառաւորեցին:
Իսկ իններորդ դարի վերջերին արդէն յաջո-
ղեցաւ Թագաւորի տիտղոս առնել (885 թ.):

Հայոց բնաւորութեան համեմատ, հէնց
որ Բագրատունիք ձեռք բերին թագաւորական
տիտղոսը, միւս նախարարներն էլ, թէ մեծ թէ
փոքր սկսան գլուխ բարձրացնել և ձգտել դէ-
պի անկախութիւն:

Արծրունիք առաջինն եղան, որ Գագիկ
Արծրունու ջանքերով ձեռք բերին և կազմե-
ցին Վասպուրականի մէջ անկախ տէրութիւն
(908 թ.): Դրանից վաթսուոն տարի յետոյ
քայքայուեց նաև Բագրատունեաց տէրութիւնը՝
որ գտնվում էր Արարատեան երկրում և Վա-

նանդ երկրում կազմեցին առանձին թագաւորութիւն Վարս մայրաքաղաքով, այն ինչ այդ միջոցներին քայքայեցաւ նաև Վասպուրականի տէրութիւնը կազմելով Ռշտունեաց և Անձևացեաց անկախ տէրութիւնները և ապա հետզհետէ Սիւնեաց, Բագրատունեաց, Կիւրիկեան թագաւորութիւն Լոռիի մէջ և բազմաթիւ մանր մունր իշխանութիւններ, որոնցից ամեն մէկը ուզում էր անկախ լինել և առանձին տէրութիւն կազմել: Անմիաբանութեան և խռովութեան հոգին բուռն կերպիւ տիրապետում էր հայերի մէջ: Յոյները և արաբները դրա որոմները միայն ցանել էին հայերի մէջ, որ այդ ժամանակները առատ հունձ էր տալիս քայքայելով իրանց ոյժերը, մէկ իշխան միւսի դէմ որոգայթներ լարելով...

Բագրատունեաց առաջին թագաւորը եղաւ Աշոտ Ա. որի մահուանից յետոյ թագաւորական գահ բարձրացաւ Սմբատը, որը երեք որդի ունէր Աշոտ, Մուշեղ և Աբաս: Սմբատի գլխաւոր ջանքը լինում է անկախ մանր տէրութիւնները միացնել իրար հետ, բայց այդ չէ յաջողվում իրան, որովհետև չարանեղ Իւսուֆը, կասկածելով Սմբատի հաւատարմութեան վրայ և նրա ուժեղանալուց վախենալով հետամուտ է լինում բռնելու նրան, բայց

Սմբատը իր որդկերանցով դիմադրում է Իւսուֆին: Սմբատի անդրանիկ որդին՝ Աշոտ և Մուշեղ Նիգ գաւառում ճակատամարտում են Իւսուֆի զինուորների հետ, ուր յաղթուելով Մուշեղ գերի է ընկնում և տարուելով Գուին՝ մահացու դեղով սպանվում է և ապա թաղվում Բագարանում *):

Այնուհետև Սմբատ արքան կապոյտ բերդում անձնատուր լինելուց յետոյ նրա երկու որդիքը՝ Աշոտ և Աբաս փախչում են Հայաստանից Իւսուֆի վրէժխնդրութիւնից վախենալով, որոնցից առաջինը գնում է Կոստանդնուպոլիս Յուսուֆի և Լեոն կայսեր մօտ, իսկ երկրորդը գնում է Վրաստան և փեսայանում վրաց թագաւորին **):

Աշոտ, որ իւր քաջապինդ արիութեան համար երկաթ մահանունն ստացաւ, որ իւր մատներով կարողանում էր երկաթը ոլորել և զարմացնել բոլորին, իւր հօր մահից յետոյ Լեոն կայսեր հրամանով դառնում է Հայաստան, անուանում իրան շահընշահ, այսինքն

*) Յովհ. կաթ. երես 122

**) Ասողիկ Տարօնեցի գ. հանդէս գլուխ գ. երես 165.

Թագաւորաց Թագաւոր, և հալածուժ արաբացիներին *):

Ահա այս դրութեան մէջ էր Հայաստանը, երբ երևաց Աշոտ Երկաթ:

Թ.

XXXX

Բագրևանդ **) գաւառում, այնտեղ, ուր սկիզբն է առնում Եփրատ գետի մի վտակը և ուր Գրիգոր Լուսաւորիչը մկրտեց Տրդատ Թագաւորին և հայերին, Նպատ լերան լանջի վրայ բարձրանում էր մի մենաստան, որ իններորդ դարու վերջին ծաղկած և փարթամ գրութեան մէջ էր գտնվում: Այդ մենաստանը, որի մէջ քառասունից աւելի կրօնաւորներ էին գտնվում, կրում էր սուրբ Գրիգոր անունը, ուր հայկական նախնական սովորութեան համեմատ ամեն մի ճանապարհորդ հասնելով այդ տեղ, յոգնած և բեզարած կանգ էր առնում և ընդունում էր վանականների լիառատ հիւրընկալութիւնը:

Դեռ շատ հին դարերում, երբ հայերի

*) Նոյն գլուխ զ. Երես 169.

**) Այժմեան Ալաշկերտի գաւառը.

մէջ չէր մտել քրիստոնէութիւնը, երբ պատում էին նրանք չասողածներին, այդ մենաստանը կրկին գոյութիւն ունէր և ծառայում էր իբրև հիւրընկալութեան կենդրոն, միայն թէ այն ժամանակ չէր կրում այդ անունը, այլ դա կոչվում էր Բագաւան, Բագնաց աւան և կամ Դից աւան: Բագաւանը այդ ժամանակ մեծ դեր էր կատարում հայոց մէջ: Այդտեղ էր գտնվում քրմապետ Մաթանի և նրա եղբօր Տիգրանի գերեզմանները, ուր գտնվում էր նաև Վանատրի հիւրընկալութեան և ամանորաբեր նոր պտղոց չաստծու բազինը: Այդ բազինը, Խորենացու աստիճամը շինել էր վերջին Տիգրան հայոց Թագաւորը, որ իւր քրմապետ եղբօր՝ Մաթանի գերեզմանի վրայ, հրամայեց բազին շինել որ դրանց մատուցած զոհերից օգտուին ամեն ճանապարհորդ և հիւրեր և ապա Վաղարշ Թագաւորը նաւասարդի առաջին օրը աշխարհախումբ տօն կարգեց այդ բազնին: Անցաւ ժամանակ. քրիստոնէութիւնը մուտ գործեց Հայաստանում և սուրբն Գրիգոր Լուսաւորիչ վերցնելով այդ կուռքը, գրա տեղ Քրիստոսի յաղթական խաչը տնկեց, բերելով այգտեղ սրբայն Յովհաննու և Աթա՛նագինէի նշխարները:

X Բայց որովհետև նաևասարդի առաջին օրը մեծ հանդէսով տօնվում էր այդ տօնը, երբ միևնոյն ժամանակ տօնվում էր նոր պըտուղների, բերրիութեան տօնը, այդ պատճառով, նոյն իսկ այդ օրը, Գրիգոր Լուսաւորիչը նշանակեց սուրբ Յովհաննու Մկրտչի և Քրիստոսի վկայի Ս.Թանազիների տօն. այդպիսով հետզհետէ մոռացութեան տրուեցան հին կուսպաշտական տօնախմբութիւնները և տեղի տրուեցան քրիստոնէական տօները:

Այդ իսկ մենաստանում *), ինչպէս ասացինք, իններորդ դարու վերջերին ապրում էր քառասնից աւելի վանական. տասներորդ դարի սկզբներին հազիւ մնացել էին մի քանի վանական և նա զրկուել էր իւր զարգարանքներից, ոսկուց և արծաթից:

Իւսուֆի հրոսակները մտնելով Բագրեւանդայ գաւառը, ամեն ինչ տակն ու վրայ

*) Արածանի գետի վրայ Նպատ սարի հիւսիսային ստորոտում կայ այժմ մի մեծ եկեղեցի Ռւչքիլիսէ անուանով, որ շինուած է է. դարում. այդ եկեղեցին կամ մենաստանը այն տեղն է, ուր եղել է հին ժամանակներում Մաթան քրմապետի գերեզմանը և Վանատրի մեհեանը, որոնց կործանելով Գրիգոր Լուսաւորիչը մատուռ շինեց և

էին արել, չինայելով անգամ այդ մենաստանին, ուր ամեն ինչ յափշտակելով սրի էին անցկացրել քառասնից աւելի վանականներ, իսկ մնացածներին փախուստ դարձրել: Սակայն վանականներից մէկը վերադառնալով վանք, ամալի պատերի մէջ շարունակում էր իւր թշուառ գոյութիւնը, ամեն ըոպէ մահուան սպասելով այն արաբ իշխանից, որը նըստած էր Բագաւանում և չորս կողմը մահ էր սպառնում:

Թերունի վանական էր այդ մենաստանի վանահայրը. քանի՛-քանի՛ թշուառութիւններ անցել էին նրա գլխով, քանի՛-քանի՛ փորձանքների էր հանդիպել նա, բայց նրա հոգու մէջ այդպիսի խոր վիշտ չէր ձգել, ինչպէս հիմա: Երբ նայում էր վանքի մերկ պատերին, զարգարանքներից զուրկ, երբ մտնում էր վանքի ամալի և դատարկ ամբարներն ու մառանները, նրա սիրտը քաղվում էր, նրա աչքերից ընկնում էին արտասուքի կաթիլներ:

Յովհաննու Մկրտչի մասունքներն ամփոփեց. այս պատճառով Իւչքիլիսէն կոչվում է և Բագրեւանդայ սուրբ Յովհաննէս և մինչև հիմա էլ մեծ ուխտատեղի է:

Հիւս. Կ. Կոստանեանի 91—92.

Մարտիրոս էր այդ ծերունի վանահօր
անունը, որ իւր ընկերակիցներին կոտորուած-
քից յետոյ, դեռ մի քանի ամիս չկար ինչ վե-
րագարձել էր վանքը, իւր մի քանի ծառա-
ներով:

Երեկոյեան դէմ էր: Սրևը նոր հանգիստ
էր առնում Սուկաւ կամ Զրաբաշխ լեռների
կատարներին, երբ Մարտիրոսը լուռ շրջում
էր վանքի գաւթում և երբեմն նայում հո-
րիզոնին, ուր մտնում էր արևը իւր ետևից
թողնելով կարմրածիրանագոյն շերտեր... Ծա-
ռաներից երկուսն էլ մտախոհ նստած էին մի
քարի վրայ և մի ինչ որ խօսում էին:

— Տղերք, դարձաւ նրանց վանահայրը,
դռները պինդ փակեցէք և ոչ ոքի ալլաւս ներս
չթողնէք, արևը արդէն մայր մտաւ և շու-
տով խաւարը կըտիրի:

— Պարսպի բոլոր դռները պինդ են փա-
կուած, հայր սուրբ, ասաց ծառաներից մէկը
ոտքի կանգնելով:

— Իսկ նիգերն ամրացած են:

— Այո, այնքան ամուր են, որ եթէ Իւ-
սուֆ ինքը իւր բանակով այստեղ գայ, կրկին
չի կարող ներս մտնել, ասաց հեզնութեամբ
ծառան:

— Էլ՞ մ, Իւսուֆ... հա, հիմա գայ, ինչ

պիտի տանի. ամեն բան տարաւ, ամեն ինչ
կոտորեց, էլ թնչու համար է գալիս, թնչին
են պէտք վանքի սառ քարերը, մըմրաց ինքն
իրան վանահայրը և սկսեց կրկին իւր տերո-
ղորմեան ձգել:

Սյր միջոցին լսուեցաւ վանքի պարիսպ-
ների դռան բաղխիւնը. ով որ բաղխում էր
դուռը ուժգին և շտապ հարուածներով:

Ծառաները ոտքի կանգնեցին և երկիւ-
ղից սկսան իրար երեսին նայել, այն ինչ վա-
նահայրը տեղն ու տեղը կանգ առնելով դա-
դարացրեց տէրողորմեայի համարելը և շփո-
թուած դէպի դուռը նայեց:

«Ո՞վ պիտի լինի, որ այդպէս շտապ շտապ
ծեծում է դուռը», մտածեց նա և նրա մտքի
մէջ անցաւ Բագաւան գիւղի արաբայ իշխանը
և իւր հրոսակները ու խեղճ վարդապետի մարմ-
նով սառը դող անցաւ, երբ մտաբերեց նրանց
առաջին արշաւանքը և վանքի աւերմունքը:

— Ով էլ որ լինի, լաւ բանի համար չի
լինի եկած, բայց թէ պէտք է իմանալ և ըն-
դունել. թնչից պէտք է վախենալ, քանի որ
ոչինչ չկայ վանքում կողոպտելու, իսկ իւր
կեանքի վերջին մնացորդները իրան ալլաւս
պէտք չեն:

— Տղերք, գնացէք տեսէք ով է և ինչ է

ուղում, բայց առանց իմ հրամանի դուռը չբանաք:

Ծառաները դէպի դուռը վազեցին, որ քիչ էր մնում ջարդուփուրդ էր լինում ծեծելուց: Ինչպէս երևում էր այցելուն շտապ գործ ունէր կամ համբերութիւն ամենեւին չունէր:

Շփոթուած վանահայրը դեռ կանգնած էր տեղն ու տեղը երբ ծառաներից մէկը դառնալով յայտնեց.

— Հայր սուրբ, վիթխարի տեսքով մի գիւղացի է դռան ետևը կանգնած և ստիպում է դուռը բանալ. նա կարևոր գործ ունի ձեզ հետ:

— Միայնակ է նա:

— Այո՛, միայնակ, ուրիշ ոչ ոքի չտեսանք հետը:

— Բայց լաւ դիտեցի՞ք շուրջը:

— Այո՛, չորս կողմը լուռութիւն է տիրում և նա միայնակ ծեծում է դուռը, եթէ չբանաք, ասում է, դուռը կը կոտրատեմ:

— Զէնք ունի՞, հարցրեց վանահայրը:

— Ոչ մի զէնք չտեսանք վրան, բայց մի այնպիսի ուժեղ բազուկներ ունի, որ հազար զէնք արժէ:

— Լաւ, ներս թողէք, բայց դռները խկոյն փակեցէք և դուք էլ զգուշ մնացէք: Ո՛վ

գիտէ ի՞նչ մարդ է, թշնամի է թէ բարեկամ. մեր ժամանակներում ամեն բանի վրայ պէտք է կասկածել, ամեն բանից պէտք է վախենալ, ասաց վանահայրը ինքն իրան և լուռ դէպի դուռը նայեց, որ ճռճաւով բացուեց և մի յաղթանդամ մարդ գիւղական հագուստով, երկար փայտը ձեռքին ներս մտաւ և ուղղակի դէպի հայր սուրբը գալով խոնարհ գլուխ տուեց նրան:

Մարտիրոս հայրը իւր փոքրիկ, բայց փայլուն աչքերը դէպի նա սևեռելով, ոտքից մինչև գլուխ զննեց նրան և ըստ երևոյթին լաւ տպաւորութիւն թողնելով իւր վրայ, մեղմ ձայնով հարցրեց.

— Ի՞նչ կը կամենայիր, որդեակ, որ այս ժամին վանքի դուռն ես ծեծում, երբ ոչ ոքի այլ ևս չենք ընդունում:

— Քո օրհնութիւնը Մարտիրոս հայր, ասաց գիւղացին և մօտենալով աջն ուղեց համբուրելու:

Վանահայրը աջը տուեց նրան և հարցրեց:

— Դու ո՞րտեղից գիտես իմ անունը:

— Բարի մարդկանց անունը միշտ ամենքը կ'իմանան, բայց ես առանձին գործ ու-

նիմ քեզ հետ, հայր սուրբ, հրամայիր ծառաներիդ հեռանալու, կամ մտնենք խուցդ:

— Գնանք, որդեակ, ասաց վանահայրը, առաջնորդելով նրան դէպի իւր խուցը և երբ նրանք միայնակ մնացին, այն ժամանակ այցելուն սկսեց իւր հարց ու փորձը:

— Հայր սուրբ, դու լաւ տեղեկութիւն կ'ունենաս Բագաւանից, թէ այնտեղ սրբան արաբաց զօրք կայ և ինչ դրուժեան մէջ են:

Հայր սուրբը աչքերը չուեց, երբ լսեց այդ հարցը:

— Ի՞նչ հարկաւոր է քեզ, որդի, անօրէններն այնքան շատ են, որ համարել չի կարելի:

— Ելի ինչքան շատ լինին, մօտաւորական թիւը քեզ յայտնի կը լինի, որովհետև նրանք քեզ մօտ են և քո ծառաները միշտ երթևեկութիւն ունին գիւղի հետ:

— Ի՞նչ ասեմ, մօտ հինգ հազարի չափ կը լինին, արոնց կէսը նստում են Բագաւանում, կէսը Վաղարշակերտում:

— Հ՛րմ... հինգ հազար... երկու հազար և հինգ հարիւր... է... հող չէ, ինքն իրան մըմըաց այցելուն:

— Ի՞նչ է որ...

— Ոչինչ, փոքր ժամանակից յետոյ դրանց

հետքն էլ չի լինի Բագաւանում:

— Ի՞նչպէս, ասաց վանահայրը և դողողուն ձեռքերով բռնեց այցելուի ձեռքը, դու ուզում ես միայնակ նրանց հետ կռիւ տալ կոտորել նրանց...

— Ձէ, ես չէ, այլ Աշոտ Երկաթ շահնշահը:

Մի ելեքտրական սարսուռ անցաւ ծերունու մարմնով, երբ լսեց Աշոտ Երկաթի անունը և նրա աչքերում փայլեց ուրախութիւն:

— Իսկ դու ո՞վ ես, որ նրանից տեղեկութիւն ունիս, ո՞ր է նա, նահատակ Սմբատի որդին:

— Ես ո՞վ եմ, ես նրա զինուոր Գաւիթն եմ, որ առաջուց եկել եմ յայտնելու քեզ, որ այս երեկոյ պատրաստ լինիս նրա վեց հարիւր քաջերին ընդունելու, որովհետև մի փոքր ժամանակ այստեղ հանգստանալուց յետոյ գիշերս պիտի յարձակում գործենք Բագաւանի վրայ, ուր վաղ առաւօտ էլ ոչ մի արաբ զինուոր չի մնայ:

— Դէհ, հայր սուրբ, ծառաներիդ հրամայիր, որ իրանց խուցը մտնեն քնելու, իսկ դռան բանալիները ինձ յանձնեն: Ժամանակ սյետք չէ կորցնել, ես գուրջ կ'երթամ շրջակայքը աչքի անցկացնելու և կտրճ ժամանա-

կից յետոյ կրկին կրգամ, ասաց Գաւթիթը և վեր կենալով տեղէն դուրս եկաւ խուցից:

Մտուարած վանահայրը չգիտէր երազ էր թէ իրողութիւն, բայց թէ նա հրամայեց բանալիները յանձնել Գաւթին և պատրաստութիւն տեսնել գիմաւորելու Աշոտ Երկաթին:

Ժ.

Գաւթիթը վանքի բանալիները գրգանը դնելով կամաց սկսեց կանաչով պատած բլրից ցած իջնել դէպի ձորը: Յուսահատ և տրտում էր նրա դէմքը: Այն մարդը, որ այնպէս աներկիւղ էր դէպի մահը, այն մարդը, որ իւր կեանքը դրել էր արդարութեան և վեհանձնութեան համար, նա որ արհամարհեց Գաւթիկ Արծրունու դափնիները իւր տիրոջ մօտ գտնուած փշի հետ, այժմս սաստիկ յուսահատուած էր և տխուր: Մի տեսակ ծանր միտք, մի տեսակ անորոշ ճնշում տակն ու վրայ էր անում նրա սիրտը և խռովում նրա հոգին: Ի՞նչ բան կրծեց նրա սիրտը, ի՞նչը վրդովեց նրա հոգին, երբ նա առաջին անգամ ոտք դրեց Բագրեանդ գաւառը, այն ինչ մինչև

այդտեղ ոտք դնելը նրա հոգու մէջ տիրապետում էր լի յոյ՛ր դէպի ապագան... Իսկ հիմա, երբ նա աչքի անցրուց այդ գաւառը, ամեն ինչ ոչնչացան, ամեն յոյսեր ջարդովիշուր եղան...

Նա իջաւ բլրից, մտաւ ձորը, նոր բլուր բարձրացաւ և կրկին նոր ձոր մտաւ, այնտեղ նա կանգ առաւ և խոր, շատ խոր ախ քաշեց, որից կարծես նրա թոքերը պատառոտուեցան և այդ արի մտրու աչքերում երևեցան արտասուքներ... Նա նայեց իւր ոտքերի տակ, ուր փռվում էր մի խումբ քարակոյտներ, որոնք ցոյց էին տալիս թէ դրանք աւերակ գիւղի հետքեր են, որտեղից անցնելով ահաւաղի փոթորիկը ամեն ինչ քանդել, ոչնչացրել է չթողնելով քար քարի վրայ... Զորի վերին կողմը միայն երևում են մի քանի ողկոյզի որթեր, որոնք բաղդի բերմամբ ազատ մնալով փոթորիկի մահաբեր շնչից, նոր ծաղկել էին, արձակելով թարմ քնքոյշ տերևներ...

Բայց ո՞ւր են դրա բնակիչները, ի՞նչ եղան, աշխարհիս ո՞ր կողմը ցրուեցան, կամ կենդանի են թէ՛ մեռած, ահահարցեր, որոնք պտըտվում էին Գաւթի ուղեղի մէջ, բայց ոչ մի պատասխան չէին ստանում, ոչ մի եզրակացութեան չէին գալիս:

Գաւիթն առաջ անցաւ և կանգ առաւ մի կիսաւեր խրճիթի առաջ և երկնի շատ երկար նայեց այդ գետնի մէջ տարածուած կիսաքանդ խրճիթին: Նա ճանաչում էր այդ տունը, քանի՛ քանի՛ անգամ տունն ու դուրս էր արել այդ տան մէջ, քանի՛ անգամ սրտատրոփ մօտեցել էր այդ տանը և վայելել ուրախ և երջանիկ ժամեր: Հիմա էլ եկաւ վայելելու վաղուց սպասած ուրախ այդ ժամը, բայց թնչ տեսաւ... Առաջ այդ տան մէջ հրնչում էր ուրախ խօսակցութիւնը, շարժվում էր եռուն կեանքը, իսկ հիմա տիրում էր մեռելութիւնն ու անշարժութիւնը: Առաջ նրան զիմաւորում էին իւր նշանածի՝ Աստղիկի փափուկ բազուկները, նրա ուրախ ժպիտը, իսկ այժմ անմռունչ և սառը քարերը, որոնք մահուան չափ սարսուռ էին ազդում Գաւթի մարմնի մէջ...

Հինգ երկար և ձիգ տարիներ էին ինչ որ չէր տեսել Աստղիկին, հինգ ամբողջ տարիներ էին որ նա փափագում էր յետնել իւր Աստղիկին և այժմս երբ մօտ էր այդ րուպէն վայելելու, երբ սրտատրոփ վազում էր դէպի գիւղը գրկելու իւր նազելիին և աւետելու Աշոտ Երկաթի երեւալը, — ամեն ինչ ոչնչանում

էր և խորտակվում... Ի՞նչ այլանդակ փոփոխութիւն...:

Ո՞վ զիտէ այժմս մեռած է իւր Աստղիկը թէ կենդանի և եթէ կենդանի է ո՞ւր է նա: Ո՞ր անօրէն տաճիկ իշխանի հարէմումն է նստած կամ թնչ տաժանելի տանջանքներ է կրում նստած մութ բանտի խոնաւ յատակի վրայ: Այդ մտքերը նրան տանջում էին և անիծում էր իւր բաղդը, որ գոնէ մի կենդանի արարած չէ գտնում, որ հօրցնի գիւղի աւերման ժամանակը և նրանց բնակչաց ո՞ւր ցրուելը:

Նա փեշով սրբեց արցունքները և լուռ, քայլերն ուղղեց դէպի Բագաւան գիւղը, ուր կար շարժողութիւն և կենդանութիւն և ուր գետեղուած էին Իւսուֆ իշխանն ու արաբաց մի գունդը:

Գիշերն արդէն պատել էր, նա դեռ շատ բան ունէր կատարելու մինչև Աշոտ Երկաթի վանք ժամանելը:

Շուտով նա մտաւ գիւղը և անցնելով մի քանի փողոցներ, կանգ առաւ մի տան առաջ որտեղից լսվում էին թմբուկի և երգի ձայներ:

Այդ տունը արաբաց գնդի իշխանի տունն էր, որ ինչպէս երևում է անձնատուր էր եղել

ուրախութեան և կեր ու խումի: Ինչպէս երեւում է տան մէջ հաւաքուած էին արաբաց բոլոր մեծամեծները և անհոգ ժամանակ էին անցկացնում: Դաւիթը առաջ անցաւ և այժմ զօրքերը սկսեց լրտեսել, որոնք իրանց իշխանի օրինակին հետևելով կրկին կերուխումի և անհոգութեան էին դատապարտուած, ցրուած լինելով զանազան տներում: Դաւիթի մարմինը գողաց, գրանից լաւ ժամանակ յարձակում գործելու չէր լինի, պէտք էր շտապել հասնել վանքը, սպասել Աշոտ Երկաթին ու նա իւր ձեռնափայտը շարժելով սկսեց շտապ քայլերով առաջ գնալ, երբ նրա առաջը կտրեց զինուորներէից մէկը:

—Ո՞ւր ես վազում, այ շուն, ասաց նա բռնելով նրա օձիքից:

Դաւիթը մեքենաբար ձեռքը դէպի իւր սուրը տարաւ, որ թագնուած էր իւր շորերի տակ, բայց իսկոյն խելքը գլուխը ժողովեց որ դրանով նա ամեն բան կրփչացնի. ուստի նա գուրս պոկուելով զինուորի ձեռքից ասաց.

—Թո՛ղ ինձ, ձեր իշխանը ուղարկեց գառը բերելու, մի բռնի ինձ, թէ չէ վատ օրի կը հասնես:

—Հա՛, եթէ իշխանն է զրկել գնա, բայց միւս անգամ այդպէս մի վաղիր, թէ չէ տես-

նո՛ւմ ես այս կեռ սուրը, թափանդ վեր կածեմ:

— Ես ի՞նչ մեղ ունիմ, որ իշխանը շտապեցնում է, ասաց Դաւիթը և շտապով հեռացաւ զինուորի մօտից, ուրախանալով որ այդպէս հեշտ պրծաւ նրանից:

Շատ շուտով նա բարձրացաւ վանքը և նստելով դռների մօտ սկսեց սպասել Աշոտ Երկաթին:

Փոքր ժամանակ անցնելով, նա մթութեան մեջ նկատեց, որ վեց հարիւրի չափ զինուորներ զգուշութեամբ մօտենում էին վանքին:

Աշոտ Երկաթը ճանաչեց Դաւիթին և մօտենալով նրան կանչեց:

—Դաւիթ,

—Այտեղ եմ, տէր իմ:

—Իսկ ամեն բան պատրաստ է:

—Պատրաստ է:

—Իսկ Բագաւան գնացի՞ր, ի՞նչ կայ, ո՞րքան զօրք տեսար:

—Զօրքի թիւը երկու հազարից անց է, և յարձակում գործելու ամենայարմար ժամանակը հիմա է, երբ նրանք անձնատուր են եղած կերուխումի և ոչինչ բանի վրայ չեն մտածում բացի իրանց որովայնի:

—Լաւ ուրեմն, մի քիչ կանգ կառնենք այտեղ և իսկոյն կարշաւենք Բագրևանդի վրայ:

Նրանք ներս մտան պարիսպները և վա-
նահայրը նկատելով Աշոտ Երկաթին և իւր
եղբայր Աբասին խաչ ու խաչվառով դռնըս
եկաւ նրանց դիմաց: Ապա Աշոտ Երկաթը մը-
տաւ վանքը, ծունկ չոքեց և ջերմ սրտով ա-
ղօթեց Աստուծոյն:

Մարտիրոս վանահայրը պահպանիչ ասաց
նրանց գլխին ուր մի փոքր հանգստանալուց
յետոյ կտրիճների այգ խուճբը զգոյշ քայլերով
մօտեցաւ Բագաւան գիւղին:

ԺԱ.

Նազելի կոյսը չքնաղ գէճքով տխուր ու
տրտում կանգնած է սենեակի մէջ և իւր ար-
տասուռախառն աչքերը դարձրել է գէպի դու-
ռը: Տրտում ու տխուր է կոյսը, խորին թա-
խիծը պատել է նրա սիրուն գէճքը և տըխ-
րութեան անշուք մէքը պատել է նրա անն-
ման երեսը: Հեռու այդ քողը. ինչ մէք է, որ
պատել է նրա գէճքի ուրախ ժպտալ, ինչ ցաւ
է, որ ստիպում է նրան արցունքներ թափել,
վշտանալ, տխրել, ցաւել ու տանջուել, երբ
այդ հասակում պիտի միայն ժպտալ և ու-
րախանալ: Ո՞ր անգութ ձեռքը կաշկանդեց

նրան այդ սենեակի մէջ, ուր ամբարուած են
թանկագին կերպասներն ու օթոցները, ան-
գին զմրուխտներն ու ակները, օսկին և ար-
ծաթը, բայց ուր չկայ կապոյտ երկինքը և
ազատ անոյշ բուրմուռքով օդը... Ո՞հ, նեղ
է, շատ նեղ է այնտեղ, ուր չի լսվում թռու-
չունների անուշ ճռուղուներ, առուակի ուրախ
կրկնոցը, քամու սուգն ու շիւանքը, ամպի խաղն
ու պարը... Եւ նազելի կոյսը տրտում ու տը-
խուր էր, բանտարկուած լինելով Բագաւանի
արաբաց իշխանի՝ Ահմէդի սենեակներից մէ-
կում, ուր շրջապատուած էր աշխարհային
ամեն տեսակ բարիքներով ու վայելչութիւն-
ներով, բայց որոնք մահու չափ տխրեցնում
էին կոյսին:

Նա յիշում էր իրանց գիւղը, որտեղից
գերի էր վերցրել իրան Ահմէդը, և խոր հա-
ռաչում. նա մտաբերում էր իւր հօրն ու մօ-
րը, փոքրիկ եղբօրը և քոյրիկին, և դառն ար-
տասուռքները խեղդում էին նրան... Նա յի-
շում էր իւր փոքրիկ եղբօր ճիչն ու աղմու-
կը, մօր սրտնեղութիւնը, ապա գուրգուրմուն-
քը և նրա սիրտը յուզվում ու տակն ու վը-
րայ էր լինում, անխ, ինչպէս այն քաղցր էր,
ինչպէս անուշ, իսկ հիմա ինչպէս տանջում
են իրան այս օսկին ու արծաթը, թանկագին

կերպասն ու օթոցը, որոնցով շրջապատել է իրան Ահմէդը... Ինչպէս դառն, սոսկալի և ատելի է այն շքեղութիւնը, որի վրայ չի կրպչում մարդուս սիրտը, և ինչքան քաղցր է այն տանջաքն ու չարչարանքը, որ կրում է կամովին յանձնառու լինելուց:

Բայց կոյսը դողում է և ամեն մի փոքրիկ շշուռջ լսելիս փշաքաղվում է նրա մարմինը. նա սպասում է իւր դաժան տիրոջը, ահա ուր որ է ներս կը գայ և կը սկսուի իւր սոսկալի չարչարանքը... Բոպէներն անցնում են դանդաղ ինչպէս յաւիտենականութիւն, աշխարհս շրջեցնում է իւր անիւը, երկնքի աստղերը լուռ խոնարհվում են դէպի իրանց մուտքը, բայց դեռ Ահմէդը չկայ. քնչ կայ, ո՛ւր է նա. անի, իրանի թէ յաւիտեան չգար և կամ շուտ բացուէր արշալոյսը...

Բայց չէ, հեռուում ճրագ է երևում, այնտեղից լսվում է իւր տիրոջ խորխտ ձայնը, այնտեղ է նա, որ անձնատուր է կէր ու խուճի, չի անցնի կարճ ժամանակ և նա իւր դաժան տեսքով կը հանդիսանայ իւր առաջ: Արդէն տեսնում է թէ ինչպէս բացվում է այդ դուռը, լսում է Ահմէդի ոտքերի ձայնը, նա բաց է անում իւր սենեկի դուռը և կոյսը նա-

յելով նրա վայրենի դէմքին մի ճիչ է արձակում և փռվում է գետին...

Մտանում է Ահմէդը, իւր պիղծ ձեռքերով գրկում կոյսին, համբուրում նրա մարմարիօնի նման սպիտակ շրթունքները և ուշքի բերում կոյսին:

— Զարթի՛ր, նագելի կոյս, Եդեմի անմահ վարդ, ասում է նա ծունկ չոքած նրա ոտքերի տակ և շփում է նրա երեսը մի ինչ որ անուշահոտ ջրով:

Կոյսը բաց է անում իւր աչքերը և նայում է չորս կողմը. նա դեռ չի հասկանում թէ ինչ է կատարվում շուրջը. բայց երբ խելքը գլուխն է ժողովում, այն ժամանակ սառը մահուան դողը պատում է նրա մարմնին ու նա լուռ իւր հայեացքը իջեցնում է ցած:

— Իմ սիրելի, իմ անոյշ վարդ, սիրի՛ր ինձ և ապրի՛ր ինձ հետ երջանիկ կեանքով, ես քեզ թագուհու նման կը պահեմ, ադամանդներով կը շրջապատեմ ճակատդ, թանկագին բեհէդներ կը հագցնեմ քեզ, ասում է Ահմէդը բռնելով կոյսի ձեռքը, որ աշնան տերևի նման դողում է:

Կոյսը ձայն չի հանում և միայն մի խոր յոգոց է հանում:

— Թող քո անօրէն հաւատը և ընդու-

նիր մեր ճշմարիտ կրօնը, այն ժամանակ մենք երջանիկ կը լինինք քան Բաղդատի ամիրան և մեր երջանկութիւնը կ'օրհնէ մեծ մարգարէն Մահմէդը. ով կոյս, քո առաջդ եմ չօքած և քեզ եմ խնդրում, կատարիր խնդիրս և ուրացիր քո պիղծ հաւատը և սիրիր ինձ...

— Հեռացիր ինձանից, պիղծը ձեր հաւատն է, ասում է կոյսը և նրա աչքերը շանթեր են արձակում:

Ս.Հմէդը նայում է նրան, նայում և խորը մտածում. նրա հոգու մէջ կռվում են կոյսի գեղեցկութիւնը և իւր կիրքը. թնչպէս կը տանէր նա պիղծ գեաւուրի այդ խօսքերը, եթէ կաշկանդուած չլինէր նրա գեղեցկութեամբ ու նա կրկին և կրկին աղերսում է սիրել իրան և ուրանալ իւր հաւատը. այն ինչ կոյսը աւելի և աւելի ատելութիւն և արհամարանք է ցոյց տալի:

Հատնում է Ս.Հմէդի համբերութիւնը և տեսնելով որ աղերսանքն ու պաղատանքը ոչինչ ազդեցութիւն չեն ունենում կամակոր աղջկայ վրայ, հանում է սուրը և շողողացնելով կոյսի հէնց կրծքի մօտ, այնտեղ՝ ուր արագ տրոփտրոփում է նրա կուսական անմեղ սիրտը— գոռում է.

— Կամակոր աղջիկ, մինչև երբ ինձ պի-

տի տանջես, մինչև երբ ինձ պէտք է չարչարես. ասա՛, ուրանում ես հաւատդ և սիրում ինձ թէ՛ ուզում ես որ այս սուրը մղուի կրծքիդ մէջ և լերդ ու թոքդ դուրս թափի...

Տիրում է լռութիւն: Կոյսը աղօթք է մրմնջում. իսկ Ս.Հմէդը կատաղի աչքերով պատասխան սպասում. այն ինչ այդ ժամանակ դուրսը, փողոցում վայնասունի և ճչի աղմուկ է լսվում: Բայց Ս.Հմէդը ոչինչ չէ լսում, նա սպասում է պատասխանի, որ կամ սուրը մղէ նրա կուրծքը և կամ գգուի և համբուրի նրան...

— Լսում ես, թնչ եմ ասում. պատասխանիր, քո կեանքը քեզանից է կախուած, ընտրիր երկուսից մէկը կամ մահը կամ անոյշ կեանքը:

— Մահն եմ ընտրում, անօրէն գազան, շուտ վերջացրու տանջանքներս, էլ թնչու ես ուշացնում, գոռում է կոյսը և արտասուքները լիառատ գլորվում են նրա աչքերից:

— Բայց ես քեզ չեմ կարող սպանել, ով աննման հրեշտակ, սուրը մի կողմն է քաշում Ս.Հմէդը ապա ուզում է գրկել նրա նազելի մէջքը, բայց կոյսը հրում է նրան ձեռքերով և դուրս է պրծնում նրանից: Ս.Հմէդը ատաղում է, բարկութեան փրփուրը պատում

է նրա բերանը և նա կայծակի նման սուրն
առնելով վազում է կոյսի վրայ, այդ ժամա-
նակ դուռը ճարճատելով գլորվում է ցած և
երևում Աշոտ Երկաթը:

Կայծակնահարի նման կանգ է առնում
Ա.Հմէդը և նայում է իւր առաջը կանգնած
աժդահայ մարդուն, որի ձեռքին բռնած սրից
կաթկաթում է արիւնը: Ո՞վ է նա և ինչպէս
համարձակուեցաւ ներս մտնել և ո՞ւր են իւր
զինուորներն ու պահապանները, մտածում է
նա և լանկարծակի թռիչք անում դէպի Ա-
շոտ Երկաթ:

Աշոտ Երկաթը ժպտում է դառն ժպի-
տով, որից հալչում է Ա.Հմէդի մարմինը և
դեռ իւր սուրը չբարձրացած արիւնաթաթաւ
գլորվում է գետին:

Սյդ ժամանակ ներս են մտնում նաև մի
քանի հայ զինուորներ, որոնց դիմելով Աշոտ
Երկաթն ասում է.

— Բազաւանում վերջին անօրէնը սատկե-
ցաւ, ջնջուեցին նրանք, բայց լաւ ժամանակ
հասանք, մի անմեղ գոհ ազատեցինք, ասաց
նա և արիւնաթաթաւ սուրը պատեանը դրեց...

ԺԲ.

Ճիտուր է Գաւթի հոգին...

Ուրախութեան ոչ մի ժպիտ չէ փայլում
նրա երեսին, յուսոյ ոչ մի նշան չէ ուրախա-
ցնում նրան... Ամեն ինչ յուսահատ, ամեն
ինչ տխուր է նրա համար: Չկայ իւր Ասու-
ղիկը, չկայ իւր հրեշտակը:

Գնում է Գաւթի մի երիվարի վրայ նըս-
տած դէպի Վաղարշակերտ ու խոր մտածում:
Էլ ոչ մի բան նրա աչքին չէ գալիս, էլ ոչնչի
վրայ չէ մտածում, նրա մտքերը կանգ են
առել նրա գլխի մէջ և ոչինչ շարժողութիւն
չեն ցոյց տալիս, կարծես նա զրկուել է դա-
տելու ընդունակութիւնից: Նա անգիտակցօ-
րէն իջնում է ձիուց, նրա սանձը ձեռքն առ-
նում և դանդաղ քայլերով առաջ գնում: Ապա
շեղվում է ճանապարհից և սկսում է ծաղիկ-
ներով ծածկուած դաշտի միջով քայլել, նա
պոկում է դաշտի ծաղիկները, մէկ-մէկ ուշա-
դրութեամբ դիտում, գլուխը շարժում և ապա
միատեղ ժողովելով մի փունջ կազմում: Ո՞ւմ
համար է կազմում երփներանգ ծաղիկների այդ
փունջը, որի գլուխը պիտի պսակի դաշտի այդ
ծաղիկներով, — յայտնի չէ:

Պոկեց նա մի ծաղիկ, որ արեան գոյն ունէր և խոր յոգոց քաշեց այդ ծաղիկի անունը մտաբերելով: «Յօթն եղբօր կռան արիւն» էր կոչվում այդ ծաղիկը, այդ ասել էր իրան իւր Աստղիկը, որ այժմս չկար: Յօթն եղբայր արիւն էին թափել և այդ թափած արիւնից գոյացել էր այդ ծաղիկը, որ այնպէս սիրուն, այնպէս քնքոյշ ծաղկում էր դաշտի մէջ:

Իսկ թնչ եղաւ իւր Աստղիկը, արդեօք նա էլ թողել է մի յիշատակ, մի ծաղիկ և ո՞րն է այդ ծաղիկը. անշուշտ նա կարմիր արեան գոյն չի ունենայ, այլ սպիտակ, որ նշան է անմեղութեան: Անմեղութեամբ, անարատութեամբ նա երկինք կը լինի գնացած իւր յիշատակը թողնելով մի սպիտակ ծաղիկ, որ ինքը քաղի, հոտոտի և իւր կարօտը առնի...

Նա պտրտում է, պոկում է զանազան տեսակ սպիտակ ծաղիկներ, հոտոտում է նրանց, բայց ոչ մէկը նրան գուր չէ գալիս, և սրտնեղած դէն է շարտում այդ ծաղիկները և յօնքերը կիտած շտապեցնում իւր քայլերը:

Նա մինչև անգամ չի նկատում թէ ինչպէս հետզհետէ ծածկում է խաւարը և թէ

ինչպէս հեռում, լեռների քամակին կամաց-կամաց ծածկվում է բարակ եղջերաձև լուսինը... Օգը հետզհետէ սկսում է ցրտել, լռում է թռչունների ուրախ կրկնոցը, բզեզների և մըջիւնների աղմուկն ու ժվոցը: Կենդանական թագաւորութիւնը լռում է, բուսականը հանգիստ քուն մտնում, երկինքը վառում իւր ճրագները...

Յանկարծ Կաւիթը կանգ առաւ, իւր առաջը խոխոջալով անցնում էր լեռնային մի վտակ, որ գոռում ու գոչում էր, ուժգնութեամբ դիպչում էր ժայռի կրճքին, փրփրում ու վազում առաջ: Կաւիթը գլուխը վեր բարձրացրեց և մի տեսակ դող անցաւ նրա մարմնով. այդ ո՞ւր էր հասել և ո՞ւր էր Աշոտ Երկաթ իւր խմբով, որոնց հետ նա միասին գնում էր տակնուվրայ անելու Վաղարշակերտը...

— Է... հէ... այ քեզ թնչ է նշանակում մտքի հետ ընկնել, մրմռաց ինքն իրան, նորից ձի հեծաւ և դէպի գետի հակառակ ուղղութիւնը քշեց, առանց իմանալու թէ ուր պիտի դուրս գայ:

— Էհ, հոգ չէ, որ ես յետ մնացի, թնչին եմ պէտք ես Աշոտ Երկաթին: Աստուած Հայաստանին մի այնպիսի առիւծ է շնորհել, որի առաջ ոչ մի արգելք չի դիմանայ: Խեղճ Իւ-

սուփ, Սմբատ արքային նահատակեց և կարծեց թէ Հայաստանին տէր դարձաւ, մոռանալով, որ նրա կորիւնը կարող է նրանից վրէժ առնել: Այդպէս էլ պէտք է, մինչև երբ այդ անիծուածները մեր արիւնը խմեն. վերջապէս մի օր հանգստութիւն է պէտք մեզ. այս քն է մեր օրը՝ որդին հօրը չէ գտնում, մարդը կնոջը, երէկուայ շէն գիւղը աւերակ, վանքերը քանդուած, եկեղեցիք պղծուած, խաչերն անպատուած... Էլ Հայաստանում չմնացին սիրուն հարսներ ու կոյսեր, ամենքին գեւրի տարան: Ամենքին, տարան, ամենքին... Աստղիկին էլ... Այդպէս մտածում էր նա, երբ հեռուում, մացառների և թփերի միջից երեւացող ընդհատուող կրակի բոցը նրա ուշքը գրաւեց:

Կրակի բոցը երբեմն երևում և երբեմն հանգչում էր: Դաւիթը կանգնեցրեց ձիուն, սկսեց ուշադրութեամբ գէպի այդ լոյսը նայել: Ի՞նչ լոյս էր այդ լոյսը, քաջքերն էին վառել թէ մարդիկ, և եթէ մարդիկ, այդ գիշերուան պահուն քն էին շինում այդտեղ և ովքեր էին դրանք: Մի շարք հարցեր, որ կաթալի արագութեամբ անցան նրա մտքով: Նախ վախեցաւ քաջքերից ու երեսը խաչ քաշեց, բայց լոյսը կրկին երևում էր, խաչ քաշելը չօգնեց

նրան, ուստի համոզուեց որ այդ լոյս լառաջացնողը մարդիկ են և հետաքրքրուեց իմանալու թէ ինչ մարդիկ են դրանք: Զգուշութեամբ ձին առաջ քշեց և մի քանի րոպէում մօտեցաւ լոյսին: Նա տեսաւ այդտեղ կրակի շուրջը բոլորուած մի ամբողջ ընտանիք, բաղկացած կանանցից, մարդկանցից, աղջկերանցից և երեխաներից, որոնք տեսնելով իրանց առաջ զրահաւորուած ձիաւոր մարդուն, սարսափահար լետ ու լետ գնացին:

—Մի վախէք, ասաց Դաւիթը ցած թըռչելով ձիից, ես ձեր թշնամին չեմ, այլ բարեկամը:

Հասակաւորները դեռ զարմացմամբ շինտում էին Դաւիթին, որ ձին թողնելով արածելու, ինքը մեկնուեցաւ կրակի մօտ և նրանց դառնալով ասաց.

—Ինչպէս երևում է, դուք փախուստ էք տալիս Իւսուփի զինուորներից. վնաս չկայ, շուտով այդ ժամանակը կանցնի և ամենքդ հանգիստ ձեր տեղերը կը դառնաք:

—Հն, դուրբան լինինք քեզ, մեր գիւղը տափնուվրայ արին այդ անօրէնները և մենք լեռներում ենք ապաստանվում, ասաց ընտանիքի ամենահասակաւորը, որ մօտ վաթսուն տարեկան ժիր տղամարդ էր:

—Ո՞ր գիւղիցն էք դուք:

—Բերդկունք գիւղիցն ենք:

Բերդկունք, ասաց Դաւիթը և նրա սիրտըն սկսեց սաստիկ տրոփալ, այդ գիւղը մօտ էր իւր Աստղիկի գիւղին Արծալին:

—Իսկ ինչ տեղեկութիւն ունիք Արծալից, ճանաչում էիք դուք ծերունի Մաթոսին, նրա աղջկան Աստղիկին, շտապով հարցրեց Դաւիթը և անհանգստութիւնը տիրեց հոգուն:

—Է՛... բարեկամ, թնչպէս չէի ճանաչում, երկու գիւղն էլ մի քանի ամիս առաջ կործանուեցան, խեղճ Մաթոսին իմ աչքերի առաջ արիւնջուայ արին, իսկ թէ յետոյ ուր փախան նրանք, ես չգիտեմ: Մենք իրարից բաժանուեցինք լեռներում և նա Աստղիկի հետ ուրիշ կողմը գնաց...

—Վայ, անօրէններ, ուրեմն նա դեռ կենդանի է և այդ անօրէնների՞ ձեռքում, խօսքը կտրեց Դաւիթը ու վեր թռաւ տեղից:

Խօսակիցը երկիւղից կուչ եկաւ, չհասկանալով թէ թնչ է կատարվում Դաւիթի հետ:

—Ո՞ր կողմը տարան, և ո՞ւր է Աստղիկը, ի սէր Աստուծոյ, ասացէք ինձ, ես նրա նշանածն եմ, Դաւիթ Գնունի, Աշոտ Երկաթի գինուորը:

—Իմ քեռորդի՛ն, գոչեց յանկարծ ծերունին և փաթաթուեցաւ Դաւիթի վզով:

—Ի՞նչպէս, մթթէ դու էս Կարօն, օ, ասա, Կարօ ջան, ասա, ո՞ւր է Աստղիկս:

—Ի՞նչ ասեմ, որդիս, թէ ուր տարան նրան անօրէնները: Հաւանական է, որ նա մի որ և է արաբ իշխանի ստրկուհի լինի դարձած և կամ սպանած լինին նրան...

—Ձէ՛, ես պիտի փնտրեմ նրան, ես պիտի գտնեմ նրան, իսկ եթէ չգտայ, վայ Իսսուֆին, վայ նրա բանակին, կատաղաբար գոչեց Դաւիթը, նորից ձի հեծաւ, մտրակեց նրան և անյայտացաւ խաւարի մէջ...

ԺԳ.

Սոված և ծարաւ ուրուրի նման սլանում էր Աշոտ Երկաթը իւր խմբով դէպի առաջ և որս փնտրում... Նա ծարաւի էր արեան, արիւն էր ուզում, անհաւատների արիւն, որ յազեցնէր իւր ծարաւի սիրտը, հանգցնէր վրէժըն ու բարկութիւնը... Օ՛... սոսկալի էր նա, զարհուրելի էր նրա վրէժխնդրութիւնը: Ո՞վ կը դիմանայ սոսկալի մրրկին, ահեղ փոթորկին. նրա աչքերից կրակ ու հուր էր ցայտում,

նրա հայեացքից սարեր ու քարեր հալչում... Գնում է նա առաջ, ամպի նման փոշին նրա ձիու սմբակների տակից երկինք է բարձրանում:

Գողում է երկիրը, առուն լուում է, թըռչունները երկիւղից պահվում ու դիւցազնին նայում... Գողում է Աշոտ, սուրը պատենից հանում և սլանում առաջ: Այո, նրան միշտ քաջալերում է իւր հօր ստուերը նա միշտ իւր հետն է, գիշեր թէ ցերեկ, և նա նայում է իւր առաջ, օդի մէջ և տեսնում է նրան, իւր հօրը, Սմբատ արքայի թալկացած աչքեր, որոնք դէպի վրէժ են մղում: Նա նայում է նրան և նրա մարմինը գողում է, ատամները կրճտացնում է, մազերը փշաքաղվում և ապա մի այնպիսի մռնչիւն է արձակում, որ սար ու ձոր գողում է, քարերը լեզու են առնում և գողում՝ «եկաւ հա եկաւ, Աշոտ Երկաթը եկաւ» լսում են Իւսուֆի իշխաններն ու զինուորները և լեղապատառ լինում, մահուան գունատութիւնը պատում է նրանց դէմքերը... Իւր քաջերով մտնում է նա Վաղարշակերտ, արարները երկիւղից փախուստ են տալիս, իսկ մի քանիսը զէնքի վազում: Աշոտը ժպտում է. գառն և սոսկալի է այդ ժպիտը, որի ազդեցութեան տակ գողում են անհաւատները և

սրերը գլորում քաջի ոտքերի տակ և գթութիւն խնդրում: Բայց չկայ գթութիւն, չկայ թողութիւն, քաջի սիրտը լեռ քարի նման կարծր է ու ամուր, այնտեղ չի շարժվում գութի ոչ մի թել, այնտեղ չի հասնում աղերսանքի և լացի ոչ մի ձայն: Անզգայ է նա. արիւն, արիւն է ուզում, նրա սիրտը կրակ է ընկած և լափվում է բոցերով, անհաւատների արիւնն ու տանջանքը միայն սփոփում են նրան ու ամոքում նրա սիրտը...

Թէև նա հրամայում է նոյն տանջանքներով տանջել անհաւատներին, ինչով նրանք տանջել են հայերին և դրանով էլ չբաւականանալով հրամայում է տիկեր շինել նրանց կաշուից և պարսպի վրայ կախել...

Մաքրվում է Բագրեանդի գաւառը անհաւատներից և նա թռչում է Միրակ: Այնտեղ էլ հուր և մոխիր է դարձնում, կոտորում, ջնջում Իւսուֆի հրոսակներին... Ապա թռչում է իւր աշխարհի չորս կողմը, աջ ու ձախ մահ սփռում և հալածում թշնամիներին: Կարճ ժամանակ է անցնում և իւր երկրի բոլոր բերդերն ու քաղաքներն առնում է անօրէնների ձեռքից, թշնամիների հետքն անգամ չթողնելով այնտեղ:

Ազատ շունչ են քաշում հայերը և օրհ-

նում զիւցազնին: Եկեղեցիների և վանքերի մէջ սկսվում են ժամերգութիւններն ու պատարագը, սրբոց պատկերների խնկարչութիւնն ու շարականների անուշ երգեցողութիւնը...

Բայց Աշոտ դեռ ծարաւի է, վրէժխնդրութեան հուրը դեռ չէ շիջել, նա սլանում է իւր երկրի սահմաններից դուրս դէպի Գուգարաց աշխարհը, որտեղից հալածելով թշնամիներին Գնթունեաց երկու եղբայրներին՝ Վասակին և Աշոտին կառավարիչ է կարգում, ապա սլանում է դէպի Տփլիս, ուր զինուորների մեծ բազմութիւն նախարարների հետ միասին հանգիստ անց էին կացնում իրանց օրերը:

Նախարարներին երկաթէ շղթաներով շղթայելով բանտարկում է, որպէս զի կարողանայ փոխանակել հայոց գերիների հետ ապա դիմում է Ուտի, վերակացու կարգելով քաջ և վիթխարի Մովսէսին ու դառնում է Տաշրաց գաւառը:

ԺԴ.

Տաշիր կամ Տաշրաց գաւառը այլպէս կոչվում է Լոռի, ուր կանգ առաւ Աշոտ Երկաթը: Բնութիւնից հրաշայէս վարձատրուած երկիր է Լոռին իւր կանաչապատ լեռներով, գոյնզգոյն ծաղիկներով զարդարուած դաշտերով ու մարգագետիններով և անուշահամ աղբիւրներով:

Մի կողմից ձգվում են վիթխարի լեռների շարքերը, որոնց ստորոտների տակ տարածվում է ընդարձակ դաշտավայրը: Սյդ ընդարձակ դաշտավայրի միջով ձգվում է մի խոր ձոր, որի միջով անցնում է Լոռուայ մի գետակը և դաշտավայրը երկու կէս անում:

Սլժմեան Զալալօղլիից ցած, դէպի հիւսիս-արևելք, երեք թէ չորս վերստ հեռու Զալալօղլուց, խոր ձորի գլխին այժմս էլ երևում են կիսաքանդ պարիսպների փշրանքները, որոնք չիշեցնում են հին հին, անցած գնացած ժամանակի բերդի լիշատակները:

Իաշտի կողմից ձգվում են բերդի հաստ ու պինդ պարիսպները, այն ինչ երեք կողմից կազմում են դրա սահմանը խոր և ահռելի ձորերը, որոնց միջով պտոյտներ անելով անցնում է գետակը և փրփրալով և քսուելով ցից

ցից ժայռերին լիզում է բերդի պարիսպների տակ գտնուած յաւիտենական Հիմքերին և երեսը դարձնելով դրանից, գլուխն առնում է և առանց մնաս բարև ասելու կորչում հեռու և հեռու... X

Դարեր են անցել, նոյն գետակը կրկին երկիւղով մօտենում է նրան, կրկին լիզում և կրկին վազում առաջ, բայց առաջուկայ նման նա չէ գոռում, կատաղի յորձանք չէ տալիս դէպի բերդը, այլ այժմս աւելի հանգարտ, աւելի մեղմ է հոսում նրա տակով...

Ժամանակի աւերիչ հետքը դրան էլ է նիհարացրել, դրա ձայնն էլ է կտրել, այն ինչ առաջ, երբ շէն էին պարիսպները, երբ այնտեղ եռում էր կեանքը, ինքն էլ գէր էր և վարար...

Այդտեղ ահա, այդ բերդի*) մէջ կանգ էր առել Աշոտ Երկաթը իւր վեց հարիւր քաջերով, որպէսզի մի փոքր հանգիստ առնի և անելիքը մտածի:

Բայց ի՞նչ հանգստութիւն. նրա համար

*) Լօռուայ բերդի հիմնարկողը անյայտ է. վերագրում են դրա նորոգութիւնը ԺԱ գարում Գաւիթ Անհողին:

չկայ հանգստութիւն: Ամբողջ գիշեր նրա աչքին քունը մօտ չէր գալիս և նս դուրս եկաւ իւր օթեանից, շնչելու թարմ օդ: Տխուր նրստեց նա մի քարի վրայ և մտածմունքները մինը միւսի ետևից պաշարեցին նրա հոգուն:

Մի ամբողջ տարի անցաւ իւր հօր մահուանից յետոյ և այդ կարճ ժամանակում որքան փոփոխութիւն կրեց իւր աշխարհը, մի տարի սռաջ բարբարոս Իւսուֆի զինուորները կոխկռտում էին իւր երկիրը, տակն ու վրայ էին անում, մոխիր դարձնում ամեն ինչ, իսկ հիմա, այդքան կարճ ժամանակից յետոյ, նըրանց հետքն էլ չկայ...

Սուգն ու շիւանը կրկին ուրախութեան փոխուեցան, երկիրը խաղաղացաւ, լուեց հօտաղի ուրախ երգը, երկրագործի օրհնանքը... Ո՛հ, ի՞նչ բերկրանք, ի՞նչ ուրախութիւն . . . բայց արդեօք երկար պիտի տևի այս թէ նորից սև սուգը պիտի տարածուի... Ահա հարցեր, որոնք շփոթեցնում էին Աշոտ Երկաթին, որոնք ստիպում էին մտածութեան մէջ ընկնել:

Ի՞նչ պիտի անէր ինքը միայնակ, առանց օգնականի, Իւսուֆը ուր որ է պիտի նորից ողողի իւր երկիրը և այն ժամանակ ինքը միայնակ անկարող պիտի գտնուի դիմադրելու նորա անթիւ հրոսակներին:

Իսկ թնչ էին շինուած հայ նախարարները, որոնք օգնութեան ձեռք կարող էին մեկնել Իւսուֆի դէմ, նրանցից ամեն մէկը, որ մինչև Աշոտ Երկաթի քաջագործութիւնները փակուած էին իրանց բերդերում, կամաց-կամաց իջնում էին ցած մանր լարձակումներով նեղում էին Իւսուֆի գինուորներին և միմիայն իրանց երկիրը մաքրում թշնամիներից, ապա սիրտ առնելով իրանց բերդերն ամրացնում և այդ սուրը Աշոտի դէմ գարձնում:

Լուռ հետևում էր Աշոտ Երկաթը դրանց և սպասում հետևանքին, խորին թախիծը պատում էր նրա սիրտը, բայց դեռ չէր ուզում նրանց զէնքով հնազանդեցնել և ճանաչել նալ իւր գերիշխանութիւնը: Նա մտածում էր միացնել հայ նախարարութիւնը իրան հետ և այդպիսով վերջնական հարուած տալ Իւսուֆին: Բայց այդ անկարելի էր առժանակ... Մտածում էր արին Աշոտ և այդ մտածմունքների մէջ ընկղմուելով նրա քունը տարաւ: Վրդովալից էր նրա քունը, սոսկալի և դառն երազները շփոթեցնում էին նրան, այն ինչ ձորի մէջ վազող գետակը իւր օրօրն էր ասում... Նա աեսնում էր հեռու, շատ հեռու ապագան, որ պատած էր թանձր խաւարով, ուր ճչի, վայն սսուկի և աղիողորմ հեծկլտանքի ձայն-

ներ էին լսվում խաւարի միջից, ուր երբեմն երևում էին կմախքի նման մարդիկ, որոնք ուրուականների նման առաջ գալով, խաւարի միջից իրանց ձեռքերը վեր էին կարկառում, գլխով խնդրում, բայց այդ իսկ վայրկենին աներևոյթ ձեռքը սուր մանգաղով հնձում էր նրանց և նրանք դիաթաւալ ընկնում էին ցած:...

Բայց այն թնչ է, խաւարի մէջ, հեռուում, երբեմն երբեմն երևում են կրակի լեզուներ, որոնք լափում են շինութիւններ, որ կործանվում են մէկ մէկ՝ մինը միւսի ետևից, մեծերը փոքրերին հետևելով, վերջնական մի բռնակոց է լսվում, վայրկենական լոյսով լուսաւորվում է խաւար հորիզոնը, որի միջից երևում են փլատակ աշտարակների և բուրգերի մնացորդները և ապա խորին խաւարը տիրում է հորիզոնին:

Սարսափած վեր է թռչում Աշոտ Երկաթը և վայրենաբար չորս կողմը դիտում:

Գիշերն անցել էր և լոյսը բացուել, հեռու հորիզոնից ծանր կերպիւ բարձրանում էին սև կպրանման ամպեր և հետզհետէ ծածկում հորիզոնը: Ամպերի միջից լսվում էին որոտման խուլ հառաչանքները և փայլակները մէ-

կը միևսի ետևից շտապ-շտապ յաջորդում էին իրար:

Սպառնալից ամպերը հետզհետէ բարձրանում էին վեր և փոթորիկ գուշակում: Վեր կացաւ Աշոտ Երկաթը և դէպի իւր սենեակն էր ուղում գնալ, երբ տեսաւ իւր առաջը զրահաւորուած մի զինուոր կանգնած:

Աշոտ Երկաթը ժպտաց:

— Գու լաւ պահպանութիւն ես անում ինձ, Գաւիթ, ասաց նա դիմելով այդ զինուորին:

— Ես իմ պարտքս եմ կատարում:

— Ապրիս, այդպէս էլ պէտք է, երանի թէ քեզ նման պարտաճանաչ ամենքը լինէին:

ԺԵ.

Կարճ ժամանակ անցնելուց յետոյ, Աշոտ Երկաթը իւր խմբով ճանապարհ էր գնում Աղստափայի Խորաձոր ամրոցը, ուր կենդրոնացած էր թշնամու բանակը:

Լոռուայ կապոյտ երկինքն արդէն հետզհետէ ծածկում էին ամպերը, խուլ մռնչիւններն աւելի և աւելի լսելի էին լինում և մի տեսակ ծանր բայց խաղաղ օդ տիրում էր չորս կողմը: Բնութիւնը լուռ էր. ամեն ինչ

դադարել էր, ամեն շարժողութիւն կտրուել, դաշտի բոյսերն ու ծաղիկներն էլ լուռ իջեցրել էին գլխները և սպասում էին մի ինչ որ երկիւղալի բանի, որ բերում էր իւր հետ փոթորիկը: Լոռուայ խաղաղ բնութիւնը սպասում էր փոթորկին, լուռ, անձայն. նա վախենում էր դրանից, որ իւր համար խաղ ու պարի ասպարէզ էր շինել Լոռին և յանկարծ երևալով հեռու հորիզոնից իւր մեռելութեան և անշարժութեան ազդեցութիւնը տարածում էր բնութեան վրայ, վայրկենաբար պատում ամբողջ հորիզոնը մի ծայրից մինչև միւսը և սպա սկսում իւր աւերմունքը:

Եւ Աշոտ Երկաթը սպասում էր Լոռուայ այդ ահեղ փոթորկին, բայց նրանից չէր վախենում, գիտէր նա դրա արհաւիրքները, դրա խաղն ու պարը, գոռունն ու գոչիւնը, բայց կրկին առաջ էր սլանում: Նրա միտքը կաշկանդուած էր ուրիշ բանով, նրա ամբողջ էութիւնը բռնուած էր ուրիշ մտքերով: Փոթորիկը կը գայ և կ'անցնի, կապոյտ երկինքը կը ծածկուի սև-սև ամպերով, այնտեղից կը լսուի գոռունն ու գոչիւնը, շանթերը կը փայլատակեն չորս կողմը, բայց չի անցնի կարճ ժամանակ և նա ինքն իրան կը դադարի, աւերը կը ժպտայ, բնութիւնը կը կենդանանայ,

մարդիկ դուրս կը գան իրանց բնակարանները, թուշուները կըսկսեն անուշ ծղվլոցը և բնութիւնը կըկին կը կենդանանայ: Հող չէ, երբ փոթորիկը ի վերուստ է գալիս, վայ է միայն, երբ այդ փոթորիկը անհաւատ Իւսուֆի հրոսակներն են յառաջացնում:

Ու գնում էր առաջ Աշոտ Երկաթը և իւր հայեացքը դարձրել էր ճանապարհի ուղղութեամբ, որ ոլոր մոլոր պտոյտներով ձգվում էր իւր առաջ:

Յանկարծ իւր առաջ, ճանապարհի հէնց մէջտեղը, փոշու մի ամպ բարձրացաւ: Աշոտ Երկաթը իւր աչքերը լայն բացեց և ուշադրութեամբ դէպի փոշին նայեց, որ սկսեց պտոյտներ անել և սիւնաձև բարձրանալ վեր, միշտ վեր, դէպի սև ամպերը: Չախարաչի նրման անգողար պտըտում էր այդ փոշին և ճանապարհի ուղղութեամբ առաջ գնում, կարծես նա ուզում էր ծաղրել Աշոտ Երկաթին և նրա խմբին, որոնք բնութեան արհաւիրքներից չվտխենալով, այնպէս աներկիւղ առաջ էին գնում: Աշոտ Երկաթը յօնքերը կիտեց, նա չէր սիրում այդ տեսակ «քաջքաքամիներ», որ այնպէս յամառ կերպով շարունակում էր պտտուել իւր առաջ. ձին առաջ քշեց և ուղեցաւ կտոր կտոր անել փոշու այդ սիւնը, որ

մինչև երկինք էր հասնում, երբ նա կարծես ժպտալով դրա դէմ, սուր հաւաքեց և թռաւ հեռու և հեռու, ո՞վ գիտէ դէպի ուր, ո՞ր ձորի կամ ո՞ր լեռան գագաթին կըկին իւր պարը շարունակելու:

Վերջացաւ, պրծաւ քաջքաքամին, հետքն էլ չմնաց և յանկարծ խորին լուսթեան մէջ լսուեցաւ որոտման ահուելի ձայնը, մի վայրկեան էլ և ահա սկսուեց Լոռուայ հեղեղը... Քնչ էր դա, ծովը իւր բերանն էր բացել, երկինքը պատառուել, թէ՛ ովկիանոսը երկնքի վրայ շուռ եկել:

Բոլոր բնութիւնը խառնուել էր իրար, էլ ոչինչ բան չէր երևում՝ ոչ ծառ, ոչ թուփ, ոչ լեռ և ոչ ձոր, ամեն ինչ միախառնուել էր, ամեն ինչ ձուլուել իրար հետ և դարձել ջրային մի գանգուած:

— Տղէրք, կանգ առէք. մի քայլ անգամ անկարելի է առաջ գնալ, կանչեց Աշոտ Երկաթը և ինքը իսկոյն ձիից ցած թռաւ, նրան հետևեցին իւր ձիաւորները, որոնք իջնելով ձիերից ցած մի շրջան կազմեցին և սկսան սպասել փոթորկի անցնելուն: Գնու, գնու, գնու ձայն էր հասնում հեղեղը և ճանապարհորդների գլխին կծերով ջուրը թափում, որոնք

մինչև ոսկորները թրջուել էին և ցրտից դող-
դողացնում էին:

— Այ բեզ հեղեղ, ասաց զինուորներից
մէկը, որի միրուքից և գլխից առուի պէս հո-
սում էր ջուրը:

— Այդպէս էլ պէտք էր, մենք վաղուց է
որ չէինք լողացել և Աստուած մեզ լողացնում
է, ինչ կայ որ, պատասխանեց մի ուրիշը. որ
իւր ահագին վահանի տակ պատասպարուել էր
հեղեղից:

Այդ միջոցին լսուեցաւ հեռուից մի տե-
սակ խուլ և անորոշ ձայն, կարծես այնտեղ
ձորի միջից թռչում են հազարաւոր թռչուն-
ներ, կամ թէ ինչպէս թէ հեռու լեռան քա-
մակին քանդվում են աշտարակի պարիսպներ:

Աշոտ Երկաթը, որ լուրջ կերպով հետե-
ւում էր ամեն բանի, իսկույն գլխի ընկաւ թէ
ինչ վտանգ է սպառնում իրանց և նա դառ-
նալով դէպի իւր խումբը, գոռաց բարձր ձայնով:

— Հեծնել ձիերը, բարձրանալ աջ, դէպի
բլուրը: Խումբը իսկույն կատարեց նրա հրա-
մանը և քաշուեցաւ վեր դէպի բարձրութիւ-
նը, այդ ժամանակ նրանք տեսան, թէ ինչ-
պէս հեղեղատը լեռան պէս գլուխը բարձրա-
ցրած եկաւ ողողեց այն տեղը, ուր կանգնած
էին մեր կորիճները:

Անցաւ մի փոքր ժամանակ. ամպի որոտ-
մունքը հետզհետէ կտրուեց, դադարեց հեղե-
ղը, վերջացաւ անձրևը և կապույտ երկինքը
ցոյց տուեց իւր ուրախ դէմքը, աղբբը ազատ
շունչ քաշեցին և ամեն մէկը սկսեց իւր թաց
շորերը քամել. քիչ ժամանակից լետոյ վառե-
ցին մի ահագին խարոյկ և ամեն մէկը սկսեց
իւր շորերը ցամաքացնել: Աշոտ Երկաթը նա-
յեց իւր կորիճներին և նրա հոգին լցուեց
գոհունակութեամբ: Երկու հարիւր մարդուց
ոչ մէկը արտունջ չէր յայտնում, ոչ մէկի դէմ-
քը մռայլ ու յոգնած չէր, այլ ուրախութեան
ժպիտը փայլում էր նրանց դէմքերին, երևում
էր, որ ամենքը իրանց կեանքը Աշոտ Երկա-
թի համար էին դրել...

Երբոր մի փոքր հանգստացան, նրանք
կրկին իրանց ճանապարհը շարունակեցին և
մուծը դեռ նոր էր պատել, երբ զգուշու-
թեամբ կանգ առան Խորաձոր ամրոցի պա-
րիսպների առաջ:

Աշոտ Երկաթը հրամայեց իւր քաջերին
մի փոքր հանգիստ առնել և կէս գիշերուան
դէմ անակնկալ կերպով յարձակում դործել
բերդի վրայ...

Ժ. Զ.

Թողնենք Աշոտ Երկաթին Խորաձոր ամրոցի պարիսպների տակ, թողնենք Գաւթին իւր Աստղիկին որոնելիս և մենք գանք Վասպուրական երկիրը, Գազիկ դաւաճանի աշխարհը, ուր ծփում են Աղթամարայ կամ Վանայ լճի կապույտ ալիքները:

Գազիկ Արծրունին խղճահարուած իւր ստոր դաւազրութիւնից, որ արել էր Սմբատ արքայի դէմ, բայց աւելի երկիւղ ունենալով Իւսուֆից իւր կեանքի համար, խոյս տալով Իւսուֆից մտաւ իւր երկիրը և իւր առաջին գործը եղաւ քաշուել ամուր տեղերը և սպասել հանքամանքների, մինչև որ կարողանար իւր մտադրութիւնները առաջ տանել:

Մինչև Աշոտ Երկաթի երևալը նա դեռ վախենում էր Իւսուֆից և չէր համարձակվում իջնել բերդերից, թէև տեսնում էր իւր ժողովրդի հալածանքը, տառապանքը և թշուառութիւնը. բայց հէնց որ լսեց Աշոտ Երկաթի քաջագործութիւնները, հէնց որ իմացաւ Իւսուֆի գորքերի յաղթուիլը, նա սիրտ արաւ և ինքն էլ Աշոտ Երկաթի օրինակին հետևելով սկսեց նեղել Իւսուֆի հրոսակներին և քշել նրանց իւր երկրի սահմաններից: Հեռա-

տես և խելօք մարդ էր Գազիկը. նա հասկացաւ որ նախ իւր երկիրը պէտք է մաքրի արտաքին թշնամիներից, իւր երկրում պէտք է իւր համար մի ամուր յենարան պատրաստի և ապա թէ ձգտի իրագործելու իւր մտքերը: Նա արգէն Վասպուրականի տէրն էր, թագաւորն էր, բայց դրանով չէր յագենում նրա փառասիրութիւնը, դրանով նա գոհ չէր: Նա ուզում էր լինէր թագաւորաց թագաւոր և օրինական գահը յափշտակելով լինել միահեծան տէր, այդ էր նրա ձգտումը, այդ էր նրա մտածութեան միակ առարկան: Իւսուֆի օգնութեամբ ուզում էր իւր այդ միակ ձգտմանը հասնել, բայց շուտով հասկացաւ իւր սրտալը և այժմս ինքը միայնակ սկսեց ձեռնարկել այդ նպատակին հասնելու:

Չշփոթեցրին նրան Աշոտ Երկաթի քաջագործութիւնները, այլ ընդհակառակը նա ուրախացաւ, որ առիթ տուեց Իւսուֆի ոյժերը դուրս քշելու իւր երկրի սահմաններից էլ, և նա իւր եղբայր Գուրգէնի հետ միասին յարձակուեցաւ Իւսուֆի գինուորների վրայ, հալածեց նրանց մինչև Ատրպատականի սահմանները: Եւ ապա իջնելով ամուր բերդերից, սկսեց իւր երկիրը կարգի ձգել:

Միւս հայ իշխաններն ու նախարարներն էլ՝ ոգի առած այդ յաղթութիւններէց սկսեցին իրանց երկիրներէց հալածել թշնամուն: Ամենքը հալածուած էին Իւսուֆի հրոսակներին ինքնուրոյն և ինքնակամ կերպով. չկար դրանց մէջ մի ընդհանուր կապ, չէին ճանաչում նրանք մի ընդհանուր ղեկավար, չունէին մի որոշ ծրագիր:

Եւ Իւսուֆը զեռ համբերուած էր. նա ճանաչում էր հայերին, նա գիտէր նրանց անմիաբանութիւնը, նա հասկանում էր որ վաղ թէ ուշ այդ նախարարները իրանց սրերը իրար դէմ կը դարձնեն և այն ժամանակ ինքը գիտէ թէ ինչպէս կողողի հայոց երկիրը արիւնով թէ ինչպէս իւր վրէժը տասնապատիկ կառնէ հայերից:

Բայց Գագիկի հոգը չէր թէ կը կործանուէին փոքրիկ նախարարութիւնները, թէ կը տառապէր ժողովուրդը, կը թափուէր հայոց արիւնը, նա միայն ամեն միջոց գործ էր գնում իւր իղձը ի կատար ածելու:

Նստած էր նա Վան քաղաքում Շամիրամից հիմքը ձգած ամուր բերդում և սկսում էր զանազան նորոգութիւններ անել և ամրացնել բերդը: Դէպի Բզնունեաց ծովը նայող կողմը շինեց նա գեղեցիկ պալատ գեղեցիկ

ճեմելիքներով, որտեղ զբօսնողի առաջ տարածվում էր լճակի անսահման կապույտ ջուրը, ուր երբեմն-երբեմն լողում էին փոքրիկ մակուկները իրանց սպիտակ փոքրիկ առագաստներով, որ մի-մի վայրենի կարապների էին նմանում:

Գագիկը գոհունակութեամբ նայում էր հրաշալի տեսարանին և մտածում աւելի ճախացնելու և նորանոր շինութիւններ *) աւելացնելու. բայց նրա հոգին խաղաղ չէր, նա գոհ չէր, աշխարհի այդ հրաշալի անկիւնով...

Տխուր էր այսօր Գագիկը. շատ շուտով նա մտածում էր բաժանուել իւր ընտանիքից, իւր սիրուն աղջկանից, որին հոգու չափ սիրում էր:

Հայոց երկիրը խաղաղացել էր. Իւսուֆի հրոսակներից մի փոքր ազատ շունչ էր քաշել հայ ժողովուրդը, և ահա այժմ ինքը մտածում էր այդ խաղաղութիւնը խանգարել, առաջին սուրը ինքը բարձրացնել հայոց դէմ:

Նախջուան քաղաքը նրա մտքից չէր անցնում, որ խլելով Սմբատ արքան լանձնել էր Սիսակեանց իշխանին և որ այնքան գժտու-

*) Յետոյ շինեց երկու եկեղեցի՝ ս. Գրիգոր և ս. Սիճն անուամբ:

Թիւնների առիթ էր տուել: Եւ Գագիկը պատրաստութիւն էր տեսնում յարձակում գործելու Նախջուանի վրայ և յետ խլելու Սիսակեան իշխանից այդ քաղաքը:

Գառն յիշողութիւնները անցնում էին նրա մտքով և նա լուռ դիտում էր արևի մուտքը, որ թագնվում էր հեռու հորիզոնի տակ, երբ աննկատելի կերպով դուրս եկաւ նրա աղջիկը՝ Հեղինէն, իւր երկու նաժիշտների հետ և առանց նկատելու հօր ներկայութիւնը յենուեցաւ պարսպի վրայ և իւր հայեացքն ուղղեց դէպի Բզնունեաց ծովի ջրերը, որոնք մեղմ ծփում էին և դիպչելով ժայռերին փրրփրում... Նագելի և քնքոյշ օրիորդ էր Հեղինէն, դեռ տասն և վեց տարին չլրացած: Սև սաթի նման յօնքերը բարակ աղեղի նման կամար էին կապել նրա փայլուն, բայց թախիծով լի աչքերը. նա լուռ դիտում էր փոքրիկ ալիքների վիտալուն, որոնք պար էին բռնում արևի վերջին ճառագայթների տակ... Ախի՛նչքան շատ էին այդ ալիքները, մի ալիք ջարդվում, փշրվում և ոչնչանում էր, միւսն էլ գալիս, նա էլ էր ոչնչանում, մի ուրիշն էր գալիս, ապա դարձեալ ծնվում նորը, նա էլ մեռնում և տեղը ծնվում նորը և նորը... մտածում էր Հեղինէն և ապա իւր անթարթ

աչքերով դիտում էր հեռուն և հեռուն, ալիքներից հեռու, դէպի հորիզոնը, դէպի լեռները, որի ետև գտնվում է Այրարատեան աշխարհը, ուր այնպիսի հպարտութեամբ երկինք է հասցրել իւր ալևոր գագաթը հսկայ Մասիսը և Գր շրջում է դիւցազն Աշոտ Երկաթ, հայոց օրինական թագաւորը...

Մի փոքր ժամանակ լուռ դիտում էր Գագիկը իւր աղջկան և ապա մօտենալով նրան քաղցր ձայնով ասաց.

— Աղջիկս:

Հեղինէի մարմնով մի տեսակ սարսուռ անցաւ լսելով հօր ձայնը, բայց երբ նայեց նրա գորովով լի աչքերին, փաթաթուեց հօրը և լուռ սկսեց նայել նրա աչքերին:

Գագիկը մի համբոյր դրոշմեց նրա մարմարինի նման ճակատին և նրա ձեռքերը իւր ավի մէջ առնելով կանչեց:

— Գու տխուր ես, Հեղինէ, թնչ է արդեօք տխրեցնում քեզ, միթէ գոհ չես այս սքանչելի տեղով և այն վայելչութիւններով, որով շրջապատուած ես դու ասան, հոգիս, թնչ բան վրդովեցնում է քեզ և ես իսկոյն կը կատարեմ քո ամեն մի ցանկութիւնը...

Չէ, հայրիկ, ես երջանիկ և բաղաւոր եմ, իմ միակ ցանկութիւնն է, որ դու մնաս

մեզ հետ անբաժան: Վասպուրականը ընդարձակ երկիր է, բաւականացիր նրանով և մենք երջանիկ կը լինինք:

Մի տեսակ մռայլ քող անցաւ Գագիկի գէմքի վրայ, լսելով այդ խօսքերը և նա իսկոյն գլխի ընկաւ թէ ինչ է ուզում ասել Հեղինէն: Այդ միևնույն բանը միշտ կրկնում էր նաև իւր մայրը:

Չէ, աղջիկս, ես շուտով պիտի արշաւեմ դէպի Նախջուան, տղամարդու գործը չէ տանը նստելը. իսկ կանանց գործը չէ մարդոց գործերի մէջ խառնուելը. գուր դու և քո մայրը աշխատում էք ետ կանգնեցնել իմ նպատակից:

— Իսկ Աշոտ Երկաթը միթէ թոյլ կըտայ գրաւելու այդ քաղաքը:

— Աշոտ Երկաթը... հը՞մ... դա արդէն իմ գործն է. բայց դու գնա սենեակդ, փչում է արդէն երեկոյեան սառը քամին և դու կարող ես մըսել, ասաց Գագիկը և չսպասելով պատասխանի ներս գնաց իւր պալատը, թողնելով Հեղինէին միայնակ, նաժիշտների հետ:

Հեղինէն նայեց հօր ետևից և ապա մի դառն ժպիտ խաղաց նրա երեսին:

— Ո՛չ, ամեն բան կը գոհեմ, որդիական պարտաւորութիւնս կը մոռանամ և այն սև կնիքը, որ ուզում է գնել հայրս իւր անուան

վրայ, ես իմ թոյլ տեղովս կը քաւեմ: Չեմ թոյլ տայ որ Աշոտ Երկաթից օրինական գահը յափշտակուի... Ես քեզ հետ եմ, ո՞վ քաջ դիւցազն, քեզ համար եմ միայն աղօթում, քո յաջողութեան վրայ եմ մտածում... Թոյլ բազուկներով կը խորտակեմ նոյն իսկ հօրս բոլոր ջանքերը և նրա բոլոր մտադրութիւնները ի դերև կը հանեմ. . . Շուտով, շատ շուտով կիմանաս, որ մի աներևոյթ ձեռք, ամեն դաւադրութիւններից քեզ պահպանում է,— այդպէս ասաց ինքն իրան Հեղինէն և այն է ուզում էր ներս գնալ. երբ մի քահանայ խոր գլուխ տուեց նրան: Մի տեսակ հետաքրքրութիւն պատեց օրիորդին և իսկոյն հեռացրեց նաժիշտներին:

— Հ՛ր, տէր Սահակ հայր, լուր ունիս:

— Այ՛ն, իշխանուհի, ուղարկուած մարդը դարձաւ և Աշոտ Երկաթը ողջ և առողջ է: Սմբողջ երկիրը մաքրել է անօրէններից և այժմս ճակատած է Աղստափա ամրոցի դէմ, որ կասկած չկայ, այժմս առած կը լինի:

— Գոհութիւն Աստուծոյ, լաւ լուրեր ես բերել, տէր հայր, բայց հարկաւոր է նրան մի բանից զգուշացնել: Սյս իրիկուն նամակ կը գրեմ և այդ թուղթը անյասպաղ պիտի Աշոտին հասցնէք:

— Պատրաստ եմ ձեր հրամանը կատարելու, իշխանուհի, ասաց տէրտէրը, որ Գագիկի ընտանեաց քահանան էր և խոր գլուխ տալով հեռացաւ Արծրունեաց օրիորդից:

Միւս օրը առաւօտեան ձիաւորը սրարջաւ գնում էր դէպի Աշոտ երկաթ, հետը տանելով Հեղինէի նամակը:

ԺԷ.

Գիշերը իւր սևաթուր թւերը տարածել էր ամեն կողմը և խորին խաւարի մէջ ընկնմել Աղստափա կամ Խորաձորի *) ամրոցը, որ աժգահայ գազանի նման դուրս էր ցցուել ժայռի գլխին և հպարտութեամբ նայում էր ցած, իւր ոտքերի տակ, ուր ահաւելի խոր ձորի մէջ լռիկ մնչիկ հոսում էր Աղստափի գետակը:...

Չորս կողմը տիրում էր խորին լուսթիւն, երբեմն երբեմն միայն սուլել վ անց էր կե-

*) Պէտք է ենթադրել, որ այդ բերդը այժմս Գիւղիջանի և Քարվանսարա գիւղերի մէջ գտնուող Ղըզ-ղալասի կոչուած բերդն է, որ կառուցուած է Աղստափա գետակի վրայ խոր ձորի մէջ: Բ. Ա.

նում քամին, խրոխտալով յարձակվում պարիսպներին և ապա յաղթուելով նրանից, յետ էր նահանջում պատերից և ոռնալով և հառաչելով փախչում հեռու և հեռու... Կէս գիշերից արդէն անց էր. բերդի մէջ ամեն ինչ լուռ էր. խոր քուն էին մտել ամենքը՝ սկսած արաբ իշխաններից մինչև յետին զինուորը. քաղցր նիրհը պատել էր ամենին և ամենքը արդէն գտնվում էին երազական այն աշխարհում, ուր դիւթական սնոտի պատկերները միմիայն գոյութիւն ունին... Պահապաններն անգամ, որոնք ձանձրացել էին քամու ոռնալուց և սուլելուց, չկարողանալով տանել դրա միատեսակ և անտանելի ողբը, ամեն մէկը կուչ էր եկել մի անկիւնում և ընկել մի տեսակ մրափման մէջ, երբեմն երբեմն միայն, երբ որ հեռուում, ձորի միջից լսվում էր վայրենի բորենու և գայլերի ոռնոցը, նըրանցից մի քանիսը բարձրացնում էին իրանց ծանրացած գլուխները և անիծում էին այդ գազաններին, որոնք իրանց քունը խանգարեցին: . . .

Բայց քամին իւր նուագն էր շարունակում և բուռն գորութեամբ առաջ քշում երկնքի վրայ մոխրագոյն ամպեր, որոնք արագութեամբ հեռանում էին հորիզոնից, մէկը միւ-

սին հետևելով, մի ամպի կտոր միւսի հետ
խառնուելով և ձուլուելով: . . .

Հէնց այդ միջոցին Աշոտ Երկաթը իւր
երկու հարիւր կտրիճներով զգոյշ մագնուս
էին ժայռից ժայռ, քարից քար և մօտենում
էին բերդին: Ձորի կողմից մուտքը բաց էր
և այդ կողմից ապահով կարծելով երկու պա-
հապան միայն նշանակած էին, որոնք Հէնց
նոր քուն էին մտել և ընկել էին դիւթական
աշխարհը: . . .

Այ կտրիճները բարձրանում էին վեր.
ոչ մի շունչ, ոչ մի ձայն չէր լսվում, ոչ մի
քար, ոչ մի խիճ չէր գլորվում նրանց ոտքե-
րի տակից, այլ զևերի նման նրանք աներկիւղ
բարձրանում էին վեր, իրանց ոտքերի տակ
թողնելով ահուելի ձորը, սուր ընկնողը պատառ-
պատառ պիտի լինէր:

Խմբի առաջ գնում էր Աշոտ Երկաթը,
ինչպէս մի հասարակ զինուոր, բարձրացաւ նա
վեր և կանգ առնելով ազատ շունչ քաշեց և
սրբեց ճակատի քրտինքը. նա չնկատեց ան-
գամ, որ Հէնց իւր ոտքի տակ տարածվում է
քնած պահապանի մարմինը: Յանկարծ նա
լսեց մի տեսակ խուլ ձայն, որ ասում էր.

— Գալիս են, գալիս, Շահընշահը . . .

Աշոտ Երկաթը սուրը մերկացրեց, բայց

նայելով իւր ոտքերի տակ փռուած պահա-
պանին, սուրը կրկին պատեանը դրեց և ինքն
իրան ասաց.

— Ե՛հ, սրա համար չարժէր սուրը հա-
նել, և նկատելով որ ձորից բարձրանում
են իւր կտրիճները, միայն իւր ոտքը դրեց
պահապանի կրծքին:

Այդ միջոցին բոլոր կտրիճները արդէն
ժողովուել էին Աշոտ Երկաթի շուրջը և նրա
հրամանին էին սպասում, երբ լսուեցաւ մի
տեսակ գրմփոցի ձայն, կարծես ով որ ցած
գլորուեց ձորը:

— Ա՞վ ընկաւ, հարցրեց Աշոտ Երկաթը,
ցածը ձայնով գիմելով իւր կտրիճներին:

— Ոչ ոք, պատասխանեց զինուորներից
մէկը առաջ գալով, պահապաններից մէկին
Մահմէդի գոգն ուղարկեցինք:

— Շատ լաւ արիք, այժմ հարկաւոր է
զգոյշ առաջ գնալ և սկսել կոտորածը, բայց
Հէնց որ լսէք թէ իմացան մեր բերդը մըտ-
նելը ամեն կողմից ահազին աղմուկներ բարձ-
րացրէք և շփոթեցէք բոլորին: Խնայել ոչ ոքի
չլինի, մինչև որ զէնքերը վայրը չդնեն: Դէ,
իմ կտրիճներ, սկսեցէք գործը, ժամանակ պէտք
չէ կորցնել, ասաց Աշոտը և նրանք մի քանի
խմբերի բաժանուելով սկսեցին կոտորածը:

Քնած զինուորները չգիտէին մարդիկ են
իրանց գլուխները կտրուած թէ դևեր, նրանք
մինչև անդամ ժամանակ չունեցան զէնքի դի-
մելու. մի քանիսը միայն խելքի եկան, բայց
հայ կորիճների սուրը նրանց էլ վերջ տուաւ:
Չանցաւ կարճ ժամանակ և դեռ արշալոյսը
նոր էր բացվում, երբ ամբողջ բերդի մէջ
գտնուած արաբաց գնդի կէսը կոտորուած էր,
իսկ միւս մասը գերի բռնուած:

Աշոտ Երկաթը ազատ շուքէ քաշեց, երբ
զգաց, որ վերջին հարուածը տուեց Իւսուֆի
զինուորներին, որոնք այլ ևս չեն համարձա-
կուի անհանգիստ անելու իրան. . . Իւսուֆի
վերջին գորութիւնը ջախջախելով, Աշոտ Եր-
կաթը շտապեց դառնալ Արշարունեաց երկիրը:

915 Թուականն էր երբ հայ իշխանները
ակնածելով դրա քաջագործութիւններից և
կարճ ժամանակում ցոյց տուած լազթութիւն-
ներից, ՚ի մի ժողովուրդով Ափսազաց Գուր-
գէնի և վրաց Ատրներսէհ արքայի հետ միա-
սին, թագաւորեցրին նրան իւր հօր փոխա-
րէն:

Սյունահետև նա սկսեց խնամել երկիրը
իբրև հայր: Նա փառքի համար չէր մտա-
ծում, այլ նրա միակ ցանկութիւնն էր տես-
նել իւր ժողովրդի բարօրութիւնը, սակայն

այդ հանգստութիւնը երկար չտևեց և հայոց
խաղաղ երկիրը նորից արեկոծուեցաւ, նորից
արեան և կոտորածի ասպարէզ դարձաւ, որ
շփոթեց Աշոտ Երկաթի սիրտը: Այս անգամ
վերքը շատ ծանր էր:

ԺԸ.

Ինչպէս հայր իւր ժողովրդեան, ինչպէս
հասարակ մարդ, Աշոտ Երկաթը իւր սուրը մի
կողմը թողած, շրջում էր իւր ժողովրդի մէջ
և նրա երկարամեայ վէրքերը բուժում, նրա
կարիքներին դարման տանում: Նա ման էր
գալիս քաղաքից քաղաք, գիւղից գիւղ, ծա-
նօթանում էր ժողովրդի գրութեան հետ, երբ
անակնկալ դիպուածը ստիպեց նրան ընդհատել
այդ և նորից զէնքի դիմել, նորից արեան աս-
պարէզ գնալ:

Մի երեկոյ, երբ նոր վերադարձել էր ժո-
ղովրդի մէջ շրջագայելուց, նրան յանձնեցին
մի փաքրիկ նամակ, որ դրուած էր մանր բայց
զեղեցիկ գրերով:

— Ո՞վ բերեց այս նամակը, հարցրեց Ա-
շոտ Երկաթը իւր ծառաներին, երբ նա դեռ
զարմացմամբ դարձնում էր նամակը:

— Մի գիւղացի, որ իւր անունը և որ-
տեղից լինելը չուզեց յայտնել, պատասխանեց
ճառան:

Աշոտ Երկաթը շտապով բացարաւ նա-
մակը և սկսեց կարգալ, նա իւր աչքերին չէր
հաւատում:

«Քաջդ Աշոտ Շահրնշահ, գրած էր նա-
մակի մէջ, մի կարծիր, թէ միայն նրանք են
քո բարեկամները, ոյք քեզ անձամբ ճանա-
չում են: Ես քեզ չեմ տեսել, բայց լսելով քո
քաջագործութիւնները սիրում եմ քեզ: Սի-
րում եմ իմ հարազատ ծնողներից աւելի, ինչ-
պէս իմ հարազատ եղբօրս: Իմ մտածութեանց
առարկան միայն այն է, որ քեզ, թագաւորաց
թագաւոր, միշտ յաջողութեան մէջ տեսնեմ
և ես միշտ աղօթում եմ Տիրոջը, որ նա քո
կեանքը երկար պահի այն ժողովրդի համար,
որ մինչև քո երևալը տառապում էր: Ինձ
գու չես տեսնի, չես ճանաչի, բայց ես միշտ
քեզ վրայ պիտի մտածեմ և քո բարիքները
ցանկանամ: Ուրախացաւ սիրտս, երբ լսեցի քո
քաջագործութիւնները, իսկ այժմս ցաւում է
սիրտս, որ քեզ տխուր լուրեր պիտի հաղոր-
դեմ և վրդովեմ քո խաղաղութիւնը: Իհիտեմ
գու չես վհատուիլ. վհատութիւնը գիւցազնի
գործը չէ, այլ թօյլ և վախկոտների. իսկ գու

գիւցազունների գիւցազն ես: Հայաստանը նո-
րից պիտի աւերմունքի ասպարէզ դառնայ և
այդ աւերմունքի պատճառը լինելու է Գագիկ
Արծրունին, որ մօտ օրերս պիտի արշաւի Սի-
սակեան իշխանից Նախիջևան քաղաքը գրա-
ւելու: Զգուշացնում եմ քեզ, այդ սուրը նաև
քո դէմ է դարձնելու. նա արդէն որոգայթներ
է պատրաստում քեզ մէջը ձգելու, բայց նրա
ամեն մի որոգայթը 'ի զուր պիտի անցնի, քա-
նի որ ես ամեն անգամ քեզ պիտի տեղեկու-
թիւն տամ նրա մտադրութիւնների մասին:
Առ այժմ այսքան: Քեզ պաշտող իշխանու-
հի»:

Աշոտ Երկաթը երազի մէջ էր իրան կար-
ծում. այնքան անակնկալ էր այդ նամակը: Ո՞վ
պիտի լինէր այդ իշխանուհին, որ զգուշաց-
նում էր իրան Գագիկ Արծրունու դաւադրու-
թիւնից և ինչո՞ւ Գագիկը կրկին վրդովում էր
հայոց խաղաղութիւնը: Նո՞ւ երկար ոչ մէկի
վրայ մատնանիշ չկարողացաւ լինել: Արդեօք
Գարգմանաց Սևադայի աղջիկն էր, որի աչ-
քերից շատ անգամ յափշտակուել էր և եթէ
նա էր ինչո՞ւ ստորագրութիւն չկար, կամ ին-
չո՞ւ ինքը Գարգմանաց իշխանը անձամբ չէր
հաղորդում այդ մասին, եթէ գիտէր Գագիկի
այդ ստոր մտադրութիւնները: Ինչ և է, պէտք

էր սպասել և տեսնել թէ որքան ուղիղ էին իշխանուհու այդ ցուցմունքները:

Եւ Աշոտ Երկաթը ծալեց նամակը և մի կողմը գրեց, բայց չանցաւ մի քանի օր և ահա լուր ստացաւ, որ Գագիկը յիրաւի պաշարել է Նախիջևան քաղաքը, բայց նա տեղից չշարժուեց սպասելով հետեւանքին: Նախիջևանը առաւ Գագիկը և ահա Սիսակեանց իշխանը, որին պատկանում էր այդ քաղաքը բարկութեամբ լի յարձակուեցաւ Վասպուրահանի վրայ, սկսեց նրա երկիրները հուր ու մոխիր դարձնել. երկպառակութեան քարը գլորուած էր և սկսաւ Արժրուեսեաց և Սիսականց արիւնը թափուել, այդ ախտը տարածուեց նաև միւս հայ իշխանների մէջ, որոնք դժբախտաբար գալով իրանց երկրի սահմաններից սկսան հարեան հայ երկիրներն ու գաւառները աւերել և սրոյ ճարակ դարձնել:

Կատաղեց Ա. ոտ, մունչաց սոսկալի մունչամբ, որ սար ու ձեր գողացին և ապա կրկին սուրը պատեանից հանելով սկսեց հայ նախարարների վրայ վազել: Երկիրը նորից փոթորկուեց, նորից սուգն ու շիւանը տարածուեց, նորից գիւղերն ու քաղաքները ամայացան և թշուառ ժողովուրդը նորից սկսեց հեծել հայ նախարարների ըմբոստու-

թեան և փառասիրութեան պատճառով: Արտաքին թշնամին այժմս չկար, բայց ներքին խռովութիւնները աւելի խոր խոցեցին խեղճ ժողովրդին քան արտաքին թշնամին:

Բայց արտաքին թշնամին էլ հեռու չէր. Իւսուֆը, որ միշտ ատամները կըրճրտացնում էր Աշոտ Երկաթի վրայ և մտածում նրանից վրէժխնդիր լինելու իւր գորքերին այնպէս չարաչար հալածելու պատճառաւ այժմ սիրտ առաւ և կամաց կամաց իւր պատրաստութիւններն էր տեսնում Հայաստանի վրայ յարձակուելու: Նա ուրախանում էր հայ նախարարների անմիաբանութիւնը տեսնելով և ազատ էր թողել նրանց իրար դէմ կռուելու, իրար ոչնչացնելու. նրան նպաստողը միայն այդ էր, ապա թէ ոչ վախենում էր նա Աշոտ Երկաթի վրայ յարձակուելուց: Ժամանակը արդէն մօտեցել էր: Եւ Իւսուֆը հրամայեց իւր բոլոր գորքերին ժողովուել միասին Ատրպատական և այնտեղից մտնել հայոց երկիրը: Նրանք արդէն կամաց կամաց մօտենում էին հայոց երկրին, այն ինչ հայ իշխանները գեռ իրար արիւնն էին թափում...

ԺԹ.

Ինչպէս անձրևից առաջացած հեղեղատը այնպէս ներս խուժեցին ԻւսուՓի հրոսակները հայոց երկիրը և սկսեցին անցած տեղերը քանդել, աւերել և կոտորել: Ինչպէս հեղեղատը ողողում է և աւերում նախ առաջի հանդիպած տեղերը և ապա զանազան ուղղութեամբ ցրուելով վազում է միշտ առաջ, առանց հարցանելու տեղն ու դիրքը, այնպէս էլ արաբաց հրոսակները նախ սկսեցին աւերել իրանց մօտի երկիրները և ապա մտնել աւելի խորը, երկրի ներսը, ուր ազատ ասպարէզ գտնելով իրանց համար, մոխրի կոյտեր դարձրին շէն գիւղերն ու քաղաքները... Իրանց ետևից նրանք թողնում էին միմիայն աւերակներ, սուգ, լաց ու շիւան... ամեն ինչ ոչնչանում էր նրանց բարբարոս ձեռքերից, ամեն ինչ կործանվում և արիւնով ողողվում մոխիր դարձած աւերակները... Ո՞վ էր խեղճ ժողովրդեան պաշտպանը, նրանց մասին հոգացող— ոչ ոք: Իշխանները իրար հետ էին կռվում, իսկ ոմանք ամրանում էին իրանց բերդերում, անպաշտպան թողնելով խեղճ ժողովրդեան, որի քրքրտինքով ապրում էին իրանք... Այն, ծանր էր, խիստ ծանր ժողովրդի դրուժիւնը, ամեն հա-

լածանք, ամեն տանջանք նրա գլխին էր թափվում և նա անօգնական, իւր իշխաններից մոռացուած, ձեռքերը երկինք էր բարձրացնում և Տիրոջից օգնութիւն խնդրում:

Եւ նա, ամեն յոյսը կտրած, ամենից մոռացուած, սարսափով պատած, երկիւղից գլուխը կորցրած, թողնում էր իւր տուն ու տեղը, դաշտն ու արտերը և դէպի լեռները փախչում. ամեն կողմը՝ թէ սարերում, թէ ձորերում, թէ տանը գիւղի մէջ և թէ դուրսը դաշտում մահ էր սպառնում նրան.

Կանգ առաւ Աշոտ Երկաթը երբ լսեց ժողովրդի հեծեծանքը և քաջի սրտի մէջ անցաւ թորին կսկիծը. նա ձայն տուեց իշխաններին, ձայն տուեց նախարարներին, նրա ձայնը տարածուեցաւ լեռների և ձորերի մէջ, արձագանք տուեց. բայց ոչ մի իշխան, ոչ մի նախարար տեղից չջարժուեց, ոչ մէկը պատասխան չտուեց նրա կանչին, ամենքը կարծես խուլ լինէին և չլսեցին քաջի ձայնը:

Սպասեց Աշոտ Երկաթը, շատ սպասեց, մի թոյլ ձայն անգամ չլսեց ու վրդովուեց քաջի սիրտը. նրա աչքերում երևացին արցունքներ, որոնք գլորուեցան ցած և խառնուեցան իւր սիրած ժողովրդի արտասուքների հետ: Դիւցազնը լալիս էր, լալիս էր ոչ թէ

մահից վախենալով, այլ լալիս էր որ ինքը չի կարող բիւրի դէմ կենալ.. Ապա խոցուած սըրտով նայում է իւր մի բուռն քաջերին, որոնք լուռ նրա հրամանին են սպասում, ու նրա սիրտը լցվում է գոհունակութեամբ, նրա օգքերից հուր է ցայտում, դէմքն ընդունում է վեհ և խրոխտ կերպարանք և դառնալով նրանց ասում է.

— Տղէրք, մենք միայնակ ենք հազարաւորների դէմ, մենք ամենքս պիտի մեռնենք մահը միանգամ միայն գալիս է, աւելի լաւ է քաջի պէս մեռնենք, սրերը ձեռքներիս, քան թէ անօրէններից գերուենք և բանտի մէջ մաշուենք...

Ասում է նա, սուրը օդի մէջ ճօճում և թռչում առաջ:

— Ապրի Աշոտը, կեցցէ Շահընշահ, գոռում են կտրիճները և նրա ետևից սլանում...

Ու թռչում է Աշոտ, մէկ այտտեղ է կոտորում թշնամիներին ու յանկարծ աներևույթանում, մէկ երկրի միւս կողմը: Անակնկալ ժամին յարձակվում է նա թշնամիների վրայ և յանկարծ չքանում...

Չարհուրանքը պատում է Իւսուֆի զինուորներին և նրանք ամեն ըուպէ սպասում են նրան, ինչպէս երկնքի պատուհասի. բայց

նրանք կրկին առաջ են գալիս, կրկին շաւերում և կոտորում, տանջանք տանջանքի վրայ աւելացնում հայ ժողովրդին: Նրանք չեն յուսահատվում Աշոտ Երկաթի մանր յարձակումներից, նրանք գիտեն, որ իրանք շատ են, գօրաւոր, անթիւ, անհամար, որ մէկին կը կոտորի Աշոտ Երկաթը...

Ու աներկիւղ անօրէնները տանջում էին անպաշտպան ժողովրդին պառաւներին և ծերերին նրանք կոտորում էին անխնայ, ճճմայրերի ձեռքերից դուրս էին կորզում նւանց սիրելի մանուկներին և գետնին խփելով մայրերի աջքի առաջ սպանում. յղի կանանց կոկոռտում էին ոտքերի տակ և սպանում նրանց, իսկ միւսների որովայնը պատառելով, դուրս էին կորզում պտուղը *) և օդի մէջ շարտում: Մեծամեծներին զանազան տանջանքներ էին տալիս, որ ցոյց տան իրանց պահած գանձերը և երբ ստանում էին ամեն ինչ կամ սպանում էին նրանց կամ եթէ առոյգ և քաջ է, գերութեան վարում և ստիպում հաւատն ուրանալու: Գերիներին պահում էին ամենատոկալի կերպով և երբ նրանք չէին ուրանում իրանց կրօնը, սարսափելի տանջանքներով մահացնում

*) Չամչեան, ԳԼ ԺԷ, երես 765

էին նրանց, մի քանիսին կենդանի էին թա-
ղում, մի քանիսին ծանրութեան տակ ճխլում,
իսկ ոմանց կրծքից սկսելով սրով երկու կէս
էին անում կամ կենդանի մաս-մաս էին անում
սկսելով կտրատել ոտքերի կամ ձեռքերի ծայ-
րից...

Անհնարին է մի առ մի լիջել այն սոս-
կալի տանջանքները, որ գործ էին դնում ան-
հաւատները...



Ի.

Մութը նոր պատել էր աշխարհը, երբ
Աշոտ Երկաթը իւր յոգնած կտրիճներով դան-
դաղ առաջ էր գալիս:

Յանկարծ Աշոտ Երկաթի ձին ականջները
ցցեց և գլուխը ճանապարհի մի կողմը թեքե-
լով նայեց այն կողմը:

Աշոտ Երկաթը հաւատում էր իւր ձիու
ուշիմութեանը, նրա գլուխը բարձրացնելուն
պէս, ինքն էլ այն կողմը նայեց, բայց մթու-
թեան մէջ ոչինչ չնկատեց. ուստի շոյելով
ձիուն ասաց.

— Ի՞նչ է, իմ նժոյգս, թնչից վախեցար.
Թէ քաղցած ես և շտապում ես կերակուր

գտնել. սպասիր մի փոքր էլ, Աստուած մեզ
էլ ու քեզ էլ կերակուր կտայ:

Այդ ժամանակ ձին կանգնեց. նորա հետ
միասին կանգ առաւ խումբը: Հեռու լանջի
վրայ երևում էր մի շինութիւն, որ վանքի
էր նմանում, որտեղից երևում էր ճրագի ա-
ղօտ լուսաւորութիւն: Բայց այդ չկանգնեց-
րեց ձիաւորներին, ընդհակառակը նրանք շատ
ուրախացան երբ տեսան ճրագի լոյսը, քանի
որ հանգստութեան էին կարօտ. իսկ թէ
թշնամի էր այդտեղ թէ բարեկամ, այդ միև-
նոյն էր. եթէ բարեկամ էր հօ լաւ, իսկ եթէ
թշնամի, մի փոքր ջանք էր հարկաւոր միայն
որ նրանց այդտեղից դուրս քշէին, սակայն
այդ չէր նրանց կանգնեցնողը:

Ձիերի կանգնելուն պէս, ճիշդ այդ ճրա-
գի հակառակ կողմից լսեցին նրանք մի տե-
սակ խուլ գերեզմանական ձայն. կարծես
գետնի տակից ով որ հառաչում էր: Նրանք
սկսեցին աւելի ուշադրութեամբ ականջ դնել
այն, ով որ հառաչում էր, ով որ տանջւում էր,
որի հառաչանքը կարծես գերեզմանի միջից
էր դուրս գալիս: Վանքի մօտ անշուշտ գե-
րեզմաններ կը լինին և մեռելները յարու-
թիւն են առել, մտածեցին մի քանիսը և
սարսափը պատելով նրանց, նրանցից մի քա-

Նիսը սկսեցին լուռ աղօթք մըմնջալ և երես-
ներին խաչ քաշել:

Աշոտը ձին առաջ քշեց դէպի ձայնը,
նրան հետևեց խուճբը:

Մի փոքր առաջ գնացին և յանկարծ
սարսափահար կանգ առան: Մթուփեան մէջ
նրանց աչքին ներկայացաւ մի սոսկալի պատ-
կեր, որ ցնցեց բոլորի ուղեղը և փշաքաղեց
նրանց մարմինը: Խմբի միջից մի քանիսը մին-
չև անգամ ուզում էին յետ դարձնել ձիերի
գլուխը և փախչել այդ դարհուրելի տեսա-
րանից, որ նրանց մտքի մէջ ծնեցրեց Հազա-
րաւոր հրէշաւոր երևոյթներ, բայց Աշոտ
Երկաթը ամեն բան հասկացաւ և շուտով
փարատեց իւր զինուորների սնտոխալաշտու-
թիւնը:

— Տղերք, տեսնում էք ինչպիսի տան-
ջանքներով են տանջում հայերին, ասաց նա
և ցած թռաւ ձիուց:

Փայտերի վրայ ամուր գլխի վայր կա-
պուած էին երկու մերկ կանայք, իսկ մի քա-
նի գլուխներ սարսափահար դուրս էին ցցուել
հողի մակերևոյթից:

— Տղերք, հետ ածեցէք և ազատեցէք
գոնէ այս երկուսին, որոնք դատապարտուած
են կենդանի թաղուելու, բայց դեռ շունչը

բերաներին է, ասաց Աշոտ Երկաթը և ինքը
մի կողմը գնալով նստեց կանաչ խոտի վրայ
և ընկաւ խորին վշտի մէջ:

Դաւիթը և մի քանիսը շտապով յետ
քանդեցին հողը և ազատեցին երկուսին, ո-
րոնք թուլացած ընկան գետնի վրայ:

Ուշադրութեամբ նայում էր Դաւիթը
թշուառների գէմքի գծագրութեանը երբ յան-
կարծ նա կանգ առաւ և ապուշի նման սկսեց
դիտել մէկի գէմքը. նրա ձեռքերը թուլացան
և կարծես արիւնը սառեց երակների մէջ:
Այդ գէմքը ծանօթ էր իրան, բայց նա վա-
խենում էր այդ նմանութիւնը տալ, վախե-
նում էր, որ նա լինէր, ում վրայ կասկածւում էր:

Նայեց, նայեց և ապա յանկարծ փաթա-
թուեց նրա վզով և սկսեց խելագարի նման
համբոյրներ տալ նրան, միւս զինուորները
երկիւղով նայում էին նրան և կարծում թէ
Դաւիթը խելագարուեցաւ: Լուրը հասաւ
Աշոտ Երկաթին. նա վերկացաւ տեղից և մօ-
տեցաւ Դաւթին, որ դեռ համբոյրներ էր տա-
լիս, առանց կարենալու խօսելու:

— Ի՞նչ ես անում, Դաւիթ, ասաց Աշոտ
Երկաթը բռնելով նրա ձեռքը:

Դաւիթը դադարեց համբուրելուց և
խեղզող ձայնով ասաց.

— Ախ, տէր իմ, իմ աներս է, Մաթոսը, իսկ ո՞ւր է Աստղիկս, իմ նշանածը:

Ազատուածը, որ գեռ չէր հասկանում, թէ ինչ է կատարվում իւր շուրջը, երբ լսեց իւր և Աստղիկի անունը, լայն բաց արաւ աչքերը, նայեց Գաւթին և ուշաթափուեց: Խեղճ մարդ, նա ճանաչեց իւր կորած փեսային:

Երբ անցաւ ուշաթափութեան ընթացքը, երբ նրանք մի փոքր հանգստացան, այն ժամակ սկսեցին իրար հարց ու փորձ անել, իրար գրողթիւնն իմանալ:

— Ասա՛, ո՞ւր է իմ Աստղիկը, դողգողալով հարցրեց գաւթի:

— Այնտեղ, ասաց Մաթոսը և ցոյց տուեց դէպի մօտին երևացող վանքը: Գաւթի սիրտը տրոփտրոփաց. նա ուզում էր վեր կենալ և թռչել դէպի վանքը, այդ բանը նկատեց Մաթոսը և նա կանգնացրեց նրան:

— Սպասիր, ո՞ւր ես գնում. այնտեղ, վանքում արաբացի զինուորներով լի է: Մենք մեր գիւղից փախուստ տալով հանգիստ ապրում էինք այդ վանքում, երբ երեկ երեկոյան յանկարծ յարձակուելով մեզ վրայ, արաբները ամեն աւերմունքներ գործեցին, վանականներին ծեծելով սպանեցին. իսկ մեզ՝ որ զենքի գիմեցինք, այսպէս հողումը թաղեցին,

այն ինչ այս երկու կանանցը, որոնց տեսնում էք գլխի վայր կապած այնքան ծեծեցին, մինչև որ շունչները կտրուեց: Խեղճերը ուզում էին փախչել վանքից, բայց չյաջողեցաւ նրանց...

— Իսկ Աստղիկը, անհամբերութեամբ խօսքը կտրեց Գաւթի:

— Աստղիկիդ բռնեցին. նա կենդանի է, բայց թէ ինչ վիճակի մէջ, այդ Աստուծուն է յայտնի:

Քանի մարդ են, հարցրեց Աշոտ Երկաթը, որ մինչև այդ ժամանակ լուռ լսում էր: — Չգիտեմ, պէտք է որ մօտ երեք հարիւր լինին:

— Լաւ ուրեմն: Տղերք, ձիաները թողէք տեղն ու տեղը և հետևեցէք ինձ, ասաց Աշոտ Երկաթը և առաջ անցաւ:

Գաւթի ինքն ուզում էր ամենից առաջ անցնել բայց զսպում էր իրան, այն ինչ նրա շրջապատում էր լինում:

ԻԱ.

Վանքը, որին մօտենում էին մեր կարիճները, զտնվում էր Մասեաց լեռան հարաւա-

լին ստորոտներից մինի վրայ, մի խոր ձորում, որ ծածկուած էր մացառներով և թփերով:

Այդ ժամին, երբ Աշոտ Երկաթը մօտե- նում էր պարսպին, վանքի ներսը վանական- ների ընդարձակ սենեակներից մէկում կատար- վում էր հետեւեալ տեսարանը: Բազմոցի վրայ, ուր առաջ սովորութիւն ունէր թիկն տալու վանքի վանահայրը, այժմս նստած էր արա- բաց այդ փոքրիկ գնդի մեծաւորը:

Նա խրոխտ վայրենի դէմք ունէր, գլխին կապած սպիտակ չալմտ, իսկ մէջքից կախուած էր կեռ սուրը:

Նրա մօտ, նրանից մի փոքր ցած, նստած էին ուրիշ մարդիկ, որոնք ըստ երևոյթին նրա ստորագրեալներն էին:

Մրանց առաջ կանգնած էին երեք հայ աղջիկներ, որոնք ամօթից և երկիւղից իջե- ցրել էին իրանց գլուխները և լուռ հեկեկում էին: Սարսափը պատել էր խեղճ աղջիկներին և նրանք դողում էին երկիւղից, այն ինչ երեք զազանը ամենայն ուշադրութեամբ նը- րանց էին նայում և իրանց մտքում ընտրում էին ամենազեղեցկին: Վայրենի կիւրքը և ա- նասնական ձգտումը ըոպէ առ ըոպէ զրգը- վում էր նրանց մէջ և նրանց աչքերը արդէն բորբոքվում էին մոլութեան կրակով:

Բայց հայ աղջիկները ամօթից գետինն էին մտնում և ամեն կերպ աշխատում էին իրանց երեսները թազցնել:

— Մօտեցէք ինձ, մի վախենաք, ես ձեզ վնաս չեմ տալ, ասաց մեծաւորը նշանացի- անելով աղջիկներին, բայց աղջիկները տեղնե- րից չջարժուեցան:

— Չէք լսում, երեկ էլ երդուեցի, որ ձեզ ոչ մի վնաս չպիտի տամ, թէև դուք ան- հաւատի աղջիկներ էք. բայց երդվում եմ Ալ- լահով, որ եթէ ձեր նզովեալ հաւատը ուրա- նաք և ընդունէք ճշմարիտ կրօնը, դուք մեր ամիրապետի հարեմում ամենասիրուն աղջիկնե- րից մէկը կը լինիք:

— Պեաւուրի աղջիկներ, խո՛ւլ էք ինչ է, որ տեղնիրիցդ չէք շարժվում. թէ՛ ուզում էք որ այս կեռ սրովս ձեզ մաս-մաս կտրատեմ, զօչեց մեծաւորը բարձրաձայն և վեր թռչելով տեղից բռնեց ամենասիրուն աղջիկներից մէկի ձեռքը, որ հաղիւ տասնևհինգ տարեկան լի- նէր: Նա քարշ տուեց նրան իւր մօտ և չը նայած աղջկայ ընդդիմութեան, գրկեց նրա նազելի իրանը, ամուր և ամուր սեղմեց իւր կրծքին: Նոյնը արեցին և միւս երկու արաբ- ները, հետեւելով իրանց մեծաւորի օրինակին:

Ապա մեծաւորը զօրով բարձրացրեց կի-

սառուշաթափ օրիորդի գլուխը և հիացած սկսեց նայել նրա գեղեցիկ դէմքին և փոքր ժամանակից լետոյ իւր գլուխը շրթունքները մօտեցնելով նազելի կոյսին, մի համբոյր գրոշմեց թշուառ աղջկայ գունատ շրթունքների վրայ:

— Ալլահը վկայ, Ասկեար, դարձաւ նա իւր ընկերներին, որ հայերի աղջիկների նման սիրունը աշխարհիս երեսին չկայ, միայն ավստոս, շատ ավստոս, որ սրանք միւսիւման չեն: Ապա նա սկսեց քակել նրա հանդերձները և մերկացնել ստինքները... Մի քանի րոպէ էլ և ամեն ինչ կը վերջանար, բայց հէնց այն րոպէին գրսից լսուեց սոսկալի աղաղակներ, վայնասուտի ձայներ և սրերի հարուածներ... Երեքն էլ բաց թողին կոյսերին և վեր թուչելով տեղերից սրերը մերկացրին:

Այդ իսկ միջոցին դուռը ճարճատիւնով փշրուեցաւ և այնտեղ երևեցան Աշոտ Երկաթը և Դաւիթը: Դաւիթը նայեց աղջիկներին, նայեց մեծաւորի ոտքերի տակ փռուած ուշաթափ աղջկան և ճանաչեց իւր Աստղիկին: Սոսկալի ճիչ արձակեց նա և խելակորոյս վրայ ընկաւ դէպի Աստղիկը և գրկեց նրան. այդ միջոցին նրա գլխին օրօրուեց արար մեծաւորի կեռ սուրը, մի մազաչափ էլ և Դաւիթի

գլուխը պիտի կէս լինէր, երբ հասաւ Աշոտ Երկաթը և տեղն ու տեղը պառկեցրեց մեծաւորին: Միւս երկուսն էլ կատաղաբար վրայ վազեցին դէպի Աշոտ Երկաթը, բայց իրանք արիւնլուայ գետին գլորուեցան, այն ինչ դուրսը վանքի մէջ նրա կտրիճներն էին հունձն անում: Փոքր ժամանակ անցաւ և դադարեց կռիւը. թշնամիներից մի մասը կոտորուած էր, իսկ միւս մասը փախուստ էր տուել:

Աշոտ Երկաթը թողեց Դաւիթին, որ նա նշանածից կարօտն առնի, իսկ ինքը մի կողմ քաշուեցաւ, հրամայելով որ ամեն մէկը հանգստանայ, որ շուտով կրկին ճանապարհ ընկնին: Նա գիտէր, որ փախստականները նորից վերադառնալու են նոր ոյժով և այն ժամանակ ինքը ծուղակի մէջ կընկնէր: Եւ չսխալուեց Աշոտ Երկաթը:

Դեռ Դաւիթը իւր կարօտը չէր առել իւր Աստղիկից, դեռ նրա կտրիճները չէին հանգստացել և դեռ մուժն ու խաւարը նոր բաժանվում էին իրարից, դեռ արևելքում նոր մժմժում էր արշալոյսը, երբ մի ահադին արարացոց խումբը շրջապատեց մեր կտրիճներին:

— Ե՛... ամեն մէկիս տասնից աւելի կընկ-

նի, ասաց Աշոտ Երկաթը, երբ տեսաւ նրանց
բազմութիւնը:

Եւ ժամանակ չտալով որ իւր վրայ յար-
ձակուին, հրամայեց առաջին յարձակումը գոր-
ծել և շփոթեցնել արաբներին: Աղջիկներին
յանձնեց հինգ զինուորի, որ զգուշ պահեն և
աշխատեն շուտով կռուատեղից հեռացնել
ապա ահագին դղրդիւնով վրայ վագեցին ա-
րաբացոց վրայ և ճղելով նրանց շարքերը ճա-
նապարհ բացին և սկսան խռնուելով լետ նա-
հանջել: Արդէն բաւական տեղ հեռացել էին
երբ Աշոտ Երկաթը նկատեց, որ իւր զինուոր-
ներից մէկը ետ էր մնացել և ամբողջ գուն-
դը նրան էր պաշարել, այն ինչ այդ մէկը աջ
ու ձախ կոտորածներ էր անում և ուզում էր
հարթել իւր ճանապարհը: Բայց թշնամիները
շատ շատ են, նա յոգնում է, հազիւ է կա-
րողանում սուրը շարժել: Աշոտ Երկաթ ու-
զում է թռչել օգնութեան հասնել նրան,
բայց այդ ժամանակ տեսնում է թէ ինչպէս
տաս քսան մարդ ետևից գրոհ տալով բռնում
են նրան, խլում սուրը և ամուր չուաններով
կապկասում: Աշոտ Երկաթը իւր աչքերը դար-
ձնում է իւր խմբին, ում որ պտրում է, բայց
նա չկայ: Նրա աչքը հանդիպում է աղջիկնե-

րին, Ասողիկին, ապա նա խոր յոգոց է հանում
և քաշվում լետ:

Դաւիթը չկար նրա կտրիճների մէջ, նա
էր որ գերի բռնուեցաւ արաբներից, այն քաջ
զինուորն էր, որ պակասեցաւ և խոր կսկիճ
թողեց Աշոտ Երկաթի սրտում:

Այժմս ինչ պիտի անի խեղճ Ասողիկը
առանց Դաւիթի:

ԻՆՏ.

Աշոտ Երկաթը իւր կտրիճներով խոյս
տալով Իւսուֆի անթիւ բազմութիւնից, կէս
օրուան դէմ, կանգ առաւ Շիրակայ դաշտա-
վայրում, մի բլրի ստորոտին, որտեղից հեռ-
ւում երևում էր Արագած լեռան գագաթը,
որ դեռ ևս ծածկուած էր սպիտակ ձիւնով:

Տղերքը սկսեցին ճաշուան պատրաստու-
թիւն տեսնել, այն ինչ Աշոտ Երկաթը թիկն
տալով մի քարի, իւր պղտոր հայեացքը դար-
ձրել էր դէպի Արագածի բարձրութիւնները և
լուռ նայում էր նրան. ինչ էր անցնում նրա
հոգու մէջ յայտնի չէր, միայն նա սաստիկ
տխուր էր:

Նա նայում էր հեռուն դէպի ձիւնանման

բարձրութիւնը, դէպի Շիրակայ ընդարձակ դաշտավայրը, ուր այդ ժամանակ տիրում էր կատարեալ ամայութիւն և նրա սիրտը լուգվում ու սղտորվում էր. նա յիշում էր Շիրակի պտղաւէտութիւնը, նրա ցորենի արտերի շքեղ կանաչելը, այդ դաշտի միջի գիւղականների ուրախ երգն ու պարը, այն ինչ հիմա, նոյն այդ դաշտը, որ երբեմն Շարայի օրկորն էր լազեցնում, ներկայացնում էր մի սրտաճմլիկ ամայութիւն...

Սրդեօք քնչ պիտի լինէր դրա վերջը...

Կարծես մահաբեր հուրը մի ակնթարթում կոտորել էր բոլոր բնակիչներին և աւերել այն բերրի և պտղատու դաշտերը, որոնք ժիր ձեռքերի տակ պտղաբերվում և աճում էին...

Ապա նա փակում էր աչքերը, որպէս զի չնայի իւր երկրի ամայութիւնը, չը վրդովուի իւր սիրտը, բայց հէնց այդ ժամանակ նրա միտքը պաշարում էին աւելի զարհուրելի մտքեր. որոնք փշաքաղում էին իւր մարմինը:

Նա թագաւոր էր հայոց, դիւցազն էր. հայր իւր ժողովրդեան. նրա պարտքն էր խնամելու, փայփայելու և դարման անելու այդ ժողովրդի բազմաթիւ վերքերին... Բայց քնչ էր անում նա. կարողանում էր արդեօք խնա-

մել, գէթ ազատ պահել բազմաթիւ տառապանքներից... Ի՞նչ պիտի անէր մի դիւցազն, որի ձեռք ու ոտքը շղթայել էին, որի կեանքի դէմ դաւադրութիւններ և որոգայթներ էին լարում նոյն իսկ հայ նախարարները, և դրանով չբաւականանալով միանալով թշնամեաց հետ իրանց սուրը իւր դէմ էին դարձնում:

— Այո, ասում էր ինքն իրան Աշոտ Երկաթը, վաղ թէ ուշ ես կը խորտակեմ հայ նախարարների եսամուլութիւնը, վաղ թէ ուշ ձեռք կառնեմ ես մի զօրաւոր իշխանութիւն. հաստատելու, որից կահնածեն մեր թշնամիները և այլ ևս չեն համարձակի մեզ անհանգիստ անելու, բայց ինձ հարկաւոր է մի շատ կարճ ժամանակ հանգստութիւն, որպէս զի կարողանամ այդ բանը ի գլուխ ածել, ապա թէ ոչ ներկայիս անհնար է այդ:

Մի հոգեւորականութիւն ունինք, որի գլուխ է կանգնած Յովհաննէս կաթողիկոսը, որով կարելի էր ահագին փոփոխութիւններ անել, ուժովացնել օրինական թագաւորութիւնը, բայց այդ գլուխն էլ, լոկ միայն ողբով է անցնում իւր օրերը և իւր կեանքի ապահովութեան համար զանազան կողմը թափառում... Ի՞նչ անեմ ես միանակ, մի բուռն

քաջերով. Ժողովուրդը, հասարակ ժողովուրդն է որ ոյժ է կազմում, դրա մէջն է ազգի փըրկուծիւնը, բայց ներկայիս այդ ոյժը այնքան տառապած է, այնքան խոցուած, որ նախ պիտի դարման տանել նրա վրայ և ապա թէ վստահ նրա վրայ չենուել..

Վեր կացաւ Աշոտ Երկաթ թիկն տուած տեղից և շրջելով սկսեց ծրագիրներ կազմել, թէ քնչպէս պիտի կարենայ իւր մտադրուծիւնները ի կատար ածել և այդքան մանր իշխանութիւններից մի զօրաւոր մարմին կազմել:

Կերան, խմեցին, հանգստացան և փոքր ժամանակից յետոյ խումբը առաջ շարժուեց. բայց Աշոտ Երկաթի մտքից չէր անցնում Դաւիթը և նա մտածում էր մի հնարքով նրան դուրս կորզել անհաւատների ձեռքից: Նա ավստում էր այդ մարդուն, որ իւր հաւատարմութեամբ և քաջութեամբ առաջինն էր իւր կտրիճների մէջ:

Ազատած աղջիկներին և Ասողիկին Հռիփսիմեան վանքում տեղաւորելով մի քանի օրից յետոյ նա կրկին պտտում էր Մասեաց ստորոտներում, ուր կորցրեց Դաւիթին և ամեն կերպ աշխատում էր նրա մասին տեղեկութիւններ հաւաքել, բայց ոչ մի տեղից որոշ

ոչինչ չէր իմանում: Նա միայն լսում էր որ գերիներից մի մասին անխնայ կոտորում էին, իսկ միւսներին, որոնք քաջ և կորովի էին, ուղարկում էին Դուին սպարապետի մօտ, ուր ամեն տանջանքներ տալիս էին նրանց իրանց հաւատից խախտելու: Աշոտ Երկաթը մի փոքրիկ գումարտակ ջարդելուց յետոյ, բռնեց նրանցից մի քանիսին և սկսեց հարց ու փորձ անել:

— Ասա, անհաւատ, դու տեղեկութիւն չունիս Դաւիթի մասին, ո՞ւր է, նա կենդանի է թէ մեռած:

Ձինուորները դեռ լուռ էին, բայց խաղաղանի հարուածները նրանց խօսեցնել տուեց:

— Մի վախէք, խօսեցէք, ես կընծայեմ ձեզ ձեր թշուառ կեանքը..

— Ո՞ր Դաւիթը, այն որ գերուեցաւ վանքի կռուի ժամանակ:

Այո՛, հէնց նա:

— Նրան արդէն տարան Դուին, սպարապետի մօտ: Այնտեղ նրան մեր հաւատի կը բերեն, այդպէս քաջը ավստս է, որ ձեր պիղծ հաւատն ունի:

— Լռի՛ր, անհաւատ, նա այն մարդը չէ, որ իւր հաւատն ուրանայ:

— Տանջանքները նրան խելքի կը բերեն:

— Ի՞նչ է, դու չե՞ս ուզում լուել, ինչպէս երևում է կեանքը քեզ ձանձրացրել է, իմացէք ուրեմն որ մենք էլ ենք ձեզանից տանջելու ձևերը սովորել: Տղերք, դարձաւ նա իւր զինուորներին, սրանց գլխի վայր կախեցէք և մտրակների համը ցոյց տուէք:

Ձինուորները մերկացրին նրանց, ապա գլխի վայր կախելով պատրաստեցին ճիւղտները: Արաբ զինուորները դեռ լուռ էին և սարսափահար նայում էին Աշոտ Երկաթին, արիւնը կամաց-կամաց լցվում էր նրանց աչքերում, որոնք սկսում էին դուրս թափուէլ և սոսկալի կերպարանք ստանալ: Ճիւղտների հարուածը լսուեցաւ նրանց մերկ մարմնի վրաց և արիւնը սկսեց առատութեամբ բղխել վերքերից, ցաւը սոսկալի էր. մինչև այդ ժամանակ նրանք լուռ էին, բայց այժմ սկսան բառաչել և գթութիւն խնդրել:

Ճիւղտների հարուածները դեռ շարունակվում էր—գթութիւն, խղճացէք, կանչում էին նրանք աղիողորմ ձայնով:

— Դադարեցրէք, ասաց Աշոտ Երկաթը, երբ լսեց նրանց աղիողորմ բառաչիւնը և տանջանքը. քաջի սիրտը չգիմացաւ իւր թշնամեաց սոսկալի տանջանքը տեսնելով:

ԻԳՊ.

Արշալոյսը նոր ուզում էր բացուել, արդէն արևելեան հորիզոնի վրայ նկատելի էր լուսոյ թույլ շողշողմունքը, բոպէ առ բոպէ սլարզոււմ, պայծառանում էր հորիզոնը, բայց աղօտ խաւարը դեռ տիրապետում էր երկրին: Բագրևանդայ Ս. Քրիգոր վանքի շրջակայքում տիրում էր խորին խաւար, տեղ տեղ միայն թփերի ու մայառների մէջ լուռ էին մի տեսակ թույլ ձայներ. արտուածները թափահարում էին թևերը և ապա այգտեղից նետի արագութեամբ դուրս էին սլանում և թռչում վեր, իսկ այնտեղից սկսում էին երգել իրանց տաղերը... Տխուր և լուսահատ էին այդ տաղերը:

Հէնց այդ միջոցին Ս. Քրիգորի վանքի բեմի առաջ ինչպէս մարմնացած արձան, ծունկ էր չոքած ծերունի վանահայր Տէր Մարտիրոսը և ձեռքերը դէպի երկինք պարզած աղօթում էր... Անշքացած եկեղեցու բեմի վերայ դրուած էր Քրիստոսի խաչելութիւնը, որի առաջ վառոււմ էր կանթեղը և իւր թույլ լոյսով լուսաւորում էր խաչելութիւնը և աղօթող ծերունուն:

Խորին գերեզմանական լռութիւնը տիրում էր չորս կողմը:

Երբեմն երբեմն միայն շարժւում էր ծերունի վանահօր այեգարդ մօրուսը, որի վրայ մերթ ընդ մերթ գլորւում էին արտասուքի կաթիլներ և թրջում քարէ յատակը...

Ջերմ և զգացուած էր վանահօր աղօթքը. նա աղօթք չէր ձևի համար, ո՛չ, այլ նա մոռացած իւր դոյութիւնը, մոռացած աշխարհը, մոռացած ուրախութիւնն ու տառապանքը, իւր ամբողջ էութեամբ ամփոփուած էր միայն այդ աղօթքի մէջ:

Յանկարծ նրա շրթունքները շարժուեցան և մեռելային լռութեան մէջ լսուեցաւ նրա ձայնը.

— Եւ, Տէր, ասում էր նա, տուր ինձ ոյժ իմ տկար բազուկներին և իմ հոգուն աւրիութիւն, որ ես կարողանամ ի կատար ածել իմ մտադրութիւնները... Անմեղ ժողովուրդը տառապում է, նա հալածւում է անօրէններից Քո սուրբ անուան համար, տուր ինձ կարողութիւն որ ես կարողանամ մտնել ժողովրդի մէջ, ոգևորել նրան Քո խաչը ձեռքիս, որ նա մի սիրտ, մի հոգի դարձած կըռուի իւր հալածիչների դէմ... Տէր, խնայիր Քո ժողովրդին, խնայիր այդ տառապեալ ժո-

ղովուրդը, միութեան և համերաշխութեան ոգի ներշնչիր Պու նախարարների մէջ, որ նրանք ձեռք մեկնեն օրինական թագաւորին, Աշոտ Երկաթին և այդպիսով դուրս հալածեն թշնամիներին, Տէր, խնայիր մեզ... Ապա նա նայում էր խաչելութեանը ու հոգեկան բուռն ալիքները երևում էին նրա դէմքի վրայ:

Նրա աչքերը լցվում էին ոգևորութեամբ, երակների մէջ կարծես վազում էին թարմ և երիտասարդական արիւն. ծերութեան կնճիղները կարծես անհետանում էին նրա դէմքի վրայից: Մի տեսակ գերբնական զօրութիւն կամաց կամաց ներս էր շնչւում նրա երակների մէջ:

Այդ իսկ միջոցին լուսոյ աղօտ լուսաւորութիւնը տարածուել էր վանքի մէջ: Վանահայրը վերջին անգամ իւր «Հայր մերը» մրմնջաց, վերջին անգամ համբուրեց խաչելութիւնը և վեր թռաւ տեղից, կարծես 20 — 30 տարով ջահէլացած:

Այդ միջոցին վանքի դուռը կամաց յետ բայուեցաւ և երևեցաւ Տէր Մարտիրոսի ծառան:

— Հայր սուրբ, ձիաները սլատրաստ են, աւայ նա:

— Այս րոպէս, որդի, ասաց նա և դուրս

եկաւ վանքից: Մի փոքր ժամանակ անց վանահայրը և իւր ծառան Հեծնելով ձիերը, թողին վանքը: Երկար ժամանակ նրանք առաջ էին գնում մինչև որ կէսօրուան դէմ կանգ առան մի գիւղում, որ մի փոքր հանգստանան և ապա կրկին ճանապարհները շարունակեն:

Գիւղի մեռելութիւնը Մարտիրոս հոր վրայ սաստիկ վատ տպաւորութիւն թողեց: Այստեղ այնտեղ գետնափոր խրճիթների միջից երբեմն երևում էին գլուխներ, որոնք երկիւղով նայում էին ճանապարհորդներին:

Գիւղի մէջտեղը կանգ առաւ Մարտիրոս հայրը և նրան խփոյն շրջապատեցին գիւղականները և սկսան նրա աջը համբուրել. խեղճերը նրա այեզարդ մօրուքից խաբուելով կարծում էին թէ եպիսկոպոս է շնորհ բերել իրանց գիւղը ու նրանցից ամեն մէկը ձիուսանձը բռնելով խնդրում էին իրանց տուն հանգստանալու:

— Ո՛ւր է գիւղի քահանան, հարցրեց Մարտիրոսը:

— Հայր սուրբ, գիւղի քահանային դեռ անցեալ տարի սպանեցին անօրէնները, մենք այժմ քահանայ չունինք:

Մարտիրոս հայրը ոչինչ չպատասխանեց

նա իջաւ ձիուց և մտաւ հանդիպակաց խրճիթը: Գիւղականները մտան ներս և շրջապատեցին նրան: Գիւղականները բոլորը տխուր և յուսահատ էին, խորին թախիժը պատել էր նրանց դէմքերը, նրանք և իրանց երեխաները մերկ և բոկոտն էին, մի քանի ցնցոտիներ միայն ծածկում էին նրանց մարմինը:

— Ի՞նչպէս էք, գաւակներս, հարցրեց Մարտիրոսը, թէև համոզուած էր, որ տըրտունջից աւելի ոչինչ չպիտի լսի:

— Է՛հ, հայր սուրբ, ինչպէս տեսնում էք՝ սոված, քաղցած, մերկ և տանջուած: Ամեն բան խլեցին մեզանից անօրէնները, ամեն բան տարան, ամեն անդթութիւն գրծեցին, մեր մէջ էլ չմնաց ոյժ, գօրութիւն տանելու այսչափ տառապանքները: Խփը ժանգոտուեց, դաշտերնիս մնաց առանց վարելու, առանց ցանելու, հացերնիս սկսում է պակասել: Մեր տէրը դուք էք, եթէ դուք օգնութիւն չանէք, մենք կորած ենք:

— Մի յուսահատուիք, գաւակներս, յոյսներդ դրէք Աստուծոյ վրայ, նա է գթածը և ողորմածը, կարճ ժամանակ կանցնի և ամեն տառապանքներ կը վերջանան, հնազանդ եղէք միայն ձեր թագաւորին, կաթողիկոսին, ահա ես գնում եմ ընկնելու Աշոտ Երկաթի և կա-

Թողիկոսի ոտքերը, որ մի ճար անեն ազգի փրկութեան համար:

— Օրհնեալ լինիք, հայր սուրբ, որ կանգնած էք ժողովրդի համար և նրա մասին էք հոգում:

Այդ ժամանակ հայր սուրբի համար բերեցին սև բոքոնի կտոր և մի քանի խաշած ձու:

— Ներողութիւն կանէք, հայր սուրբ, գիւղի մէջ սրանից աւել բան չգտանք ձեզ պատուելու, սոսայ տանտէրը, որ մի պատկառելի ծերունի էր:

Հայր սուրբը ժպտաց:

— Ի՞նչ հարկաւոր է ինձ համար շքեղ ճաշեր, քանի որ իմ ժողովուրդը տառապում է: Ժողովրդի թէ ցաւը և թէ ուրախութիւնը մերն է, մենք աւելի սոված պիտի մնանք, երբ տեսնում ենք որ մեր ժողովուրդը սոված է:

Համեստ ճաշը վերջացրեց Մարտիրոս հայրը, քաջալերեց յոյս տուեց գիւղականներին և ապա կրկին ճանապարհը շարունակեց:

ԻՊ.

Մասեաց ստորոտում Դաւթին ձերբակալելուց յետոյ, նրան շղթայեցին և ձգելով վանքի ախոռներից մինի մէջ, պահտպաններ կարգեցին: Անցաւ ամբողջ օր, բայց գեռ Դաւիթը մի պատառ հաց չէր դրել բերանը, բայց հոգեպէս ամեննին ընկճուած չէր, ինչ փոյթ թէ ինքը բանտարկուած էր, ինչ փոյթ թէ իրան մաս-մաս կը կտրատեն անօրէնները, գոնէ նա սգատեց Աստղիկին, վերջին անգամ տեսաւ նրան: Իւր գրութիւնը մոռացած նա միայն իւր Աստղիկի վրայ էր մտածում, նա չնկատեց անգամ թէ ինչպէս ախոռի դուռը լետ բացուեցաւ և մի զինուոր նրա առաջը դրեց խեցէ ամանով կեղտոտ ջուր և հացի փշրանքներ:

Սրբաբ զինուորը կանգ առաւ մի փոքր և տեսնելով նրա մտախոհ դէմքը ասաց.

— Հը, անհաւատ շուն, ինչ ես մտածութեանց մէջ ընկել, ո՞ւր գնաց քո քաջութիւնը, որ մահիցդ առաջ այդպէս սարսափի մէջ ես ընկել:

Դաւիթը ոչինչ չպատասխանեց, ապա տեսնելով իւր առաջը դրուած հացի կտորտանքը և խեցիով ջուրը, ժպտաց:

— Հը, քնչ ես ժպտում, բաւական չեմ
դրանով. ձեզ նման շներին սո՛ված պէտք է
սպանել ուր մնաց թէ հաց ու ջուր տալ:

— Ձեռ կորչի այստեղից, ասաց Ռաւիթը,
ցանկանալով վերջ դնել նրա վայրահաջութեանը
և իւր հրացայտ աչքերը ուղղեց զինուորի
վրայ:

— Սպասիր, շուտով քո կաշին էլ կը
քերթենք, ամսոս միայն որ մեր իշխանը չի
թոյլ տալիս քո դատաստանը այստեղ անել,
բայց վնաս չկայ, Ռուինումն էլ չես սգատուի
մահից. ասաց զինուորը և գուրս գնաց:

Չանցաւ մի քանի ժամ և ահա նա զգաց,
որ ով որ աքացի է խփում իրան: Շփոթուած
վեր թռաւ տեղից իւր սորը միտն եկաւ և
ձեռքը անգիտակցօրէն դէպի գօտին աարաւ,
բայց սուրը չկար, նրա տեղը շղթաներն էին
գնդգնդում. խելքի եկաւ նա, իւր գերութիւ-
նը մտաբերեց և յաղաղած աչքերը շուրջը
դարձրեց: Կանթեղի թույլուսաւորութեան տակ
հինգ թէ վեց զինուոր նկատեց սրերը և նի-
գակները ձեռքերնին, որոնցից մի քանիսը վը-
րայ ընկնելով նրան պինդ չուաններով սկսե-
ցին կապկապել. շղթաներով գոհ չէին, պա-
րաններով էլ էին կապում: Ռաւիթը լուռ
թույլ էր տալիս իրան կապկապելու:

Կապկապելուց յետոյ նրան ձի նստացրին
և լիսուն զինեալ զինուորներով ճանապարհ ըն-
կան: Սթուլթեան մէջ Ռաւիթը ճանապարհնե-
րին էր նայում. նա հասկացաւ, որ իրան Ռուին
են տանում, ուր նստած էր Իւսուֆը: Չգուժ
էր Ռաւիթը, որ Ռուին ընկնելուց յետոյ, էլ
փրկութեան յոյս չկայ, ուստի նա ոյժ էր ա-
նում պարաններն ու շղթաները կտրատելու,
բայց նրանք շատ ամուր էին: Ա՛խ, եթէ ա-
զատ լինէր և իւր սուրը ձեռքն ունենար,
այն ժամանակ վայ իրան շրջապատողներին,
հոգ չէր թէ դրանք լիսուն հոգի էին, իսկ
ինքը միայնակ:

Միւս օրը երեկոյեան դէմ նրանք Ռուին
մտան: Ռաւիթը սպասում էր տաժանելի չար-
չարանքների և խոնաւ ու մուլթ բանտի,
բայց շատ զարմացաւ, երբ ետ արին չուան-
ները թողնելով միայն երկասթէ շղթաները և
իրան մի մաքուր սենեակ տանելով, պատուա-
կան ճաշ հրամայեցրին իրան:

— Նայենք, այս ճաշը դեռ ուտենք, տես-
նենք յետոյ քնչ է գուրս գալիս, բայց այս
ընդունելութիւնը լաւ նշան չէ, մումուաց
ինքն իրան Ռաւիթը: Այնքան դիւր եկաւ ճա-
շը, որ քիչ մնաց ամաններն էլ հետը ուտէր:
Անցաւ մի քանի օր և ահա նրա սենեա-

կի դուռը բացուելով ներս մտաւ մի մարդ սպիտակ չալմալով: Այցելուն մօտեցաւ Դաւթին և նստելով նրա մօտ ասաց.

— Ողջոյն քաջին. մեծ սպարապետ Իւսուֆը լսելով քո քաջութիւնները հիացած է մնացած. թող Ալլահը աւելի ոյժ և կարողութիւն տայ քո բազուկներին, բայց թող քո պիղծ հաւատը և ընդունիր Մուհամմէդի սուրբ և ճշմարիտ կրօնը և այնժամանակ Իւսուֆը իւր աչքի լսի պէս կը պահի քեզ և մեծամեծ ընծաներ կը տայ...

— Հա՛. հա՛... հա՛... մի քրքիջ արձակեց Դաւթիժը, այ թէ ինչքի համար էր Իւսուֆն ինձ պատիւներ տալիս, իսկ ես այնքան չիմար էի, որ այդ չէի էլ մտածում:

Բարկութեան ներկը անցաւ մօլլի դէմքով, բայց նա զսպեց իրան:

— Գեաւուրներ, մինչև երբ պէտք է մուրրուած մնաք և չճանաչէք ճշմարիտ հաւատքը, մթթէ չէք տեսնում ձեր երկրի աւերմունքը, ժողովրդի տառապանքը, որ կրկին այդպէս յամառում էք:

— Մօլլա, լաւ կը լինի այստեղից պոչդ հաւաքես և գնաս, եթէ չես ուզում որ փորիդ աքացի տամ: Գնա՛, յայտնիր Իւսուֆին ինչ անելու է, թող անի, ես նրանցից չեմ, որ

մահից վախենամ և ընդունեմ ձեր պիղծ հաւատք:

Մօլլան նզովելով Դաւթին դուրս գնաց սենեակից. նոյն երեկոյեան Դաւթին ձգեցին մուլթ և խոնաւ բանտը, երկու օրը միտնգամ տալով նրան ցամաք հաց և ջուր. բայց Դաւթի չէր յուսահատվում. նա պատրաստվում էր ընդունելու ամեն տեսակ չարչարանք. նա յիշում էր Սմբատ արքայի տանջանքները, երկնային պսակը և աւելի ոգևորվում:

Անցաւ մի քանի ամիս և նա դեռ տանջւում էր բանտի մէջ և ամեն անգամ երբ դալիս էին նրա մօտ Իւսուֆից ղրկածները, որոնք խոստանում էին նրան մեծամեծ պարգևներ, միայն թէ հաւատը ուրանայ, նա կոպտութեամբ յետ էր մղում նրանց: Բայց բանտի խոնաւութիւնը և սնունդի պակասութիւնը ազդում էին նրա առողջութեան վրայ. օր աւուր այդ աժդահայ մարդը հայվում էր և մաշվում:

Տարան մի անգամ էլ Իւսուֆ սպարապետի մօտ, որ զրկեց քաջին, ոսկի և իշխանութիւն խոստացաւ նրան, եթէ իւր հաւատը կուրանայ, բայց Դաւթի կրկին անզրդուելի մնաց: Իւսուֆը բարկացաւ և հրամայեց միւս գերիների հետ միասին գոխատել նուև Դաւթին:

Վաւիթը վերադարձաւ բանտ լի յոյսով, որ վաղը առաւօտ կարժանանայ նահատակութեան պսակին:

Բայց գիշերը շատ երկար էր քաշու՛մ դանդաղ ինչպէս յաւիտենականութիւն անցնում էր ժամանակը: Վաւիթն արթուն էր և սպասում էր արշալոյսին, բայց իւր բանտի միակ լուսանցքը դեռ չէր լուսաւորվում աղօտ լոյսով. խաւար էր շուրջը, խաւար էր նրա սրտի մէջ, կսկիծը, վիշտը, տառապանքը, դառն և անմխիթար լիշողութիւնները մորմոքում էին նրա հոգին...

Եւ յանկարծ խորին լուռութեան մէջ նա մի սուր ձայն է լսում, որ փշաքաղում է նրա մարմինը նա գլուխը վեր է բարձրացնում: Երկաթապատ բաց պատուհանից լսում է գորտի սուր կռկռոցը որ մօտենալով պատուհանին, մահապարտին իւր վերջին ողբն էր կարդում: Վաւիթը սառսռում է և երանի տալիս գորտին, որ այնպէս ուրախ կռկռում է. նա սիրում էր այդ գորտին, որ այնպէս յաճախ իւր նուագներն էր սարքում և իւր վերջին ժամերը մխիթարում: Բայց շուտով գորտն էլ լռեց ու կրկին տիրեց լուռութիւնը: Ա՛խ, սուր է թէ շուտ լուսանար, նա ծունկ չոքեց և աղօթել սկսեց, ահա բանտի դռները

ըր բացուելով երևաց դահիճը: Սառնասրտութեամբ նայեց նա դահճին և նրան հետևեց: Երբոր նա հասաւ այն հրապարակին, ուր պիտի կատարուէր իւր գլխատումը, սոսկալի պատկերը ցնցեց նրա ուղեղը, քառասուն թէ յիսուն հոգի՛ մարդ, կին, աղջիկ, ռամիկ թէ իշխան, պինդ շղթաներով կապած բոլորաձև մի շրջան էին կազմել, որոնց գլխներին վայրենի գազանների նման պտըտում էին դահիճները մերկ սրերը ձեռքերնին:

Ձարհուրանքը պատեց նրան երբ տեսաւ գերեալների գունատ և սոսկումով պատած դէմքերը, իսկ այդ գերիների մէջ իւր կրտսեր եղբօրը՝ Գուրգենին: Երկու եղբայրների հայեացքները հանդիպեցան իրար և նրանք վրայ վազելով փորձեցին գրկել միմեանց: Վահիճները Իւսուֆի հրամանով, սկսեցին իրանց գործը: Երջանում կանգնողից մէկի արիւնաթաթախ գլուխը վայր գլորուեց. վերջին անգամ բաց ու խուր եղաւ սպանածի աչքերը և ապա դադարեց նա և իւր սարսափով լցուած աչքերը յառեց դատապարտեալների վրայ:

Սոսկումը և զարհուրանքը փշաքաղեցին խեղճ գերեալներին, որոնք մէկ մէկ ընկնում էին ցած և օրհնելով Աստուծոյն

աւանդում հոգիները. . . Հերթ հասաւ Դաւթին:

— Աւրացիք քո պիղծ հաւատը և ազատիք քեզ, կրկնեց Իւսուֆը:

— Այ, շեմ ուրանայ հաւատս. ես քրիստոնեայ եմ: Իւսուֆը նշան տուեց և դահիճը մօտեցաւ Դաւթին. սա վերջին անգամ նայեց իւր եղբօրը և նկատելով նրա մահուան գունատութիւնը. երկիւղ կրեց թէ նա կը թուլանայ իւր հաւատից, ուստի դիմելով նրան, ասաց:

— Եղբայր իմ, զոհիր քեզ Քրիստոսի սիրոյն, ինչպէս նա զոհեց իւր կեանքը մեզ համար:

Գուրգէնը առաջ ընկաւ և ներկայացրեց վիզը դահճին:

— Դահիճը կտրեց նրա վիզը և քիչ յետոյ Դաւթին գլխատեց: Ընկաւ քաջի գլուխը առանց մի ձայն, մի տրտունջ հանելու...

Այս նահատակների յիշատակը եկեղեցին տնօրում է յունիսի Յ-ին:

ԻԵ.

Ինչ էր անում այդ միջոցին հայոց Յովհաննէս կաթողիկոսը, որ կարող էր մեծ դեր խաղալ իւր ահագին ազդեցութեամբ. նա անդադար փոփոխում էր իւր տեղը և վերջին ժամանակներս գտնվում էր վրաց երկրում, Ատրնեսրեսի հովանաւորութեան ներքոյ և այնտեղից ողբում էր իւր ազգի թշուառութիւնը: Մի երեկոյ նրան յայտնեցին, թէ Բագրևանդի սուրբ Գրիգոր վանքի վանահայրը ցանկանում է տեսնել իրան:

Կաթողիկոսը հրամայեց ընդունել նրան: Ներս մտաւ Մարտիրոս հայրը և ծունկ չօքելով կաթողիկոսի առաջ համբուրեց նրա աջը:

— Վեր կաց, ծերունի և պատմիր թէ ինչ լուր ունիս դու կարօտ հայրենիքից և թէ ինչը բերեց քեզ ինձ մօտ:

Մարտիրոս հայրը վեր կացաւ և սկսեց պատմել այն թշուառութիւնները, որոնց ենթակայ էր եղել ազգը ապա նա համարձակ դիմելով կաթողիկոսին ասաց.

— Ազգը ձեզ, վեհափառ տէր և Աշոտ Երկաթին է կարօտ: Աշոտ Երկաթը միայնակ է և ձեր օգնութեան է կարօտ, դուք միայն

X

X

գլուխ պիտի կանգնիք, կոնդակներ ուղարկէք ամեն կողմ և ոգևորէք ազգը: Զեր պարտքն է ազգի մէջ ցրիւ տուած ոյժերը միացնելու. հոգևոր գլուխը դուք էք, դուք պիտի քարոզէք նրանց միութիւն և համերաշխութիւն, ապա թէ ոչ ազգը կորած է. կը կորչի ազգը, կը կորչի և կաթողիկոսութիւնը: Մեր թշնամիները հողի համար չեն կուռում, այլ կրօնի, հաւատի համար. այդ է արաբաց ջանքը: Մեր թշնամիները շատ լաւ գիտեն, որ եթէ մենք կրօնով միանանք արաբների կամ յոյների հետ, մեր երկիրն էլ նրանցը կը դառնայ:

Պէտք է յիշենք հինգերորդ դարը, այն կրօնական պատերազմը, որ Վարդան Մամիկոնեանը իւր քաջերով մղեց Յազկերտի դէմ: Հինգերորդ դարում պարսիկներն էին աշխատում մեր հաւատը խախտել, իսկ այժմս արաբներն ու յոյները: Հինգերորդ դարում էլ ունէինք դաւաճաններ՝ Վասակներ և Մեհրուժաններ, այժմս էլ ունինք Գագիկներ և Աշոտներ... հինգերորդ դարումն էլ ունէինք քաջ զօրապետ, ինչպիսին երևելին Վարդանն էր, այժմս էլ ունինք Աշոտ Երկաթ, օրինական թագաւոր, որ շուարել մնացել է և երկնքից է օգնութիւն սպասում. այժմս մեզ միայն մի բան է պակասում, որ նմանուինք

ճիշտ հինգերորդ դարին, այդ Ղևոնդ Երէցի պակասութիւնն է, որ չկայ մեր մէջ: Ո՛ւր է այժմս Ղևոնդը, որ իւր անուշաբօյր քարոզներով ոգևորի մեզ—չկայ նա: Գուք, վեհափառ տէր, որ գլուխ էք կանգնած հոգևորականութեան, դուք պիտի ձեր անձնական օրինակով ոգևորէք ազգը, որ նա չկորչի. նա ձեզ է սպասում...

Կաթողիկոսը լուռ լսում էր նրան: Վերջացրեց Մարտիրոս հայրը, իսկ կաթողիկոսը դեռ լսում էր. նա կարծում էր թէ դեռ հայր Մարտիրոսը խօսում է և իւր հոգւոյ մէջ թողնում մի մի սուր սլաք: Յիրաւի կաթողիկոսի հոգու մէջ բացուեցան հին հին վերքերը և յուզեցին թշուառ ծերունուն... Այդ ըստէին նա ազգի ցաւերով էր ցաւում, նրա տառապանքներով տառապում, բայց միւսնոյն ժամանակ զգում էր, որ բաւական չէ միմիայն լալ, ողբալ, այլ նաև հարկաւոր է ցաւերին դարման տանել, վերքերը բուժել: Մարտիրոս հօր խօսքերը սուր սլաքի նման ցցուեցին նրա սրտում և նա դիմելով նրան, ասաց դողդոջիւն ձայնով.

— Այո, ծերուկ, ես գլուխ եմ կանգնած ազգի, բայց մինչև օրս միայն ցաւելով եմ անցրել օրերս. գնա, որդի, դու էլ մտիր ժու

ղովրդի մէջ և քարոզիր նրանց, ոգևորիր նը-
րանց երկնային լոյսով, իսկ ես, ինչքան թոյլ
կրտան իմ տկար ոյժերս, կ'ընկնեմ նախա-
րարների ոտքերը, կաղաչեմ, կը պաղատեմ
և կը հաշտեցնեմ նրանց իրար հետ, որ պաշտ-
պանեն օրինական թագաւորին:

Մարտիրոս հայրը դուրս եկաւ կաթողի-
կոսից գոհ սրտով և համարեա վաղելով իւր
օթեւանը, դարձաւ իւր ծառային և ասաց ու-
րախ ուրախ.

— Ծառուկ, շտապով պատրաստիր ձիերը,
մենք իսկոյն պէտք է ճանապարհ ընկնենք:

— Ի՛նչ կայ, հայր սուրբ, որ այդպէս
շտապում էք, հարկաւոր է մի փոքր հանգս-
տանալ, պատասխանեց ծառան զարմացմամբ
նրա այլայլուած և ոգևորուած գէմքը զի-
տելով:

— Պէտք է շտապել որդիս, պէտք է
շտապել, մենք շատ գործ ունինք կատարե-
լու, ժամանակը շատ սուղ է:

Ծառուկը գլուխը քորեց և լուռ գնաց
ձիաները պատրաստելու:

Կարճ ժամանակից յետոյ նրանք իրանց
երեսները գէպի Արշարունիք դարձրած մտա-
խոհ առաջ էին գնում:

Ի՛նչ էր մտածում Տէր-Մարտիրոսը, յայտ-

նի չէ, միայն թէ ամեն մի գիւղում նա եր-
կար կանգ էր առնում, քարոզներ խօսում,
ոգևորում և նրանց միջից գէնք բանեցնող
երիտասարդներից խմբեր կազմելով, կարգում
էր նրանց վրայ մի-մի մեծաւոր և ապա շա-
րունակում ճանապարհը...

Ի. Գ.

Յուրա ձմեռը վրայ հասաւ: Փչեցին սա-
ռը քամիներ, սար ու ձոր ձիւնով ծածկեցին
և սառցէ հաստ կեղևով պատեցին Հայաստա-
նը: Բուքը սկսեց ձեան հետ խաղալ, իւր պա-
քը բռնել և իւր անախորժ ոռնոցը սկսել...
Վայ էր այդ ժամանակ խեղճ, տառապեալ
ժողովրդի դրուժիւնը, որ հէնց նոր շունչ էր
քաշել սովի ձեռքից և այժմս ցուրտ սառնամա-
նիքի գէմ էր կուռում:

Առաւօտ էր: Արևը նոր դուրս էր եկել
և իւր ճառագայթները սփռել էր սպիտակ
տարածութեան վրայ:

Այդ միջոցին Արշարունիք գաւառից գէ-
պի Երրակ գաւառը տանող ճանապարհի վրայ
երևում էին մօտ երկու հարիւր հետիոտ ու-
ղևորներ, որոնք շնայած ցրտի սաստկութեան,

ուրախ զրոյց անելով իրար Հետ առաջ էին գնում: Կորովի և քաջ տղամարդիկ էին գրանք, բայց ամենքն էլ գիւղական պարզ հազուստներով և մորթէ ահագին գլխարկներով: Նրանք ամենքը զինուորուած էին զանազան տեսակ զէնքերով, նրանցից որը սուր ունէր կապած մէջքին, իսկ ոմանք երկայն նիզակներ ունէին: Նրանց առաջ գնում էր ոտքից ցլուխ զինուորուած մի յաղթանգամ երիտասարդ, որ շարունակ խօսում էր իւր մօտ գնացող ծերունի հոգևորականի Հետ:

— Հայր սուրբ. ի՞նչ ես կարծում, կարող է արդեօք կաթողիկոսը հաշտեցնել մեր իշխաններին և նրանցից միացած ոյժ կազմել, հարցրեց խմբի առաջնորդը իրան մօտ գնացող հոգևորականին, որ մեզ ծանօթ վանահայր Մարտիրոսն էր:

— Ես յոյս ունիմ, իշխան, պատասխանեց Մարտիրոս հայրը. մեծ է Աստուծոյ զօրութիւնը, կը գայ ժամանակ, որ նրանք կը հասկանան իրանց բռնած կորստաբեր դիրքը և կը միանան: Մեզ մի մարդ էր հարկաւոր, որ այդ բանին գլուխ կանգնէր, քարոզէր միութիւն և այդ մարդը կաթողիկոսն է: Նա մեծ բան կարող է անել, եթէ գործ դնի իւր բոլոր ճարտարութիւնը:

— Դժուար, այն դիրքը, որ այժմս բռնել են և այն յարուած յարաբերութիւնը, որ նախարարներն ունին իրար Հետ, համարեա թէ անկարելի են անում միութիւնը:

— Ինչո՞ւ չպիտի միանան, քանի որ այդ իրանց շահն է պահանջում. Մի՞թէ նրանք չեն հասկանալ, որ եթէ չմիանան, այն ժամանակ արտաքին թշնամին մէկ-մէկ կ'ոչնչացնէ նրանց:

— Եսականութիւնը և անձնասիրութիւնը այն աստիճան զարգացած է նրանց մէջ, որ նրանք այդ մասին ամենևին հոգս էլ չեն անում: Նրանց միակ մտածութիւնը այն է, որ իրանք հանդիստ լինին, որսի գնան, քէֆ անեն և իրարու ոտքի տակ փորելով իրար ձեռքից հոդերը յափշտակեն:

— Ո՞ր մէկ օրինակը ասեմ քեզ. Գազիկ Արծրունին, որ բռնութեամբ թագաւորութիւնը յափշտակեց և այժմս ով գիտի թէ ի՞նչ է մտածում: Աշոտ սպարապետը՝ Աշոտ Երկաթի հօրեղբօր որդին՝ որ նստած է Գուլիս Իւսուֆի մօտ և յարմար ժամանակի է սպասում, որ յափշտակի օրինական գահը, և վերջապէս Գուգարաց, Տայոց, Սիւնեաց և հազար ու մի մանր մունր իշխաններ, որոնք չեն ուզում ճանաչել Աշոտ Երկաթին: Ի՞նչ պիտի

լինի Աշոտ Երկաթի զբուժիւնը, եթէ դրանք կրկին շարունակեն իրար դէմ և Աշոտ Երկաթի դէմ զինուել:

— Ինչ պիտի լինի — ոչինչ, թող շարունակեն մինչև որ իրանց պատիժը կը ստանան: Թող Աշոտ Երկաթի կողմը ժողովուրդը լինի, ահա այս կտրիճները, որոնց մէջն է ոյժը, ասաց Մարտիրոսը և մատով իրանց հետևող խմբին ցոյց տուեց:

— Շատ լաւ ես ասում, հայր սուրբ. իսկ եթէ նրանք սկսեն և դրանց արգելք դնել, այն ժամանակ ինչ կը դուրս գալ միայն Այրարատեան երկրի մի բուռն ժողովուրդով, որ առանց այն էլ հլու հպատակ է Աշոտ Երկաթին:

— Իսկ ինչ ենք շինում մենք, կաթողիկոսը: Մենք մեր տէրունական խաչով ոտքի կը կանգնեցնենք ամբողջ ազգը և ճանաչել կը տանք օրինական թագաւորին, այն ժամանակ վնջ իշխաններին, վնջ մատնիչներին, պատասխանեց Մարտիրոս հայրը և երկունս էլ լուռ կացան:

Օրն արդէն թեքուել էր, երբ նրանք հասան մի գիւղի, որի գետնափոր խրճիթները հազիւ երևում էին ձիւնի տակից: Նրանք կանգ առան: Հէնց այդ միջոցին խրճիթներից

դուրս թափուեցան մարդիկ, որոնք լուռ կանգնեցան իշխանի և Մարտիրոս հոր շուրջը:

— Հը, որդիք, ինչպէս էք, հարցրեց Մարտիրոս հայրը:

— Գոհութիւն Աստուծոյ, լաւ ենք, հայր սուրբ և մեր տղայքն էլ պատրաստ են ձեր հրամայը կատարելու, ասաց գիւղացիներից մէկը, որ ըստ երևութին գիւղի մեծը պիտի լինէր:

— Շատ բարի, շատ լաւ, հրամայիր թող դան, միանան այս կտրիճների հետ:

— Տղայք, գնացէք, մի փոքր հանգստացէք և ապա պէտք է ճանապարհներս շարունակենք, ասաց իշխանը դիմելով իւր խմբին, իսկ ինքը հայր սուրբի հետ, ուղևորուեց գէպի գիւղի մեծաւորի տուն: Գեռ մի քանի քաջ չարած նրանց հանդիպեց երեսուն մարդուց բաղկացած մի խումբ, որոնք տեսնելով հայր սուրբին, ակնածութեամբ գլուխները մերկացրին:

— Այրիք զաւակներս, այժմ գնացէք մի փոքր հանգստացէք մինչև որ ձեզ հրաման կը տան մեզ հետ ճանապարհ գնալու, ասաց Մարտիրոս հայրը այդ խմբին, որ եկել էր միանալու մեր խմբին և ապա դառնալով գէպի գիւղի մեծաւորը, ասաց:

— Ապրիս, լաւ խումբ ես պատրաստել:
Նրանք մտան խրճիթ և սկսեցին հա-
մեստ ճաշը վայելել: Խօսակցութեան նիւթը
Աշոտ Երկաթն էր, որին օգնութիւն էին
գնում նրանք: Յանկարծ գիւղացիներէց մէկը
ներս ընկաւ և լեղապատառ կանչեց.

— Հայր սուրբ, մենք կորանք, հեռու,
գիւղի սահմանում երևում են ձիաւոր մար-
դիկ, վախենում եմ, որ Իւսուֆի գունդը լինի:

— Մի վախենաք, որդիք. ասաց հայր
սուրբը, այժմս այստեղ երկու հարիւրից աւե-
լի գինուած մարդ ունինք, որոնք չորս հա-
րիւր Իւսուֆի գինուորներ արժեն:

Ապա իշխանն ու Մարտիրոս հայրը գնլւս
եկան և սկսեցին դիտել:

Հեռու, գիւղի հորիզոնի վրայ, սպիտակ
ձիան վրայ մի քանի կէտ էին երևում, որոնք
արագութեամբ գէպի գիւղն էին շարժւում:
Կասկած չկար, որ դրանք ձիաւորներ են, ու-
րոնցից մի քանիսը առաջ էին ընկել, կարծես
շուտ հասնելու գիւղին, իսկ մի մեծ սև կէտ
հետևիցն էր գալիս:

— Ե՛հ հոգ չէ, ասաց իշխանը, երբ նը-
րանց խմբի քանակութիւնն աչքով որոշեց,
հարկաւոր է միայն մեր տղոցը ամեն մի
խրճիթում որոշ բաժանել և լուռ կենալ և

ապա երբ նրանք միամիտ ներս կը խուժեն
իրանց ասպատակութիւնն սկսելու, այն ժա-
մանակ կտրել նրանց գլուխները:

Խմբին պատուէրներ տուին, իսկ իշխանը
քսան մարդով մի խրճիթում թագնուեցաւ,
որ յանկարծակի յարձակուելով նրանց վրայ,
պակասորդն էլ ինքը լրացնի:

Գիւղը լուռ էր. արաբաց խումբը մօ-
տենում էր. նրանց ձիաները քափ ու քըր-
տինք էին կտրել: Մերկ սրերը հանած նրանք
մտան գիւղը: Գիւղի մեռելութիւնը արաբաց
հրոսակների վրայ զարմացք պատճառեց. մի
խումբ շներ միայն նրանց հալածում էին,
այն ինչ ոչ մի մարդ չէր երևում:

— Անհաւատները բոլորն էլ կոտորուել են,
ասաց մի վայրենի գէմքով մարդ, որ ըստ ե-
րևոյթին խմբի մեծաւորն էր:

— Տղէրք, իջէք ձիերից և գուրս քշեցէք
հաւերին հաւաքներից, դարձաւ նա իւր խրմ-
բին և ինքը իջնելով ձիուց իւր հանդիպա-
կաց խրճիթը դիմեց, որի գուռը փակ գտաւ:

Մի ակնթարթում խումբը ցրիւ եկաւ
գիւղի մէջ և ամեն մէկն աշխատում էր շուտ
խրճիթը մտնել և աւարի լաւ պատառները
ինքը վերցնել:

Յանկարծ ամեն կողմից լսուեցան վայ-

նասունի, ճշի և հայհոյանքի ձայներ և քիչ յետոյ արաբաց խումբը դէպի իւր ձիաներն էր վազում. բայց հէնց այդ միջոցին վրայ հասաւ Գէորդ իշխանը և իւր կտրիճներով սկսեց նրանց ճանապարհը կապել: Սրաբները կըռուում էին հերոսաբար, բայց նրանց փրկութիւն չկար: Մի մի գազանների նման դուրս թափուեցան նաև հայոց մնացած խմբերը: Չանցաւ կարճ ժամանակ և երեք հարիւրի չափ ընտիր ձիեր և այդչափ էլ զէնք ու զրահ մնաց հայ կտրիճների ձեռքին, որոնք ուրախութիւնից խելքներն էին կորցրել: Ստուռածինքը հասցրեց նրանց ձիեր և զէնք, որին այնքան կարօտ էին:

Սրենն արդէն մայր էր մտնում, ուստի ուշ դատելու պատճառով խումբը որոշեց զիշերը այդ գիւղում անցկացնել, լաւ հանգրտանալ, կազդուրուել և ապա առաւօտը կըրկին ճանապարհը շարունակել:

Բայց առաւօտը երբ լուսացաւ թանձր մշուշը պատել էր ամբողջ գիւղին, մի քանի քայլ առաջ ոչինչ չէր երևում: Չնայած մարտիտուղին խումբը հեծած ձիերի վրայ կազմ և պատրաստ էր ճանապարհ ընկնելու, երբոր դուրս եկան իշխանը և հայր սուրբը, խումբը դիտարկները վերցրեց:

Մարտիրոս հայրը նայեց այդ քաջերին և ժպտաց. մարտիտուղի մէջ ծածանում էր կարմիր գրօշը Բազրատունեաց խաչանիշ նշանով, ապա նա պահպանիչ ասաց և խումբը շուտով անյայտացաւ թանձր մշուշի մէջ...

Գիւղի մեծ ու փոքրը, կանայք ու ծերերը երկար ժամանակ դեռ նայում էին նրանց ետևից և օհնում նրանց ճանապարհը. նրանք դեռ հեռուից, մառախուղի մէջ տեսնում էին ծածանուող գրօշակը, որ այնպէս սիրուն սազ էր գալիս այդ փոքրիկ խմբին:

— Սչն ու խաչը ձեզ պահպան, կրկնեցին զիւղացիները, երբ անյայտացաւ նրանց աչքից խումբը և գրօշակը և ապա ամեն մարդ իւր խրճիթը մտաւ:

Սյդ ժամանակ սկսուեց ձիւնը, Հայաստանի մեծ մեծ և փաթիլ փաթիլ եկող ձիւնը:


Ի է

Գագիկ Սրժրունին գժգոհ էր իւր վիճակից. Նախիջևան քաղաքը առնելով նա դեռ չէր բաւականացել. նրա սիրտը դեռ չէր գոհացել: Նա ուրիշ մտադրութիւններ ունէր կատարելու իւր երկրի սահմանները ընդար-

ձակելու և իւր երկիրը ապահովելու համար, բայց այդ չէր յաջողում իրան: Իւսուֆի հըրոսակաները ողողում էին նաև Վասպուրականը և ոչ մի բոպէ հանգստութիւն չէին տալիս նրան, ու ստիպուած նա էլ Աշոտ Երկաթի նման լեռներն ու ամրոցներն էր քաշուում և յանկարծակի յարձակուում թշնամեաց գնդերի վրայ:

Այդ տեսակ երերուն դրուժեան մէջ էր Գագիկ Արծրունին, որ Յովհաննէս կաթողիկոսից օրհնութեան կոնդակ ստացաւ, ուր կաթողիկոսը հրաւիրում էր նրան գնալ Տարօն, նախարարների ժողովին ներկայ գտնուելու և ազգի դրուժեան մասին խորհրդակցելու:

Գագիկը մերժեց այդ հրաւերը, քանի որ ինքը Վասպուրականի թագաւոր լինելով նախ ոչ ոքից կախում չուներ և երկրորդ այդ ժողովում իրան համար ոչ մի շահ չէր տեսնում: Նա չէր սիրում Բագրատունեաց ցեղը և կոյր նախանձը խեղդում էր նրան. նրա ջանքն էր ամեն կերպ նսեմացնելու այդ ցեղը և նա հաւատացած էր որ եթէ ընկնէին Բագրատունիք, Արծրունեաց ցեղը պիտի գլուխ կանգնէր և ձեռք ձգէր Հայաստանի թագաւորական գահը: Նա հաւատացած էր, որ Բագրատունեաց ցեղն է իւր արգելքը և հետևապէս Աշոտ



Երկաթի դէմ պիտի դարձնէ այդ հարուածը, բայց իւր այդ զայրոյթը, իւր նախանձը ոչ մի կերպով չէր արտայայտում, որպէս զի աչքի չընկնէր և այդպիսով իւր գործը չփչացնէր: Նա գործում էր Աշոտ Երկաթի դէմ, բայց շատ զգույշ և շրջանկատ. նա արտաքուստ շատ լաւ յարաբերութիւններ ունէր Աշոտ Երկաթի հետ, թէև ոչ նրան էր թողնում իւր գործերի մէջ խառնուելու և ոչ ինքն էր նրան մի բանում օգնում, իսկ թէ ինչ էր գործուում վարագույրի տակ, այդ ոչ ոք չգիտէր:

Մի գիշեր Գագիկ Արծրունին քաշուած իւր շքեղ սենեակներից մէկում, երկար ժամանակ զրոյց էր անում Ռշտունեաց և Անձևացեաց իշխանների հետ, որոնք ճրագի աղոտ լուսաւորութեան տակ մի խորհրդաւոր տպաւորութիւն էին թողնում:

— Լսում էք, իշխաններ, ասում էր Գագիկ Արծրունին, համարեա շշնջիւնով, ես վախենում եմ Աշոտ Երկաթից. դրան պէտք է մէջտեղից վերացնել. ամեն հնարք, ամեն միջոց պէտք է գործ դնել, որ նա բռնուի և Իւսուֆի ձեռքն ընկնի:

— Ինչպէս անենք, այդ մի փոքր դժուար է. եթէ նրա կեանքի դէմ դաւադրութիւն լարէինք հեշտ էր, բայց Իւսուֆի ձեռքը ձը-

գելը մի փոքր դժուար է, ասաց Ռշտունեաց իշխանը, որ մի քառասուն և հինգ տարեկան խորամանկ մարդ էր:

— Չէ, պէտք չէ նրա կեանքին ձեռք տալ, այդ մեր գործը չէ. հարկաւոր է զգոյշ կենալ. մեր գլխաւոր ջանքն այս պիտի լինի, որ նա Իւսուֆի ձեռքը ընկնի. իսկ թէ Իւսուֆն ինչ կանի նրան, այդ ամենի համար պարզ է:

— Ես կարծում եմ, որ մեր արքան շատ լաւ է ասում, ասաց Անձևացեաց իշխանը. եթէ մեզանից մէկը ձեռք բարձրացնի, այն ժամանակ ազգը գլխի կընկնի և կասկածը այսպէս թէ այնպէս Արծրունեաց ցեղի վրայ կընկնի, միակ միջոցը այն է, որ մենք աշխատենք, որ Աշոտ Երկաթը Իւսուֆի ձեռքն ընկնի...

— Բայց ինչպէս, ընդհատեց Ռշտունեաց իշխանը:

— Ինչպէս, շատ պարզ: Յայտնի է, որ Իւսուֆն ընկած է նաև Վասպուրականի թագաւորութեան հետ, մենք պէտք է ներկայանանք Իւսուֆին. իբր հալածուած Գագիկ արքայից և պաշտպանութիւն խնդրենք: Իւսուֆը կասկած չկայ, որ մեզ սիրով կընդունի և այն ժամանակ հեշտ է նրանց փմբի գլուխ անցնելը և Աշոտ Երկաթին հա-

լածելը, պատասխանեց Անձևացեաց իշխանը:

— Ապրիս, ասաց Գագիկը ձեռքը Անձևացեաց իշխանի ուսին խփելով, լաւ միտք յղացրիք իմ մէջ, դրանից աւելի լաւ ճանապարհ անկարելի էր գտնել:

— Ճիշտ որ լաւ է, համաձայնեց նաև Ռշտունեաց իշխանը:

— Այո, շատ լաւ է, ուրեմն վճռուած բան է, հէնց վաղը առաւօտ դուք երկուսով ճանապարհ կընկնէք Դուին և կը ներկայանաք Իւսուֆին, այնտեղ ձեր գլխաւոր ջանքը պիտի լինի արաբաց գնդի գլուխ անցնել և արշաւել Աշոտ Երկաթի վրայ. իսկ յետոյ, երբ լաւ կապեր կը կապէք սպարապետի հետ, այն ժամանակ ձեր գլխաւոր ջանքը պիտի լինի Վասպուրականի լարուած յարաբերութիւնը ոչնչացնելու: Դուք Իւսուֆին կը յայտնէք, որ ես ամենևին միտք չունիմ նրա դէմ ապրտամբելու և թէ ես պատրաստ եմ հարկը կանոնաւորապէս նրան հասցնելու. եթէ նա ինձ հանդիստ թողնի:

Իշխանները ոտքի ելան:

— Հա, իմ քաջ իշխաններ, իմացէք, որ սա երեքիս մէջ միայն խորին գաղտնիք է և այդ գաղտնիքը ոչ ոք չպիտի իմանայ. չվհատիք, ամեն բանի դիմեցէք, ամեն միջոց

ձեռքներդ առէք և յաջողեցրէք գործը:

— Միամիտ եղէք, արքայ:

— Ուրեմն բարի ճանապարհ, ասաց Գագիկը և գրկելով համբուրեց նրանց և ճանապարհ գրեց մինչև պալատից դուրս: Նա ներս եկաւ և սկսեց շրջել իւր սենեակում: Սմբողջ պալատը խոր քուն էր մտած, ոչ մի ձայն չէր լսուում, բացի Աղթամարի լճի ալեաց ծփալու ձայնից, որ մեղմ, բայց հաւասարաչափ ծեծում էր Վանի ժայռերը:

Միամիտ շրջում էր Գագիկը իւր սենեակում և զանազան ծրագիրներ կազմում, եզրակացութեանց հասնում, ինքն իրան տխրում, ուրախանում, հրճուում և սարսափում, առանց նկատելու թէ ինչպէս երկու վառ աչքեր հետևում են իրան և դիտում նրա հոգւոյ այլայլութիւնը:

Գագիկ Արծրունու գաղտնիքը երեք անձնաւորութեան մէջ չէր ամփոփուած այլ չորս . . .

ԻՐ:

Մարտիրոս Հօր հեռանալուց լետոյ, Յովհաննէս կաթողիկոսը մի փոքր ժամանակ ան-

շարժ մնաց, կարծես գիւթած լինէր, ապա ոտքի կանգնեց և սկսեց շրջել իւր ընդարձակ դահլիճում: Բուռն մտքերը նրան հանգստութիւն չէին տալիս, նա մտքերի ծովն էր ընկել, որից նա չէր կարողանում դուրս գալ: Երկար, շատ երկար մտածում էր նա, իւր անելիքը կըռում, ցածր ու բարձր անում, մինչև որ հասաւ գիշերը և նա խոնջացած մահիճ մտաւ, որ գոնէ հանգստանայ փոքր ինչ և ազատուի իւր հոգւոյ վրդովմունքից. բայց գիշերն էլ հանգիստ չտուեց նրան, զարհուրելի պատկերները շփոթում էին կաթողիկոսի հոգին: Մտքերը բուռն ալիքների, վիշապների նման բարձրացնում էին իրանց գլուխները, իրար վրայ յարձակուում, ջարդուում, փշրուում և ապա նորից յարձակուում . . .

Տխուր էր կաթողիկոսի հոգին և դառն էին նրա մտքերը, որոնք հեռագհետէ աւելի էին դառնանում: Նա գիտէր, նա ճանաչում էր հայ նախարարներին, գիտէր նրանց հոգին, նրանց անմիաբանութիւնն ու ետասիրութիւնը և աւելի յուսահատուում էր. . . : Ի՞նչ պիտի անէր. միակ ելքը, միակ փրկութիւնը դա էր՝ իւր բոլոր ճիգը պիտի թափէր նախարարներին միացնելու, հաշտեցնելու Աշոտ Երկաթի հետ, ապա թէ ոչ ազգը կորած էր. ուստի նա

կանգ առաւ այն մտքի վրայ, որ նախ հաշտեցնի Վրաց, Աղուանից և Ափխազաց իշխաններին և ապա Տարօնի մէջ, այնտեղ, ուր գտնուում է մուրազատու սուրբ Կարապետի վանքը, նախարարների ժողով հրաւիրի:

Ու հոգևոր տէրը քուն եղաւ այդ մըտքով փայփայած, յաջողութիւնը Աստուծոյ վրայ դնելով:

Արևի անդրանիկ ճառագայթները նոր էին դուրս եկել, երբ զարթեց ազգի հովիւը, աղօթեց Աստուծոյն և հէնց պատրաստոււմ էր ներկայանալ վրաց Ատրնբրսէհ թագաւորին, երբ յայտնեցին, թէ յունաց կայսրից թուղթ է բերուած իրան: Ինչ թուղթ էր այդ, նոր թշուառութիւն թէ ուրախութիւն էր բերում այդ թուղթը, թէ յոյները Հայաստանի թշուառութիւնը տեսնելով նորից արծարծում էին հին առակները—կրօնական միութեան խընդիրը—նա չգիտէր: Գողգոջիւն ձեռքերով բաց արաւ թուղթը և կարգաց յունաց Կոստանդին Պերփերուժէն կայսեր կողմից պատրիարքի գրութիւնը որ գրում էր.

«... Սրա հետ միասին թուղթ ուղարկեցինք Ատրնբրսէհին և Ափխազաց Գուրգենին, խրատելով նրանց, որ լսեն ձեր խրատները, մոռանան իրար հակառակութիւնը և

միմեանց հետ սիրով ու միաբան լինին: Ձեր պարտքն է բերանէ բերան, թղթով, պատգամաւորներով, եպիսկոպոսներով և քահանաներով աշխատել, որ չար հակառակութիւնը վերանայ դրանց միջից և այդպիսով միաբան և միախորհուրդ լինելով, չարութիւնը այլևս չի կարող ապականել ձեր աշխարհը: Եթէ դուք այդպիսով կը միանաք, այն ժամանակ մեր ինքնակալ թագաւորն էլ, հարկաւոր ժամանակ կ'ուղարկէ բազմաթիւ զօրք իբրև ձեզ օգնական...»: *Մ*

Ուրախացաւ կաթողիկոսը կարդալով այդ թուղթը և շտապով ներկայացաւ Ատրնբրսէհին, որ խօսք տուեց նրան զադարեցնելու իւր թշնամութիւնը հայոց հետ և օգնելու նրանց Իւսուֆի գէմ:

Գոհ սրտով բաժանուեց կաթողիկոսը Ատրնբրսէհից և ինքը դարձաւ Հայաստան, Տարօն գաւառը, որտեղից պատգամներ ուղարկեց ամեն կողմը, որ գան հաւաքուին հայ իշխաններն ու նախարարները:

Բայց ինչ շահեցաւ կաթողիկոսը այդ ժողովից. ոչինչ: Նախարարներից ոմանք չներկայացան այդ ժողովին, իսկ ոմանք իրար դէմ կրկին հակաճառելով բաժանուեցան միմեանցից առանց մի ելքի գալու:

Վհատեց կաթողիկոսը և դառնացած սըր-
տով նամակ ուղարկեց Յունաց կայսեր նկա-
րագրելով ազգի տառապեալ դրուժիւնը, նա-
խարարների անմիաբանութիւնը և օգնութիւն
խնդրեց նրանից: Կարճ ժամանակ անցաւ և
իւր թղթի պատասխանն ստացուեցաւ, որով
Յունաց կայսրը իրան և Աշոտ Երկաթին Կոս-
տանդնուպօլիս էր հրաւիրում, խոստանալով
նրանց շատ բարիքներ և օգնական զօրք:

Կաթողիկոսը հրաւիրման այդ թուղթը
ստանալով իւր գնալը մերժեց զանազան պատ-
րուակի տակ քողարկած, վախենալով որ եթէ
ինքը գնայ Կ. Պօլիս, կրկին կրօնական միու-
թեան խնդիրը կ'արժարձուի ուստի ճանա-
պարհ ընկաւ Տարօնից դէպի Շիրակ Աշոտ Եր-
կաթի մօտ, որ խորհուրդ տայ նրան ընդու-
նելու յունաց հրաւերը:

Իթ.

Հեղինէն հօր սարսափելի գաղտնիքը իմա-
նալուց յետոյ սաստիկ անհանգիստ էր: Ի՞նչ
էր անում իւր հայրը — մի սոսկալի գաւադ-
րութիւն, որով իրանց ամբողջ ցեղը պիտի
մատնուէր դարէ ցզար անէծքի և դաւաճանի

կոչմանը, և ինչո՞վ կարելի էր այդ արատը
վերացնել իրանցից, կրկին ոչնչով: Մ... Հե-
ղինէի զգայուն և փափուկ սիրտը կսկծում էր
քանի միտն էր բերում այն գիշերուան գաղտ-
նի խորհուրդը և միջոցներ էր որոնում նրա
ծրագիրը խորտակելու: Օր աւուր իւր հայրը
ատելի էր դառնում, որդիական պարտաւորու-
թիւնները լռում էին նրա մէջ և նրա հոգու
մէջ տիրապետում էր ազնուութեան և ճշմար-
տութեան զգացմունքը: Մի կողմը կանգնած
էր իւր հայրը, իրան զգուռողն ու սիրողը իւր
վատ և զազրալի արարքներով, բայց որին բը-
նութեան օրէնքի համաձայն պարտաւոր էր
սիրել և յարգել, այն ինչ միւս կողմից տու-
ժում էր Աշոտ Երկաթը, օրինական թաղա-
ւորը, իսկ յանձին դորա և ամբողջ ազգը:

Այստեղ տուժում էր մի անձն միայն, որ
կուրացած էր փառամուլութեամբ, իսկ այնտեղ
ազգը. ինքը կանգնած էր երկուսի մէջ, որոն-
ցից երկուսն էլ ուժեղ էին, երկուսն էլ սի-
րելի. ո՞րին աւելի գերակշռութիւն ցոյց տայ.
իւր հօրը, որին պարտական էր սիրել թէ՛
ազգին...

Աւելի լաւ չէր լինի, եթէ ինքը լռէր,
հեռու քաշուէր այդ խարդաւանքներից և իւր
կանացի գործերին նայէր, քան թէ իւր տան

մէջ իւր հօր գէմ լրտեսութեամբ պարապէր...

Ի՞նչ նրա գործն էր, թէ կը սպանուէր Աշոտ Երկաթը, կը խորտակուէր ազգը, կ'ոչնչանար ամբողջ Հայաստանը. ինքը հօ հանգիստ կը լինէր, գոհ իւր վիճակից, շքեղ պալատներում ճեմելիս իւր հօր փաղաքշանքներով շրջապատուած...

Օ... նա չէր ուզում իւր անձնական հանգստութիւնը, նրա երակներէի մէջ կարծես չէր հոսում իւր հօր արիւնը և նրա հոգու մէջ տիրապետում էր վառ կերպիւ ազգի սէրը, ճշմարտութիւնն ու արդարութիւնը... նա զոհում էր իւր ընտանիքը՝ հօրը, մօրը և ամեն հանգստութիւն իւր ազգին, որի համար պատրաստ էր նա ամեն զոհողութիւն անել: Ազգն էր նրա հայրն էլ, մայրն էլ և հանգստութիւնն էլ. երբոր նա տառապում էր, ինքն էլ պիտի տառապէր, նրա հետ ուրախանար, նրա հետ տխրէր... Ահա թէ ինչ էր մտածում նա, երբ միւս օրն ևեթ կանչել տուեց իւր մօտ Տէր Սահակին, որի հաւատարմութեան մասին կասկած անգամ չունէր:

Երբ Տէր Սահակը ներս մտաւ նրա առանձնասենեակը, Հեղինէի երեսին գոյն չկար. ամբողջ գիշերներ անքուն էր մնացել:

— Ի՞նչ կայ, աղջիկս, ինչո՞ւ այդպէս այ-

լայլուած է, հարցրեց Տէր Սահակը:

— Օ... տէր հայր, հոգիս մաշուած է, երբեմն այնպէս վրդովուած եմ, որ քիչ է մընում ինձ ծովը ձգեմ և վերջ դնեմ իմ տանջալից կեանքին:

— Ի՞նչ է պատահել, աղջիկս, աստ՛. յայտնիր, ես պատրաստ եմ քո ամեն վշտերը սփոփել:

— Ո՛չ, տէր հայր, ո՛չ, իմ վշտերը չեն սփոփուի, մինչև որ հայրս ձեռք չի վերցնի իւր ստոր արարքներից:

— Ի՞նչ կայ, էլի նոր բան:

— Եւ ինչպիսի՞... երէկ իրիգուն մեր պալատումն էին Ռշտունեաց և Անձևացեաց իշխանները, որոնց հետ հայրս երկար խորհուրդ էր անում, թէ ինչպէս անեն, որ Աշոտ Երկաթին Իւսուֆի ձեռքը ձգեն և ապա սպանել տան...

— Ո՛հ, անգութ, ի՞նչ ստակալի ոճիր. և դո՞ւ աղջիկս, բոլորը ճիշդ լսեցիք:

— Այո, բոլորը լսեցի: Այսօր առաւօտ իշխանները արդէն ճանապարհ ընկան դէպի Դուին, որ ներկայանան Իւսուֆին և այնտեղից արաբաց զնդով Աշոտ Երկաթին բռնեն:

Տէր Սահակը մի րոպէ լռեց և ապա դառնալով դէպի Հեղինէն ասաց.

— Եւրբիս աղջիկս, որ ընդհանրութեան շահերը վեր դասելով ծնողական շահերից այդ մասին յայտնում ես ինձ: Ուշ չէ, կարելի է դրա առաջն առնել: Ես ինքս հէնց այսօր Լեթ կանապարհ կ'ընկնեմ դէպի Արշարունիք, կը գտնեմ Մարտիրոս հօրը և ամեն ինչ կը յայտնեմ, իսկ Մարտիրոս հայրը գիտի թէ ինչ կ'անի:

— Ա՛խ, այ՛ո հայաստանի այդ Ղևոնդը...
Շտապիր ուրեմն...

Փոքր ժամանակից լետոյ Տէր-Սահակը ձի հեծած ճանապարհ էր գնում, առանց նայելու ճանապարհի ձիւնին ու ցրտին: Շատ նեղութիւններ կրեց, շատ հարց ու փորձ արաւ և վերջը գտաւ ծերունի վանահայր Մարտիրոսին ու մանրամասն պատմեց գործի հանգամանքը: Երբ որ լսեց Մարտիրոս հայրը Գագիկ Արծրունու գաւազրութիւնը, սաստիկ բարկացաւ, անիծեց նրանց ցեղը և ինքը շտապեց հասնելու Աշոտ Երկաթին:

— Այժմս դու գնա, տէր Սահակ, ասաց վանահայրը նրան ճանապարհ գնելով, չսպանիր իմ սրտի գոհունակութիւնը Արծրունեաց օրիորդին, համբուրիր նրան իմ կողմից, և թող Աստուած այդպիսիների թիւը բազմացնի: Ասա նրան, Հայաստանը կորած չէ, քանի որ օրիորդ-

ներն են այդ տեսակ հայրենասիրութիւն ցոյց տալիս:

Լ.

Մի խումբ արաբաց գնդի գլուխ անցած երկու հայ իշխանները Գուկից արշաւում էին դէպի Այրարատեան երկիրը նրան հուր ու մոխիր դարձնելու: Ռշտունեաց և Անձեւացեաց իշխանները արդէն կատարել էին Գագիկ Արծրունուն տուած խօսքը, թէ և շատ ծանր գնով: Իւսուֆ չ'հաւատարով դրանց խօսքին պահանջեց նրանցից, որ հաւատներն ուրանան, ապա թէ նա նրանց խնդիրը կը կատարէ տալով նրանց օգնական գունդ թէ Գագիկ Արծրունու դէմ, որից նրանք իբր թէ հալածուած էին և թէ Աշոտ Երկաթի դէմ, որին բռնելու ինքը շատ ուրախ կլինէր: Իշխանները ուրացան իրենց եկեղեցին, մոռացան Լուսաւորչայ հաւատը և երգուեցին, որ նրանք հաստատ կը մնան Մուհամէդի կրօնին և ամեն ճիգ կը թափեն հայրենակիցներին էլ նոյն ճշմարիտ կրօնը ընդունել տալու:

— Լաւ խաղ ենք խաղում, իշխան, ասաց

Ռշտունեաց իշխանը դառնալով իւր ընկերոջը, տեսնենք քննով է վերջանալու:

— Ես կարծում եմ, որ ինչով էլ վերջանայ մենք յաղթող պիտի դուրս գանք: Կըրնկնի Գազիկը, մենք Իւսուֆին կ'յարենք, կ'ընկնի Իւսուֆը Գազիկից պաշտպանութիւն կը գտնենք: Ի՞նչ մեր հոգն է թէ երկուսը իրար միս կուտեն, մերն այն է, որ մենք հանգիստ լինինք:

— Այդ ճշմարիտ է, իշխան, բայց այն էլ պէտք է 'ի նկատի ունենալ, որ մեր առաջ Աշոտ Երկաթ կայ, որը կարող է մեզ արժանաւոր պատիժ տալ:

— Է՛հ, ես ամենեւին չեմ մտածում Աշոտ Երկաթի վերայ, քանի որ վաղ թէ ուշ նա մեր ձեռքը կընկնի:

Այնուհետեւ երկուսն էլ լռութեամբ առաջ էին քայլում, երբ նրանց առաջ մի գիւղ երևաց:

Օրը արդէն մթնելու վրայ էր և ցուրտը հետզհետէ սաստկանում էր. ուստի երկու հայ իշխանները վճռեցին այդ գիշեր գիւղում անցկացնել: Երբ մտան նրանք գիւղը, Մարտիրոս հօր կազմած յիսուն մարդուց բաղկացած մի խումբ կար միայն:

Ռշտունեաց և Անձևացեաց իշխանները

ցած թռան ձիերից և դիմեցին նրանց հիւրասիրող գիւղի մեծաւորի տուն, իսկ խումբը ցրուելով գիւղի զանազան խրճիթները ամենապատուաբեր տեղերում հանգիստ նստեցին և ընթրիք պահանջեցին տանտէրերից:

Գիւղացիները լուռ կատարում էին նըրանց հրամանները և աղօթում Աստուծուն, որ իրենցից շուտով հեռացնի այդ փոթորիկը:

Արաբները կերան, կշտացան, բայց հայկական լիառատ հիւրասիրութիւնից գոհ չըմնացին, նրանք աւելին պահանջեցին:

Բաւական չէր գիշերն այս տաք և կակուղ անկողինները, աներես շների նման գիւղացուց հարսներին ու կոյսերին էլ պահանջեցին:

Գիւղացիք խնդրեցին, որ չանեն այդ անամօթութիւնը, բայց նրանք իրենց սրերը ցոյց տուին, յայտնելով, որ եթէ չեն կատարի իրենց հրամանը. այդ սրերով կը կտրատեն նրանց գլուխները:

ձար չկար. արտասուլթոր ընկան հայ իշխանների ոտքը և խնդրեցին, որ գոհ մնան իրենց հիւրասիրութիւնից և չպղծեն իրենց ընտանիքները:

Երկու հայ իշխանները ուսերը թափահարեցին և կոպտաբար պատասխանեցին.

— Հա, քնչ կը պակսի որ, ինչո՞ւ չէք կատարում նրանց հրամանը:

Գիւղացոց կատաղութեանը չափ չկար:

— Լաւ, ասացին նրանք, մենք կը կատարենք ձեր հրամանը, միայն ոչ ինքնակամ, այլ զէնքը ձեռքերիս:

Ասացին ու առիւծների նման յարձակուեցան արարների վրայ: Բայց ինչ կարող էին անել Մարտիրոս վանահօր պատրաստած յիսուն մարդը հինգ հարիւրից աւել մարդու դէմ— ոչինչ: Նրանք բոլորը կոտորուեցան, սրի անկացան նաև մանուկներն ու ծերերը: Իսկ արարները առաւօտուան դէմ, իրենց բարբարոս կրքերին յագուրդ տալուց յետ՝ ամբողջ գիւղը կրակ տուին և հեռացան գիւղից:

Փոքր ինչ առաջ անցնելով, հայ իշխանները յետ նայեցին և տեսան թանձր ծուխ, որ բարձրանում էր գիւղից, բայց նրանց դէմքի վրայով խղճի և ոչ մի նշան չանցաւ. նրանք սառն էին ինչպէս շիջապատող ձիւներ:

Մի փոքր էլ առաջ անցան նրանք և ահա իրենց առաջ, ճանապարհից մի քանի քայլ այն կողմը, մի սառցով պատած այրի մէջ, նրանք մի կին տեսան, որ պինդ գրկել էր իւր մանկանը և ապուշ կրթած նայում էր իրենց: Անձևացեաց իշխանը ձին առաջ

քշեց և մօտենալով կնոջը՝ գոռաց.

— Ո՞վ ես դու:

Կինը ոչինչ չխատասխանեց, այլ ապուշ կրթած նայում էր նորան. նայում էր նոյնպէս և փոքրիկ մանուկը իւր սէրուն, բայց արհաւիրքով լցուած աչքերով:

— Չէս լսում, գոռաց իշխանը և մտրակով բռնեց. կինն անխօս ցած գլորուեց գլորելով իւր հետ-նաև իւր մանկանը: Իշխանը հեռացաւ կնոջից, նա հասկացաւ, որ այդ կինն ու մանուկը սառած էին և ոչ մի կենդանութեան նշոյլ չկար նրանց մէջ, այն ինչ ինքը կենդանու տեղ դնելով խօսակցում էր նրանց հետ:

Խեղճ կինը գիշերօ փախուստ էր տուել գիւղից և ապաստանուելով սառցէ այդ այրում, սառել, փետացել էր իւր մանկան հետ...

Բայց նրանք չհետաքրքրուեցան անգամ դրա վիճակով, այլ կրկին առաջ անցան: Ի՞նչ փոյթ իրենց թէ ետեւից թողնում էին աւերածութիւն և մահ. բաւական էր, որ նրանք գոհ էին իրենց վիճակից: Մի քանի օր այդպէս շարունակեցին իրենց ճանապարհը և մի տեղ լուր ստացան, որ Աշոտ Երկաթը հեռու չէ իրենցից և թէ նա շրջում է շատ փոքրաթիւ մարդկանցով:

Երկու իշխանների սրտերը թունդ առան.
 նրանք իրենց գունդը ստուգարացրին մօտերքը
 եղած արաբական գնդերով և մօտ հազար
 մարդով արշաւեցին Աշոտ Երկաթի վրայ, որը
 ընդամենը երեք հարիւր մարդ ունէր իւր
 ձեռքի տակ: Ռշտունեաց և Անձևացեաց իշ-
 խանները վստահ էին, որ մի քանի օրից յե-
 տոյ Աշոտ Երկաթը կամ սպանուած կը լինի
 և կամ շղթայակապ Իւսուֆի մօտ Դուին կը
 լինի տարուելիս...

ԼԱ.

Երեկոյ էր: Աշոտ Երկաթը իւր խմբով
 դանդաղաքայլ առաջ էր գնում Բասեան
 գաւառի մի նեղ կրճով: Երկինքը պատած էր
 գորշ ամպերով, որից թափուում էր ձիւնը և
 սպիտակ սաւանով ծածկում երկիրս... Տխուր
 էր երկինքը, տխուր էր և Աշոտ Երկաթի
 սիրտը: Ոչ մի բերկրանք, ոչ մի յուսոյ նշոյլ
 չէր ուրախացնում նրա սիրտը: Սև սև մըտ-
 քերը պաշարել էին նրա միտքը, որոնք կըր-
 ծում էին նրա սիրտը և ձգում նրան մի
 տեսակ տենդային դրուժեան մէջ, որ ոչ յու-
 սահատութիւն էր նշանակում և ոչ հոգեւոյ

խաղաղ տրամադրութիւն... Ի՞նչ էր իւր
 կեանքը և ի՞նչ էր իւր ժողովրդի դրութիւնը:
 Ժողովուրդը տառապում էր սովի, նե-
 դութեան, սրի և երկպառակութեանց տակ,
 իսկ ինքը իւր մի բուռն քաջերով ստիպուած
 էր աստանդական կեանք վարել, զգալ ժողո-
 վրդի ցաւն ու դարձը, տեսնել նրա վիշտն ու
 տառապանքը և ոչնչով չկարողանալ օգնել
 նրան, ահա թէ ինչն էր ցաւեցնում նրա
 սիրտը, ինչն էր վրդովում քաջի հոգին: Փըր-
 կութեան յոյս ոչ մի կողմից չէր տեսնում
 նա, քանի որ նախարարների մեծամասնու-
 թիւնը կամ կղզիացած էր իրենից և կամ
 թշնամացած. իսկ ինքը իւր փոքրաթիւ հա-
 մերաշխ նախարարներով և փոքրիկ խմբով
 ինչ պիտի անէր Իւսուֆի ահեղ զօրութեան
 դէմ, որն օր աւուր օտանատակ էր տալիս
 Հայաստանը և հայ դաւաճան իշխաններով
 շրջապատուած աշխատում էր իւր կեանքի
 դէմ էլ որոգայթներ լարել: Ծանր էր քաջի
 դրութիւնը, բայց նա չէր յուսահատուում, նա
 հաւատում էր Նախախնամութեանը, որ չի
 թողնի իրան և իւր ժողովրդին անօգնական
 Ու գնում էր Աշոտ Երկաթը դուրսը կախ
 գցած և խորին մտածմունքի մէջ ընկղմուած.
 նրան լուռ հետևում էին երեք հարիւր քաջ

տղամարդիկ, որոնք Աշոտ Երկաթի մի ակնարկին էին սպասում, որ իրենց դէպի կրօնը նետեն:

Զիւնը տեղում էր շարունակ: Մուլթն ընկնում էր հետզհետէ, բայց ձիաւորները դեռ աշխոյժով առաջ էին գնում, երբ նրանց առաջ բացուեց մի խոր կիրճ, որի երեք կողմից էլ բարձրանում էին սեպացած բարձրաբերձ ժայռեր, որոնք զարդարուած էին ձիւնի և սառցի կեղևներով պատած ծառերի ոստերով, որոնց ճիւղերից կախուած էին հաստ սառցէ շիթեր:

Ահարկու կերճ էր դա, որի մի կողմից հոսում էր լեռնային մի վտակ, որ սառցէ կեղևի տակ տխուր ջրանջում էր ու գլորւում ցած, իսկ միւս կողմից՝ սեպացած ժայռի վրայից թռչում էր մի ուրիշ վտակ և իր ետևից թողնելով սառցէ ահագին շիթը, ուժգնութեամբ ցած էր գլորւում և գրկախառնուելով ձորում հոսող վտակի հետ՝ գլորւում ցած... Աշոտ Երկաթը գլուխը վեր քաշեց և և նայեց բնութեան այդ խաղին, որ վատ տրպաւորութիւն թողեց նրա հոգու վրայ: Մի տեսակ անհասկանալի թախիժ պատեց նրա սիրտը. տհաճութեամբ նա կրկին իջեցրեց գլուխը և մտրակեց ձիուն. ձին մի թռիչք

արաւ և մեխուածի նման կանգ առաւ, կարծես աներևոյթ մի ձեռք յա՛կարծ սանձահարեց ձիուն: Աշոտ Երկաթը զարմացաւ և շփոթուած աջ ու ձախ նայեց, բայց կասկածաւոր ոչինչ չնկատեց, որ կարող լինէր վախեցնել իւր ուշիմ ձիուն և ստիպել նրան այդպէս յանկարծակի կանգ առնելու:

Նա նորից մտրակեց, ձին մի թռիչք էլ արաւ և այնուհետև որքան որ մտրակեց՝ նա տեղից չշարժուեցաւ: Խուճը շրջապատեց Աշոտ Երկաթին, որոնք զարմացմամբ նայում էին ձիուն, թէ ինչո՞ւ նա առաջ չէ գնում:

— Ե՛... ինչպէս երևում է ձիս յոգնել է և կամ մի բանից վախեցաւ: Յոգնելը սրանից չեմ սպասում, որովհետև շատ երկար ժամանակ չէ ինչոր ճանապարհին ենք, բայց թէ քնչից վախեցաւ, այդ է ինձ զարմացնում: Տղայք, դուք ոչինչ կասկածաւոր բան չտեսա՞ք ճանապարհին, դարձաւ Աշոտը դէպի իւր խումբը:

— Ո՛չ, պատասխանեցին մի քանիսը:

— Ուրեմն հարկաւոր է մի փոքր հանգիստ տալ, ասաց Աշոտ Երկաթը և մի փոքր ժամանակ հանգիստ տուեց իւր ձիուն: Զին ականջները ցցել էր և վայրենի կերպիւ նայում էր առաջ, ճանապարհի ուղղութեամբ,

որով պիտի անցնէր խուճբը:

Կասկածը պատեց Աշոտ Երկաթին և նա էլ դէպի ձիու նայած կողմը նայեց:

Ոչինչ կասկածաւոր բան չտեսաւ նա, ճանապարհը ոլորվում էր մի փոքր տարածութեամբ առաջ և այնտեղ դուրս էին ցցուած ահարկու ժայռերը, որոնք լուռ իրենց էին նայում իսկ կասկածաւոր ոչինչ չկար: Բարկացաւ նա իւր ձիու վրայ և հենց որ ուզում էր մտրակել, նրա ականջին դիպաւ մի տեսակ անորոշ ձայն, որը ստիպեց նրան զգաստանալ: Նա նորից ականջ դրեց, այո, ձայնը գալիս էր իւր առաջից և հետզհետէ մօտենում էր իրեն: Այդ ձայները խիստ նման էին ձիանց ոտքի դոփիւններին և փռնչոցներին: Աշոտ Երկաթը զգաց, որ առաջից մի խուճբ ձիաւորներ էին գալիս, բայց թէ ովքեր էին և թնչքան է նրանց թիւը՝ դեռ անյայտ էր իրան համար: Նա նշան արաւ խմբին, որ պատրաստ լինին. իսկ ինքը սուրը պատեանից հանեց ու սպասեց ձիաւորների երևալուն:

— Այ թէ թնչից էր վախենում իմ ձին, մըմըած ինքն իրեն Աշոտ Երկաթը:

Յանկարծ նոյն տեսակ դուփիւններ ետեւից լսեց, կարծես երկուսն էլ իմաց էին արել իրար, որ միաժամանակ սկսեն: Ինչ էր նշա-

նակում այդ, մտածեց նա և ժամանակ անգամ չուներցաւ պարզելու այդ հանելուկը, երբ կիրճի երկու կողմերիցն էլ ահուելի ձայներ լսուեցան և սրերը հանած ճանճերի նման բազմաթիւ ձիաւորներ վրայ տուին Աշոտ Երկաթի խմբին, որը թակարդի մէջ էր ընկել:

Վահանը առաջ քաշեց Աշոտ Երկաթը, սուրը բարձրացրեց, իւր խմբին ձայն տուեց, ահուելի մռնչիւն հանեց և վրայ վազեց թըշնամիների վրայ:

Արիւն է կաթում նրա սրիցը, մէկը միւսի ետեւից ընկնում են թշնամիները, խորը հառաչում և շունչները փչում... Աշոտ Երկաթը առիւծ է դարձել, առիւծ են դարձել նաև իւր քաջերը, որոնցից ամեն մէկը տասը թշնամի է պարկեցնում և ապա ինքն էլ խողխողուած շունչը փչում: Տեսնում է Աշոտը թշնամեաց հունձը, տեսնում է նա և իւր քաջերի ընկնելը, սիրտը կսկծում է և կտաղած երեք չորս գլուխ միասին թռցնում... Բայց թնչքան շատ են թշնամիները, նրանք կարծես անվերջ անհամարեն, կոտորում է կոտորում՝ կրկին սրանք կան, չեն պակասում և պինդ օղակով երկու կողմից սեղմում են իրեն... Ընկնում են իւր քաջերը մէկը միւսի ետեւից, բայց ինքը հերոսաբար դեռ կռիւ է անում,

գլուխներ թռցնում... Բայց ինչ կայ անսպառ-
 ալս աշխարհիս վերայ, որ մի քաջի Ֆիզիքա-
 կան գորութիւնը անսպառ լինի: Աշխարհս էլ
 է սպառում, նա էլ վերջ ունի, ուր մնաց թէ
 Աշոտ Երկաթի գորութիւնը... Բայէ առ ըստ
 նրա գորութիւնը սպառում է կամաց կամաց
 թուլանում են նրա բազուկները. արդէն իւր
 ահեղ գորութեան վերջին թելն է մնացել նրա
 բազուկների մէջ, այն ինչ նրա հոգին, այն
 վեհ և արի հոգին չէ թմրում, չէ թուլանում
 երկիւղի և ոչ մի նշան չէ արտայայտում, նրա
 աչքերը փայլատակում են, բոց ու շանթեն
 արտացոլում և սարսուեցնում թշնամուն, թըշ-
 նամիները գեռ գիւթաւալ ընկնում էին նրա
 սրից և մահուան տագնապի մէջ տոչորում...
 Բայց թշնամիները չեն պակասում, նրանք
 բուռն ոյժով կրկին վրայ են վազում:

Նայում է դրանց Աշոտ Երկաթը, նա-
 յում և նրա սիրտը լցում է դառնութեամբ:
 Թախիծով լի աչքերը նա աջ ու ձախ է դարձ-
 նում, իւր քաջերին պտրում, նրանց ձայն տա-
 լիս: Բայց նրանցից շատերը, խոր բուն են
 մտած, նրա ձայնը չեն լսում, նրանցից շա-
 տերը կոտորուած են... մի բուռն քաջեր գեռ
 կուռում են:

Յուզում է Աշոտ Երկաթը, վերջին ճիգն

է թափում, վերջին անգամ բարձրացնում է
 ահեղ սուրը և ջախջախում իրեն մտեցող ա-
 նօրէնների գլուխները...

Բայց բազուկները էլ չեն բարձրանում,
 թուրը, արիւնով ներկուած թուրը, որից աղ-
 բիւրի նման ծլծլում է արիւնը, էլ չի բարձ-
 րանում, նրանք ոյժից ընկած են, անգոր, ինչ-
 պէս, մանկան ձեռքեր, այն ինչ իւր ձին տաս
 տեղից վիրաւորուած հազիւ ոտքի վրայ է
 կանգնած:

Տեսնում են այդ անօրէնները և դիւա-
 կան ժպիտը փայլում է նրանց դէմքերի վը-
 րայ. նրանք հրէշաւոր քրքիջ են արձակում և
 համարձակ վազում դէպի Աշոտ Երկաթը...

Վերջին գերմարդկային ճիգն է թափում
 քաջը, սուրը բարձրացնում և յուսահատու-
 թեամբ լի աչքերը վերջին անգամ շուրջը նա-
 յում: Յանկարծ նրա աչքին, հեռու ձորի մէջ,
 ժայռի կուրծքի տակից երևում է մի ծերու-
 նի, Գրիստոսի սուրբ խաչելութիւնը ձեռքին:
 Հոգի է ներշնչում այդ խաչը քաջի սրտում
 և նա կրկին ջախջախում է թշնամեաց գլուխ-
 ները: Այդ ժամանակ լսում են աղաղակներ.
 Թշնամին շփոթվում է, թողնում Աշոտ Եր-
 կաթին և դէպի փախուստ աճապարում: Նա-
 յում է Աշոտ Երկաթը դէպի խաչը և իւր աչ-

քերին չէ հաւատում այնտեղ նա տեսնում է մի խումբ քաջեր որոնք հալածում են թըշնամիներին: Այդ խմբի մէջ բարձր փայլում է խաչանիշ գրոշակը . . . Իս իւր խաչնէ, իւր փրկիչը, որը ծածանում է քաջերի մէջ:

Փախչում է թշնամին, ինքը ազատուած է, խաչն և գրոշակը մօտենում են: Մօտենում է նա և ծերունին:

Աշոտ Երկաթը ցած է թռչում ձիուց՝ չոքում ձիւնի վրայ և համբուրում խաչը:

— Կեցցէ Աշոտ Երկաթը, ապրի Մարտիրոս հայրը, գոռում է խումբը և կրկին հալածում թշնամուն:

Խաւարը պատում է ամբողջ կիրճում: Մարտիրոս վանահօր խումբը լետ է դառնում հալածելուց և իւր հետ բերում երկու հայ իշխաններին, որոնց գերելէին քաջերը:

— Իաւաճաններ, գոռում է Մարտիրոս վանահայրը և բարկութիւնից ատամները կրճտացնում: Քաջերը ուզում են պատառ պատառ անել նրանց, բայց Աշոտ Երկաթը նշան է անում, ակնածութեամբ լռում են նրանք և Անձևացեաց ու Ռշտունեաց իշխաններին շղթայակապ իւր առաջ բերում:

Արհամարանքով նայում է Աշոտ Եր-

կաթը դրանց և ապա դիմելով պահապաններին ասում.

— Քանզեցէք շղթաները, ես չեմ ցանկանում, որ հայ իշխանները շղթայակապ իմ առաջ դուրս գան:

Պահապանները զարմացմամբ քանդում են շղթաները և լուռ նայում Աշոտ Երկաթին:

— Մարտիրոս հայր, սրանց ամօթալի առարքը յայտնի է քեզ. քո կտրիճները գերեցին սրանց, ուստի և քեզ եմ յանձնում սրանց դատաստանը:

— Ո՛չ, արքայ, այդ մեր իրաւասութիւնից դուրս է և մեր կեանքն էլ քո իշխանութեանն է յանձնուած, մենք չենք կարող սրանց դատաստանը անել, իսկ եթէ իմ կտրիճներին թողնես, այդ պատիժը սոսկալի կը լինի, առայց Մարտիրոս հայրը և մի մուլի հայացք ձգեց դէպի դաւաճանները:

— Գթութի՛ւն, մենք սխալուած ենք, կին, որդիք ունենք, ասացին դաւաճանները և ընկան Աշոտ Երկաթի ոտքերը:

— Թշուառներ. . . կրկնեց Աշոտ Երկաթը և ապա դառնալով պահապաններին ասաց.

— Ձէնքերն առէք, իշխանական զգեստը հանեցէք և արձակեցէք դրանց, թող ուր ուզում են գնան:

Այնուհետև Մարտիրոս վանահայրը կրկին
մտաւ ժողովրդի մէջ իւր խումբերը կազմա-
կերպելու, իսկ Աշոտ Երկաթը յոյսը օտար ոյժի
վրայ դրած ուղևորուեց դէպի Կ. Պօլիս...

Ի՞նչ պիտի լինէր Հայաստանի դրու-
թիւնը...



Առաջին մասի վերջ:

5875

2013

